

WANTOK

NIUSPEPA BILONG YUMI OL PAPUA NIUGINI STRET! 27 YIA NAU

32 pes

Namba 1,273

Wik i stat long Fonde Novemba 19, 1998

60t

INSAIT

• Pora tok pala-men kamap olsem maket

- pes 2



4 pes
Lae Nius stat long pes 11

• 1999 baset tingim skul subsidi

- pes 3

• 1999 baset ripot

- pes 8-9

4 pes ekstra spot nius

Ovasis yunion bai straik egensim PNG Gavman

YAKAM KELO i raitim

OL ovasis yunion bai kamapim wanpela straik ol i kolim Blek Ben long olgeta kago na sevis i kam long PNG sapos PNG Gavman i rausim opis bilong Nesenel Trening Kaunsel, Minimum Wejes Bod, Abitresen Traibunel Bod na Nesenel Traipatait Konsaltativ Kaunsel. Ol dispela opis i stap insait long Leba na Emploimen Dipatmen. Dispela i min olsem wanem kago o sevis i kam long PNG bai bungim hevi long ol ovasis yunion husat i wok long sip na arapela sevis ogenaisesen.

Ol ovasis i soim dispela sapot bilong ol long Papua Niugini Tred Yunion Kongres (PNGTUC) long dispela wik taim Nesenel Gavman i kamapim long baset bilong em long

rausim sampela opis na wok bilong Gavman we wok bilong yunion i save kisim strong na sapot long en.

Mausman bilong yunion Lawrence Titimur i tok dispela pasin Nesenel Gavman i laik mekim i olsem Gavman i laik rausim fridom o demokresi bilong ol pipel. Sapos Gavman i rausim ol dispela opis na wok bilong ol, bai olgeta wokmanmeri long PNG i painim hat bikos ol i nogat wanpela hap moa long go taim ol i gat hevi long wok, pe na arapela hevi bilong ol. Na PNGTUC tu bai i nogat pawa moa long wok na em i mas pasim wok bilong em, Mista Titimur i tok.

Mista Titimur i tok bai ol wokmanmeri i nogat rot moa long tok long kisim gutpela pe, ol samting ol i mas kisim long wok bilong ol olsem haus na arapela moa. Bikos opis na pawa

ol i gat long mekim ol askim bilong ol em Gavman i rausim pinis.

Mista Titimur i tok taim Gavman i rausim ol dispela opis tu, bai olgeta wokmanmeri i nogat pawa moa aninit long lo long komplek o toktok. Ol i ken wok tasol a bos i ken rausim ol long laik na wanem ol bos i laik.

Em i tok dispela em mak na sait bilong dikteta we Gavman i laik mekim ol samting na pusim ol manmeri long mekim tasol na i no ken tok tok egens long em.

Mista Titimur i tok ol PNGTUC memba i kirap nogut long harim tu olsem Minista bilong mani, lairo Lasaro, Minista bilong Leba na Emploimen Mathias Karani na Sief ov Staf bilong Praim Minista Sir Dennis Young i tok ol i no save long dispela senis.

Bai olgeta wokas yunion insait long Mosbi i holim wanpela stop wok tude long 5 Mail graun long soim sapot na bung wantaim bilong ol egensim Gavman long dispela senis bilong rausim ol opis bilong ol.

Dispela senis long rausim sampela opis em plen bilong Gavman insait long baset long sevim mani, rausim sampela gavman opis na ol pablik sevis woka.

Long dispela Fraide, sampela biknem meri olsem memba bilong Mosbi Saut Ledi Carol Kidu, Dorothy Tekwei, Margret Loko na Ethel Gabi bai toktok long hevi na wari bilong ol we ol i luksave insait long dispela baset bilong Skate Lasaro Gavman. Ol i askim ol meri husat i laik toktok tu long ringim ol long dispela telepon namba: 3277650.

Sip bilong arapela kantri tromoi pipia long Manus solwara

VERONICA HATUTASI i raitim


OL plisman long Manus provins i bin lukim wanpela ovasis sip i bin tromoi ol 200 lita dram i go daun long biksolwara bilong Manus long las wik Trinde 11 Novemba, 1998.

Provinsel Plis Komanda Joseph Morehari i tok 12-pela plisman bilong Manus i bin kam bek long wanpela patrol long Westen ailan na i lukim wanpela sip long biksolwara namel long Lorengau na Westen ailan long taim olsem 6 na 7 kilok long nait.

Mista Morehari i tok taim ol plisman i bin go klostu, ol i lukim sip ya i gat nem 'Cape America' na ol i rejistaim long Keelong.

Bos bilong Manus plis i tok taim ol plisman i lukim dispela samting, ol i go klostu na ol i tokaut olsem ol i plisman na ol i laik sekim dispela sip. Tasol ol lain antap long sip i kirap na sutim paia flea long ol plisman olsem na ol plisman i bin kirap yusim sotgan na sut i go bek long dispela sip. Bihain long dispela nois, sip ya i kwiktaim lusim dispela hap na go olgeta insait long biksolwara na go olgeta, Inspekta Morehari i tok.

Mista Morehari i tok ol plisman bilong em i lukim dispela sip long mak olsem 015 digris latitud na 142 digris longtitut we ol man antap long sip i wok long tromoi ol 200 lita dram i go daun long solwara. Na ol i no kia wanem samting i stap insait



• Tupela dok ya i raun wantaim ol wokman bilong Ramu Bismark projek long wara Ramu long las wiken. Dispela raun em bilong traim banisim Ramu eria long ol bagarap bilong wok maining na arapela developmen. Foto: LEO YAT.

long ol dispela dram. Tasol ol i ting i mas ol strongpela pipia we i gat ol marasin nogut na posin olsem na ol lain ya i laik hait long nait na tromoi long solwara bilong PNG.

Em i tok dispela em namba wan taim ol plis long Manus i lukim wanpela sip bilong ausait kantri i tromoi ol dram long solwara bilong PNG.

Inspekta Morehari i tok ol i bin putim ripot long opis bilong Provinsel Disasta kodineta long Manus Mista Poruan Sapulai. Mista Sapulai i no stap long bekim toktok bilong Wantok.

Bos bilong Manus plis i tok em bai toksave long Disasta opis long tok oraitim ol nevi bilong PNG Patrol beis long Lombrum long ol i mas go painimaut long ol dispela

dram long solwara na lukim wanem samting tru i stap long ol.

Em i no tokaut long amas dram tru dispela sip i tromoi long solwara bikos ol i kamap long namel taim we sip i bin stap pinis na mekim dispela wok i stap.

Ol plisman i bin laik go bek long Lorengau long spitbot bihain long ol i go patrol long Westen ailan grup bilong

Manus long las wik Trinde taim ol i bungim dispela sip long solwara. Ol dispela 12-pela plisman i bin go patrol long ol hap olsem Wuvulu na Aua, Ninigo, Hermit na Anchorit ailan. Ol dispela ples i stap longwe long bikpela solwara na bikos long hevi bilong trensot, nogat patrol i save kamap tumas long ol dispela eria bilong Westen ailan.

Gavman makim K1 bilien baset

Gavman i tokaut long kamapim K2 bilien baset bilong kantri long neks yia. Dispela baset em i daun liklik long K2.4 bilien baset bilong 1998 dispela yia.

Olsem olgeta baset olgeta Gavman long bipo i save kamapim, Minista bilong Treseri na Plening lairo Lasaro i tok dispela em baset bilong ol ples manmeri.

Insait long dispela baset, Gavman i pusim planti sapot na wok helpim i go daun long distrik level we ol lokol level gavman kaunsel bai i kamap wantaim planti wok bilong mekim. Gavman i sanapim tu wanpela nupela dipatmen ol i kolim Dipatmen ov Rurel Developmen long was na karimaut olgeta wok na plen bilong Gavman aninit long dispela baset em i tro-moi i go daun long ol distrik na asples.

Tasol insait long dispela baset tu, Gavman apim takis long planti samting long sait bilong ol bisnis na kampani long ol wok na sevis we ol i kamapim.

Wanpela nupela lo Gavman i pasim long las wik em Velu Eded Takis (VAT). Dispela VAT em takis bilong ol kago, ol samting bilong bilas na ol sevis. Bai Gavman i

kisim 10 pesen (%) takis long olgeta samting stat long mun Julai long neks yia we ol mani i kamap long VAT bai mekim kamap wok na plen bilong 1999 baset.

Planti bisnis na kampani i no amamas long dispela baset bikos baset ya i givim bikpela salens long wok bilong ol long baim ol kago na saplai i kam long ovasis na arapela takis ol bai baim i go long Gavman tu.

Presiden bilong Bisnis Kaunsel long PNG, Mel Togolo i tok Bisnis Kaunsel i no amamas long dispela baset dispela i putim moa hevi i go antap long ol bisnis husat i gat pinis bikpela hevi long ol prais na kos bilong mekim bisnis hia long PNG.

Mista Togolo i tok olgeta taim Gavman i laik mekim baset em i save putim hevi i go antap long ol kampani na bisnis we long arapela kantri, ol Gavman i no save mekim olsem.

Mista Togolo i tok taim takis i go antap long ol samting, ol turangu manmeri husat bai baim ol samting i pilim hevi bilong baim bikpela kos.

Japan givim K107,500 long Kavieng Distrik wara projek

WENCESLAUS MAGUN I raitim

MOA LONG 25,000 pipel bilong 203 ples insait long 68 ailan bilong Kavieng Distrik nau bai i gat gupela wara bilong dring.

Dispela i bihainim bikpela helpim Japan i givim ol taim Siaman bilong Kavieng join distrik plening na baset komiti long Niu Ailan, Reuben Peni i sainim kontrak wantaim Ambasada bilong Japan long PNG, Yasuhide

Hayashi, aste long Mosbi.

Insait long dispela kontrak, Japan i tok promis long givim ol pipel bilong Kavieng Distrik, K107,500. Wantaim dispela mani Mista Peni i tok ol bai yusim long baim 100 tenk wara we inap kisim 1000 galon olgeta bilong ren wara. Na tu wantaim dispela mani ol bai wokim 25 hol wara bilong dring, waswas na kuk. Olgeta dispela hol wara bai i gat han pam we ol pipel i ken yusim long pulim wara long hol i kam antap na kisim.

Dispela helpim i kamap

bikos long 1997 taim bikpela san i kukim PNG, ol pipel bilong Kavieng i kisim taim stret bikos olgeta wara bilong ol bilong dring i drai na ol i no bin gat liklik wara long dring.

Pasin bilong Japan long helpim ol pipel bilong ples long kain ol helpim olsem i kam aninit long grant mani bilong Japan Gavman long helpim ol pipel bilong PNG we gavman bilong Japan i kamapim long 1989. Stat long dispela taim i kam inap tude Japan i helpim pinis 91 projek long PNG.

Skul sabsidi i stap yet long baset

NESENEL Gavman i sanap yet long lukatim skul sabsidi bilong ol skul pikinini long neks yia, 1999. Gavman i makim olsem K60 milien olgeta long dispela wok bilong skul sabsidi we Nesanel Gavman bai givim K40 milien insait long wanpela yia. Narapela K20 milien bai i kam long Provinsel Gavman.

Dispela skul sabsidi i daun liklik long sabsidi bilong dispela yia taim Praim Minista Bill Skate i makim K72 milien olgeta long olgeta komyuniti skul, vokesenel, hai skul na Nesanel hai skul insait long kantri. Nesanel Gavman i brukim K36 milien insait long tupela tem na Provinsel Gavman i brukim K36 milien long narapela tupela tem.

Dispela skul sabsidi K60 milien bai i daun long K12 milien long neks yia.

Long luksave bilong dispela yia, planti stumatin i bin baim hap fi tasol long skul fi bilong ol bikos long dispela sabsidi bilong Gavman. Sampela skul i no baim na sampela i baim liklik tasol.

Insait long 1999 baset tu, Nesanel Gavman i makim K25 milien bilong baim ol marasin we em bai saplaim long ol haus sik na klinik insait long kantri.

Minista bilong Treseri na Plening lairo Lasaro i tok praimeru edukesen wantaim rurel helt bai kisim bikpela helpim moa long dispela baset. Tasol Gavman i katim baset bilong ol bikpela skul olsem yunivesiti na ol bikpela koles long balensim gut ol kos bilong edministresen na ol digri program long ol yunivesiti insait long kantri.

Mentenens bilong lo na oda bai kisim bikpela sapot na helpim yet long Gavman.

Mista Lasaro i tok Gavman i wok strong long daunim ol hevi bilong raskel pasin long dispela yia. Olsem na em i wok nau long kamapim gut program bilong muvum wok bilong strongim ol plisman i go long sait bilong stapim raskel na bikhet pasin na mekim ol komyuniti manmeri yet i stap insait long dispela wok bilong karimaut lo na oda insait long komyuniti na kantri olgeta.

Nupela lo bilong plis we palamen i pasim long dispela yia bai givim moa pawa na strong long ol lain i go pas long karimaut wok bilong lo na pait egensim ol bikhet na raskel pasin, Minista Lasaro i tok.

Minista i tok Difens Fos bai i gat nupela eria bilong mekim wok tu. Wantaim Bogenvil nau wok bilong bungim ol pipel na stretim ol ples we i bagarap, Difens Fos bai mekim ol dispela wok bilong stretim ol rot na bris, haus na ol arapela wok tu long arapela hap bilong provins aninit long Sivik Eksen Program. Bai sampela wok bilong em i go olsem bisnis we em bai kisim mani long helpim wok bilong em na strongim baset bilong Difens Fos we i daun insait long 1999 baset, Mista Lasaro i tok.

Bai palamen i bung long neks wik long tok-tok moa long dispela baset na holim vot long en. Taim ol i vot na pasim baset, bai Gavman bilong Bill Skate i brukim K2 bilien nesanel baset bilong kantri bilong neks yia, 1999.

Moa baset ripot long pes 8-9

Opposisen tok 1999 baset i no bilong ol pipel

OL oposisen memba i tokaut strong olsem 1999 baset gavman i givim em baset bilong givim moa mani i go long ol MP na i no baset bilong helpim ol plesman na meri:

Deputi oposisen lida na lida bilong Pangu Pati, Chris Haiveta i autim dispela tingting bihain long Deputi Praim Minista na Tresera lairo Lasaro i putim aut baset long palamen long Mande.

"Gavman i nogat bilip long ol provinsel gavman na ol provinsel gavana. Dispela baset bai bringim moa tok baksait long mipela ol memba taim gavman i brukim K139 milien long wanpela dipatmen ol i kolim Rural Developmen Dipatmen.

"Dispela dipatmen i nogat gupela mak long wok bihainim. Em wanpela tewel dipatmen. K139 milien em bikpela mani, na taim gavman i abrusim ol provinsel gavman.

Em i tok olsem wok bai go stret long ol memba, tasol kontrol bai stap yet long Waigani wantaim Minista," Mista Haiveta i tok.

Tasol Mista Haiveta i tok amamas tu long gavman long tok stret long ol polisi bilong em.

"Mi gat amamas long gavman long tok stret long wanem polisi em i gat long taim em i kisim pawa i kam inap nau," Mista Haiveta i tok.

Em i tok olsem long las 15 na 16 mun gavman i no tokaut long ol polisi bilong em na wok long paol nambaut.

Tasol long dispela baset, ol polisi bilong gavman i kamap stret na bai givim sans long oposisen long givim sampela gupela helpim long stretim gut ol polisi bilong gupela sindaun bilong ol pipel.

Mista Haiveta i toktok tu long K70 milien publiik sekta rifom program bilong gavman. Em i tok olsem dispela program bai katim moa long 7000 publiik seven.

Em i askim long wanem taim stret gavman i tingting long mekim dispela program.

Gavana bilong Sandaun provins, John Tekwie i autim belhevi bilong em long dispela baset na tok olsem em i no amamas long gavman i abrusim ol provinsel gavman na givim moni stret i go long ol memba.

Em i tok orait long baset i luksave long strongim wok bilong ol manmeri long ples, tasol em i tok i gat promis i stap na ol wok i stap insait long baset pinis. Tasol ol manmeri bai kisim olgeta long dispela mani bilong ol program o nogat?

Memba bilong Mosbi Saut, Lady Carol Kidu i toktok strong na askim bilong wanem

gavman i kolim dispela baset olsem baset bilong ol grasruts taim i nogat wanpela mani i go long sait bilong ol vokesenel skul bilong helpim ol manmeri long ol rurel eria.

Em i tok olsem planti long ol manmeri long kantri i save stap long ples na ol vokesenel skul i save helpim stret ol. Tasol em i no lukim wanpela mani long baset long helpim dispela sait long edukesen.

Memba bilong Markham, Andrew Baing i tokim ol ripota olsem dispela baset em baset bilong ol bikman tasol na i no bilong ol ples manmeri.

"Dispela baset em baset bilong ol bikman tasol. Dispela baset em baset bilong ol memba na ol kain lain olsem Donigi na Hamidian-Rad," em i tok.

Oposisen bai givim tok bekim bilong em long neks Tunde, Novemba 24.



WANTOK

NIUSPEPA BILONG OL PAPUA NIUGINI

VAT i no gutpela long ol grasrut

OL lida bilong Papua Niugini husat i vot long pasim Veliu Eded Takis o VAT insait long palamen i nogat sori long ol grasrut pipel husat i votim ol i go long palamen.

Bipo long ol i hapim strong bilong Kina, na daunim ol prais i dia tumas pinis long ol stoa na ol arapela sevis, ol i go het long tok orait long VAT.

VAT em i wanpela gutpela rot bilong Gavman long kisim takis long olgeta pipel bilong kantri na i no ol wokman husat i save kisim pe na i save baim takis i go long gavman na tu long ol bisnis haus tasol.

VAT em i gutpela rot bilong gavman long kisim mani. Tasol taim bilong tok orait long VAT long Papua Niugini em i no stret. Tude nogat planti pipel bilong PNG i gat inap mani long poket. Ol pipel long ples i nogat gutpela rot, bris, ples balus na sip bilong karim ol kaikai i go long maket na salim na kisim mani. Planti pipel i nogat gutpela save bilong ronim bisnis, kirapim ol agrikalisa projek na lukautim ol yet, narapela na salim prodak bilong ol bilong kisim mani.

Gavman bai stat long kisim VAT stat long mun Julai 1, 1999. Dispela i min olsem ol pipel long ples husat i krai long sevis nau i mas krai moa yet long painim mani long baim takis bilong VAT.

VAT bai helpim ol bisnis haus husat i gat bak stoa, liklik ol stoa bikos ol bai baim VAT takis i go long Nesenel Gavman na bihain gavman bai bekim takis bilong ol. Moa yet ol dispela bisnis haus bai putim mak ap prais long olgeta kago na sevis bilong kisim bek 10 pesen VAT takis bilong ol.

Tasol ol lain husat bai karim bikipela pen tru em ol pipel long ples. Ol pipel bilong ples i mas painim mani na baim prais bilong ol kago na sevis we ol bisnis lain bai putim 10 pesen takis antap long ol samting ol i salim.

Bogenvil na Niugini Ailans nius wantaim VERONICA HATUTASI

Minista Akoitai strongim ol paif grup long sekan na kamapim bel isi

BOGENVIL Afeas Minista Sam Akoitai i singaut long ol wanwan grup long Bogenvil long kamapim sekan na bel isi pasin namel long ol.

Minista i bin mekim dispela singaut bihain taim em i witesim wanpela bel isi.pasin long Wakunai eria las wik.

Long dispela seremoni, ol pipel bilong foapela ples olsem Rotokas, Kakarapaia, Asitavi, Aita na Ipa i bin bung long seremoni bilong kamapim bel isi na sekan pasin namel long ol pipel bilong ol.

namel long yia 1992 na 1994, i bin gat bikipela birua, bel kros na pait namel long ol grup long ol dispela ples.

Tripela Bogenvil nesenel memba em long Minista yet, Not Bogenvil memba Michael Ogio na Saut Bogenvil memba Michael Laimo i bin witesim dispela seremoni. Spesel Stet Negosieta long Bogenvil Sir John Kaputin, Primia

Gerard Sinato na BRA/BIG lida Joseph Kabui i bin stap tu long dispela seremoni.

Ol BRA na ol resistens lain i bin tok sori long ol samting we ol i bin wokim long taim bilong hevi tasol ol bin tok strong long wokbung wantaim nau long kamapim gutpela sindaun bek long ailan.

Minista Akoitai i bin tokim ol BRA long luksave long ol sief na givim pawa i go long ol bilong lukautim ol pipel bilong ples bikos sapos nogat, hevi bai i stap yet insait long komyuniti, ol famili na hauslain na provins.

Em bin tok sapos sekan na bel isi pasin i kamap, ol sevis olsem helt na edukesen bai i go gut.

Mista Kabui i bin tok em i luksave olsem em i gat bikipela wok long kamapim bek gutpela sindaun na long wankain taim tu, em bin tok amamas long ol pipel husat i hatwok long stretim ples na kamapim gutpela sindaun long ailan.

BRA/BIG egensim Nu Silan na PNG ami mekim wok

BOGENVIL Interim Gavman i no laikim tingting bilong ami long Nu Silan na PNG i karimaut ol wok long stretim ol rot, bris na ol kain wok olsem long ailan.

Ol ripot i tok Seketeri bilong BIG Martin Miriori long wanpela pas em i salim i kam long kantri Holan i tok plen long salim ol ami bilong tupela kantri em ol no mekim bihainim pasin bilong toktok wantaim olgeta grup na pasim toktok na wanbel long en olsem i stap aninit long Lincoln Agrimen.

Mista Miriori i tok BRA/BIG na Bogenvil Trengisenel Gavman i no bin kisim toksave olsem dispela samting i kamap na em i no amamas long em.

Em i tok wok bilong Provinsel Pis Konsaltativ Komiti long harim wanem ol wok bai i kamap na bihain tromoi i go long ol wan wan grup husat i stap insait long wok bilong painim gutpela sindaun long givim tingting bilong ol na wanbel long en.

Mista Miriori i tok long wokim ol samting long ples klia na i no long hait pasin, olgeta kantri husat i gat ol memba bilong ol long Pis Monitering Grup i mas wok gut na i no ken wokim wansait pasin o sapatim wanpela grup long dispela hevi long Bogenvil bikos dispela bai i bagarapim nem, luksave na wok bilong ol.

WANTOK

NIUSPEPA BILONG YUMI OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA
YIA 52 NIUSPEPA

PLES	AIR
Arapela PNG eria	K 52
Ostrelia na Nu Silan	K84 (\$US46)
Esia Pasifik na Japan	K99 (\$US55)
Amerika na Yurop	K172 (\$US95)



Ol pikinini Manus i gat stail!

• Ol pikinini Manus i no isis long wokim tumbuna danis bilong ol long wanpela kalsarel de. Dispela wiken bai i gat wanpela kalsa de olsem bai kamap long Se John Guise stedium long Mosbi. Go lukim ol kainkain singsing, danis na bilas bilong yumi yet.

Kavieng distrik kot rausim kot bilong Ling-Stuckey

DISTRIK kot long Kavieng i bin rausim kot bilong Pablik Sevis Minista na memba bilong Kavieng, lan Ling-Stuckey long las wik Trinde bikos i no bin gat inap wites na evidens long en.

Ripot i kam long opis bilong PPC long Kavieng i tok plis i bin holim pasim foapela man husat bihain Mista Ling-Stuckey i putim komplem olsem ol i bin mekim nabaut long meri na famili bilong em long Lemus Ailan long dispela yia.

Bihainim dispela samting, plis i bin sasim Minista long wokim nabaut na paiarim gan long foapela man. Em bin sanap long Kavieng Distrik kot long las mun tasol em i no kisim wanpela bikipela sas long en. Tasol Mista Ling-Stuckey i bin komplem olsem ol plis i no wokim gutpela pasin bilong i no sasim ol trabel man husat i wokim nabaut long famili bilong em.

Bihain long dispela, plis i bin holim pasim foapela man tasol bikos i nogat inap evidens na wites, ol i rausim dispela sas.

Long ol arapela nius long provins, moa long 5,000 yangpela Katolik pipel i bin bung long Kavieng Katolik peris Sioz na holim wanpela wok rilijes reli bilong ol. Sinia Konstebol Paul Naen i tok ol yangpela na ol lida bilong ol grup insait long Niugini Ailans provins olsem Is na Wes Nu Britien. Manus, Bogenvil na Kavieng i bin bugn wantaim na karimaut wanpela gutpela rilijes pis reli long wanpela wik. Sampela i bin kam tu long ol peris insait

Wokbung kamapim gutpela sindaun long Manus

GUTPELA wok bung namel long plis na komyuniti i mekim sindaun long Manus provins i go gut tasol.

Provinsel Plis Komanda Joseph Morehari taim em i amamas i tok pasin bilong ol pipel insait long komyuniti na ples i senis long kamapim ol gutpela samting long laip na sindaun i go gut.

Em i tok bihain long bikipela wol pul resis long Manus las mun, provins i stap isi wantaim nogat meknais.

Em i tok ol plis i wok nau wantaim ol lida, ol pis opisa na komyuniti long daunim ol wari na hevi insait long ples. Na ol bikman i save skelim na glasim ol hevi sapos ol i lukim olsem hevi i stu long pasin kastam, ol i putim i go long han bilong ol ples sief na bikman. Taim ol hevi i bikipela, ol i lusim long han bilong ol plis na kot long stretim.

Inspekta Morehari i tok wanpela samting we i helpim kamapim gutpela wok bung namel long plis na komyuniti em ol aweanes progrem we ol bin karimaut long provins long dispela yia na we ol bai i karimaut gen ol bihain long Krismas.

Em i tok bihain long bikipela wol pul resis long Manus las mun, ples i stap isi taso' na nogat meknais i kamap.

BIAZ TUPELA DOK PAIT ARERE LONG HAUS BILONG BIABIA NA MEKIM BIKPELA NOIS TRU...

EM KIRAP KISIM BRUM NA GO AUT SAIT LONG RAUSIM OL DOK...

OL I BAGARAPIM SILIP BILONG BIABIA NA BELHAT NOGUT TRU...

OL DOK I BELHAT NA RAUNIM BIABIA... BAGA NOGUT RAUNIM HAUS NA SOTWIN STRET...

Namba wan wokabaut bilong Dr Kigasung i go long Manus

KEVIN BANA i raitim

HET BISOP bilong Evanjelikal Lutheran Sios bilong Papua Niugini, Dokta Wesley Kigasung i tokim ol lokol lida na memba bilong Lutheran Sios long Manus long wok klostu tru wantaim ELCPNG bilong Karkar distrik.

Het Bisop Kigasung wantaim deligesen bilong em i go long Manus long luksave long ol Kristen memba long Manus i stap olsem wanem na wanem kain hevi ol i gat long wok misin.

Em i tok Manus em wok misin eria bilong Karkar Distrik. Em i tok ELCPNG bilong Karkar distrik i stap strong na wok bung wantaim ELCPNG Nesenol Sios.

Bisop Kigasung i tok moa olsem, ELC Manus em i wok misin eria yet olsem na olgeta lida na ol ful Kristen memba i mas wok bung wantaim na mekim sios bilong Krai Jisas i gro bikipela.

Long Lesau kongrigesen, Bisop Kigasung wantaim Reveren Terry Isan

bilong ELCPNG het opis na Reveren Bagg Gubag, presiden bilong Karkar distrik i bin go pas long wok sakramen. Ol i givim baptais na konfirmasen long 13-pela yangpela manmeri na pikinini.

Ol i skurim wok long givim Holi Komunio. Dispela em i namba wan taim tru long kain wok sakramen olsem i bin kamap long asples kongrigesen.

Long dispela wokabaut Bisop Kigasung i bin gat bikipela sans na amama long go lukim ol Kristen memba long Lorengau taun, Lombrum Nevol bes na ol asples kongrigesen.

Bisop Kigasung i tenkim Sios long Manus na Yunaited Sios long wok gut wantaim . Long Lorengau taun, Yunaited Sios i save yusim wanpela haus lotu wantaim ol Lutheran Sios memba.

Ol lain husat i bin go wantaim Het Bisop Kigasung, em Reveren Terry Tsan long Kristen Edukesen opis long het opis, Larry Wara long Fainens opis bilong het opis wantaim presiden bilong Karkar distrik, Reveren Bagg Gubag.

Barter askim Gavman long sapatim Danip Agrikalsa Skul

MADELEINE AREK i raitim

GAVMAN bilong Papua Niugini i mas sapatim St Benedik Agrikalsa Trening Senta long Danip insait long Madang Provins bikos nau long dispela taim Gavman i wok long painim hat tru long senisim edukesen sistem long kantri bai i ken luksave long agrikalsa, wanpela samting we i strongim tru kantri na planti ol pipol bilong en. Olpela riji-nol memba bilong Madang, Peter Barter i tok long opening bilong St Benedik Agrikalsa Trening Senta, long las wik sarere long Danip.

Mista Barter i tok, aninit long edukesen sistem bilong St Benedik Agrikalsa Trening Senta, planti ol gred ten sumatin husat i lusim skul na i no inap painim wok na i stap nating long taun i ken go bek long ples na wokim ol liklik samting long kirapim ol komyuniti bilong ol.

Em i tok, St Benedik Agrikalsa Trening Senta i luksave long dispela bikipela hevi ol skul liva bilong PNG i wok long bungim na i laik helpim ol dispela lain long wokim sampela gutpela samting wantaim save bilong ol, bai ol i ken helpim ol famili bilong ol, ol lain long ples na ol narapela lain tu.

Ol sumatin husat i pinis long Danip, bai go bek long ol ples bilong ol wantaim gutpela save bilong planim ol kainkain kaikai bilong kaikai na salim long maket. Dispela bai helpim ol pipol long gat sans long kaikai ol kainkain kaikai na stapim ol sik olsem malnutrisen na ol narapela kain sik i save kamap taim man i no kaikai gut, Mista

Barter i tok.

Em i tok ol sumatin bilong Danip bai i no inap lain long planim gaden kaikai tasol. Ol bai lain tu long lukautim pik, kakaruk, kau na rabbit.

Em i tok, St Benedik Agrikalsa Skul i kamap bikos long helpim bilong planti lain. Yuropian Komuniti i givim K275,000 Gavman bilong Keneda i givim K27,000 Misereor i givim K205,660 Asdaiosis Komuniti Developmen Program na wol Benk i givim K38,224 na Asdaiosis bilong Madang i givim K267,348. Dispela olgeta helpim klostu i kamap K1million we Madang Katolik Asdaiosis i yusim long kirapim St Benedik Agrikalsa Trening Senta.

Mista Barter i tok dispela projek em i namba wan projek long kantri na i luk olsem bai i helpim gut tru ol pipol bilong Madang. Em i askim tu ol arapela provins long bihainim dispela edukesen sistem.

Madang Provinsel Gavman givim K15,000 long Nobonob Komuniti Skul - Opening long Sarere

PAULUS TALI i raitim

NOBONOB komuniti skul divisen bilong Evanjelikal Lutheran Sios long Madang Provins bai opim nupela Dabol Klasrum dispela wik Sarere Novemba 21.

Het Tisa bilong Nobonob skul, Peter Sivi i tok Nobonob komuniti skul em Lutheran ejensi skul tasol Lutheran Edukesen Divisen bilong ELCPNG Madang distrik i no bin lukluk long en. Olsem na Edukesen Dipatmen bilong Madang Provinsel

Gavman i lukluk long ol hevi bilong skul na pinisim olgeta wok. Siaman bilong Nobonob Komuniti Skul, Kapan Yatibun i tenkim Edukesen Divisen bilong Madang Provinsel Gavman long givim ol K15,000 bilong wokim nupela dabol klasrum. Em i tenkim tu Lutheran Developmen Sevis long helpim skul wantaim ol arapela meteriel bilong wokim dispela dabol klasrum.

Ol bikman husat bai kamap long dispela bung em Madang Open Memba, Jacob Wama, Madang Edukesen Distrik Program Menesa,

Simon Simoi, Madang Distrik Edministreta, George Chapok, na

ELC Madang Distrik Edukesen Seketeri, Jon Kim. ELC Madang Distrik Presiden, Rev Francis Ambuk inap opim dispela klasrum wantaim prea tasol em i no inap i stap. Em bai i go long Lutheran Sios Kaunsel bung long Ampo, Lae. Na olsem narapela pasto bai kisim ples bilong em.

Bai i gat kainkain pilai, drama, na singsing tumbuna wantaim ol string ben na laip ben musik.

Eks sevisman bungim ami bilong narapela kantri long Vanimo bus

FELIX RAMRAM i raitim

WANPELA eks sevisman insait long Papua Niugini ami i bungim sevenpela ami bilong narapela kantri samting olsem 30 kilomita ls insait long bik bus longwe long Vanimo taun.

Dispela eks sevisman husat i no laik tokaut long nem bilong em i tok long namba tri wik bilong mun Oktoba em yet i bungim na toktok wantaim ol dispela ami. Em i tok ol dispela ami i tokim em olsem ol i "Jalan Jalan" na i min

olsem ol i raun raun tasol-long go long Aitape.

Em i go het na i tokim Wantok olsem em i luksave long wanpela bilong ol dispela sevenpela man na em i bilong Yurop bikos em i mekim sampela toktok long tok Ingliis. Narapela tripela em ol Asia man na ol arapela tripela man em ol bilak skin man.

Dispela eks sevisman i pret tru long lukim ol dispela ami na i sutim tok long Gavman bilong PNG long i no glasim ol hevi bilong boda.

Mausman bilong Boda Afeas long Vanomo, Moses Poi i tokim Wantok olsem ol i no lukim sampela ripot yet long dispela samting inap nau. Tasol em i tok ol bai bihainim dispela ripot na karim aut moa wok painim aut.

Mista Poi i tok tu olsem i gat planti lain bilong Jayapura i wok long kam insait long PNG na painim wanpela kain smel diwai. Em i go het na i tok ol i holim pas pinis sampela bilong ol dispela lain na salim ol i go bek long Jayapura.

Gavman i no givim namba wan praioriti long Agrikalsa sekta Minista Masani i tok

WENCESLAUS MAGUN i raitim

STRONG bilong mani bilong Papua Niugini o ekonomik sekta bilong kantri i pundaun bikos Gavman i putim liklik praioriti long Agrikalsa sekta o wok didiman.

Dispela em wanpela strongpela toktok Minista bilong Agrikalsa, Tukape Masani i tokaut taim em i opim St Benedik Agrikalsa Trening Senta long Madang long Sarere Novemba 14 long Danip, insait long Alexishafen peris bilong Madang Asdaiosis.

Mista Masani i tok Gavman i putim moa praioriti long maining sekta o ol bikipela kampani bilong kisim kopa, gol, wel, na ol arapela minerel long Papua Niugini stat long Independens i kam inap tude.

Em i tok tu olsem Gavman i no inap bringim gutpela sevis bilong wok didiman i go long ol ples insait long wan wan provins bikos Nesenel Gavman na ol Provinsel Gavman i no save wok bung.



Sampela ol sumatin bilong St Benedik Agrikalsa Trening Senta i wokim ol gaden projek bilong ol.

Mista Masani i tok nau yet gavman i wok long painim gutpela rot bilong lukautim laip bilong ol pipel insait long wok didiman. Tasol em i tok dispela em i hat bikos i nogat ol ekstensen sevis.

Em i tok Dipatmen bilong Agrikalsa i no wok bung wantaim ol pipel. Na i nogat Nesenel na Provinsel Gavman komitmen long helpim ol pipol bilong ples.

Em i tok skul bilong St Benedik

Agrikalsa Trening Senta bai stap olsem wanpela model o piksa we Gavman i mas lukim na binainim.

"Insait long 10 o 20 yia taim Madang bai stap olsem wanpela provins i go pas long wok agrikalsa bikos Madang Provins i gat gutpela graun. Tasol praioriti bilong gavman i mas stret long lukim dispela i kamap," Mista Masani i tok.

Em i hop Madang Provinsel Gavman bai yusim gut ol rises stesen o ples we ol saveman bilong wok didiman i save mekim wok painim long kakau, kokonas na ol arapela wok didiman olsem long Murunas long helpim ol fama bilong Madang.

Mista Masani i tok tu olsem Madang i gat ples bilong rais developmen na em i amamas long lukim olsem silabus bilong St Benedik Agrikalsa Trening Senta i soim olsem ol treni bilong dispela skul bai kisim skul bilong planim rais.

WANTED: "THE TIKTOK GANG"

3 NEW TASTY FLAVOURS ON THE RUN

Icecream Lollypop Bubblegum

REWARD: "GREAT TASTING BISCUIT"

Pater Gregori tokim ol sumatin bilong St Benedik Koles long beten na wok

WENCESLAUS
MAGUN i raitim

OL SUMATIN bilong nupela St Benedik Agrikalsa Trening Senta long Danip i kisim skul olsem ol i mas beten na wok sapos ol i laik lukim gutpela kaikai bilong wok bilong ol.

Vika Jenerel bilong Madang Asdaiosis, Pater Gregori Tiani i tokim samting olsem 40 sumatin bilong Danip Agrikalsa Koles, tripela tisa bilong ol na moa long wan hundred pipel dispela skul tok insait long Misa bilong opim dispela skul long Sarere Novemba 14 long Danip, long Alexishafen peris insait long Madang Provins.

Em i tok: "Wok em bilong man, na i no man bilong wok. Olgeta manmeri na pikinini i mas kisim gutpela kaikai long hat wok bilong ol bilong lukautim laip bilong ol yet, famili bilong ol na lukautim tu ol arapela pipel insait long komuniti."



• St Benedik Agrikalsa Trening Senta Menesa, Elisabeth Rangan Tatak, 29 bilong Toma long Is Niu Briten Provins i sanap wantaim ol Sariti Sista, taim ol i go lukluk raun long koles.

Yumi laik sanap klostu long ol bikman

SAPOS yumi bin sanap o toktok o sekan wantaim wampela bikpela man o meri i gat namba, dispela i givim namba long yumi tu. Yumi save amamas tru long tok: "Mi sekyuriti bilong praim minista," o "Mi mama bilong bisop," o "Bikbrata bilong mi em i wampela pilot long Air Niugini," o "Mi bin sekan wantaim kwin."

Ol dispela tok o wok bilong mi i bin bungim mi wantaim man o meri i gat namba...olsem na yet mi kisim hap namba bilong ol. Mi no moa man o meri nating. Maski ol pipel i no save long mi olgeta, sapos ol i lukim mi sanap long raithan bilong praim minista, ol bai tingting planti; ol i litimapim mi long tingting bilong ol.


Long wankain we yumi olgeta Kristen i mas kisim namba bikos yumi sanap klostu long Krai. Yu tingim Pita na Endru na Jems na Jon...ol i man nating bilong wampela liklik taun. Tasol Jisas i bin kam insait long laip bilong ol, ol i bin sanap klostu long Jisas na wok wantaim em...na tude planti milien pipel long graun i save gut long ol. Matyu na Sakias na Judas yet i bin kisim namba bikos Jisas i bin kam insait long laip bilong ol.

Sapos yumi sanap wantaim Krai na bihainim lek bilong em, bai God i no lukim yumi nating...em i lukim yumi sanap wantaim Jisas...na em i belgut long mitupela wantaim.

Sampela famili i bin senis olgeta bikos ol i bin joinim wok bilong Krai. Mi ting nau long wampela famili long kantri Frans. Long dispela famili i gat 11-pela pikinini. Orait, tripela boi na tripela meri i bin kamap sista na brata...ol i bin givim laip bilong ol long God. Olgeta sikispela i kamap santu na i kisim nem na i kisim namba insait long sios. Na ol arapela 5-pela bratasusa bilong ol...ol i go nabaut long wok bilong ol...na nem na namba bilong ol i lus olgeta; tude man i no save olgeta long nem bilong ol. Yu lukim: ol brata ya i bin sanap klostu long Jisas ol i bin win; na ol arapela, nogat.

Ol yangpela boi na meri tude i wok long painim poroman husat i ken givim stia long laip bilong ol. Ol i no save yet ol i laik mekim

TU MINIT TINGTING



FRANK MIHALIC i raitim

wanem samting. Watpo sampela i no laik joinim wok bilong God? Tude mi save long 10-pela man na meri i gat biknem na biknamba insait long wok bilong God. Na ol bratasusa bilong ol i bin stap bek long ples, tude ol i manmeri i no gat nem na namba.

Ol papamama i lukim tingting bilong wan wan pikinini bilong ol i go long joinim wok bilong God, ol i mas amamas. Bikos God i makim wampela pikinini bilong tupela, God i onaim tupela. Sapos ol i givim boi o meri bilong ol long God, ating long wampela de ol i ken amamas na tokaut olsem: "Mitupela i papamama bilong dispela man o meri."

Mi ting nau long wampela lapun meri Tolai. Maski yumi no save long nem bilong em. Tasol sapos mi tokim yu nau: "Em mama bilong Bisop ToVarpin bilong Madang" nau lapun mama i gat namba long ai bilong yu...na em i kisim dispela namba we? Em i kisim long pikinini bilong em Benedik, husat em i bin givim long wok bilong God long taim em i manki yet.

Yu lukim, olsem mi bin tok long bigin bilong dispela stori, yumi save kisim biknem na biknamba long ol nambaman na nambameri i stap klostu long yumi. God i bekim long yumi olsem tasol. Papamama husat i givim sampela pikinini long wok bilong God, ol i no ken lus. Ol bai win...

Yumi Kristen i gat wanem wok?

MI BILIP olsem namba wan wok bilong yumi ol Kristen em long bihainim stret ol toktok, skul, pasin na laip bilong Jisas.

Pasin bilong tok resis o tok pait namel long ol sios em i no bihainim pasin bilong Jisas. Pasin bilong daunim ol arapela na tok olsem ol i stap yet long tudak na mipela yet i save long rot em i no pasin bilong Jisas.

Jisas em i God na God bilong yumi em i God bilong laikim olgeta samting na olgeta manmeri maski ol i gat wanem kain kala bilong skin, maski ol i gat wanem kain pasin bilip, na maski ol i stretpela manmeri o ol i sinmanmeri.

Yes mi bilip olsem namba wan wok bilong yumi ol Kristen em long bihainim stret Jisas Krai na laikim olgeta manmeri na olgeta samting olsem em yet i mekim. Mi laik serim laip stori bilong Pasto Kongie Kiawe na mama Dekpe Kongie bikos mi bilip olsem laip stori bilong tupela i ken helpim yumi long bihainim Jisas moa klostu.

Pasto Kongie Kiawe i ting mama bilong em i bin karim em long 1929. Long 1934, sampela Luteran wokman bilong nambis (Finschafen) i bin bringim tok bilong God i go insait long Jimi.

Taim wol woa tu pait i bin kamap, ol dispela wokman bilong Sios i go bek long asples bilong ol. Tasol long 1947, bihain long pait i pinis, ol wokman bilong Sios i go bek long Jimi, na bihain liklik, papa Kongie i go skul (lainim rit na rait na tok bilong God) long Kerowagi long Simbu.

Long 1953, papa Kongie i go skul wampela mun tasol long Raipinka na bihain Luteran Sios i opim nupela skul long Rintebe. Em i go bek long Kol (Jimi) na mekim wok olsem wampela wokman bilong sios. Papa Kongie i wokim wampela klasrum na skulim ol pikinini long tok Pisin na sampela isipela hap tok Inglis na tok bilong God tu.

Long 1960, papa Kongie wantaim meri bilong em mama Dekpe tupela i marit. Long 1962 i go inap 1964 em wantaim meri bilong em i go long skul pasto long Logaweng (Finsafen).

Long 1964 ol hetman bilong Sios long Kol seket i salim em i go wok olsem pasto long Olpo peris.

Na long 1967, Sios i salim em i go wok olsem tisa long Ogelbeng seminari long Hagen. Papa Kongie i mekim dispela wok inap 17 yia olgeta.

Long 1984, Pasto Kongie wantaim famili bilong em i lusim Ogelben seminari na i go bek long Kol seket. Tude em i 12-pela yia olgeta bilong Pasto Kongie i holim wok olsem het pasto o presiden bilong Kol seket.

Pasto Kongie i tok long yia 2000 bai em i pinis olsem seket presiden maski ol pipel i laikim em long stap yet. Nau yet meri bilong em mama Dekpe i wok olsem presi-

den bilong olgeta hetmeri insait long Kol seket.

Wok bilong ol mama (hetmeri na wokmeri) insait long Kol seket i ron gut tru aninit long lukaut bilong mama Dekpe bikos em yet em i wampela strongpela meri tru maski em i lapun (i gat moa long 60 Krismas). Olgeta manmeri insait long Kol seket i kolim tupela "papa na mama" bikos tru tumas tupela i lukautim olgeta pipel long seket olsem pikinini bilong tupela stret.

Pasto Kongie wantaim meri bilong em tupela i gat faipela pikinini. Foapela pikinini meri na wampela pikinini man.

Yumi bihainim Jisas olsem wanem?

...Mi bungim God long Jimi

LEO YAT i raitim

Nek bilong wampela lapun mama i singaut strong tru: "Aya, ol pikinini bilong mi o...Yupela kam insait. Kam..Kam!"

Dispela samting i bin kamap long moning bilong Mande Februari 1997, taim mi wantaim tripela arapela wan

wok bilong mi i bin sanap ausait long haus bilong het pasto o presiden bilong Kol seket insait long Jiwaka distrik bilong Evanjelikel Luteran Sios bilong Papua Niugini.

Mipela foapela i save wok ananit long wampela projek bilong Papua Niugini Dipatmen bilong Envaironmen na Konsevesen, na ples bilong wok bilong mipela em

insait long ol bus ples long Apa Jimi na Ramu veli.

Kol seket em i karamapim Apa Jimi eria bilong Westen Hailens Provins na sampela hap bilong Apa Ramu distrik bilong Madang Provins. Na dispela nek mipela i bin harim long dispela moning em i nek bilong mama Dekpe Kongie, meri bilong Pasto Kongie Kiawe husat i stap nau



• Sampela ol Kristen pipel bilong Jimi i welkamim ol wokmanmeri bilong Ramu Bismak projek, aninit long Dipatmen bilong Envaironmen na Konsevesen wantaim wampela bikpela mumu kaikai. Dispela em sampela ol pasin Leo Yat i lukim na bilip God i stap wantaim ol pipel bilong Jimi.

yet olsem presiden bilong ELCPNG Kol seket.

Long foapela bilong mipela, dispela em i nambawan taim tru long kurungutim graun bilong Jimi olsem na mipela i pret na kisim kainkain tingting i stap, tasol taim mipela i harim nek bilong lapun mama, tingting bilong mipela i senis olgeta.

Taim mi harim nek bilong mama Dekpe, pret tingting bilong mi i pinis wantu. Wampela tingting i kamap long mi: "Yes i luk olsem i gat gutpela lain manmeri insait long Luteran Sios tu ya!"

Nau taim mi lukluk bek, mi ken tok olsem mi bin bungim God long Jimi taim mi bung na wok wantaim planti gutpela pasto, wokmanmeri na planti gutpela pipel bilong Luteran na tu ol arapela brata Kristen Sios insait long Jimi, kain olsem Evanjelikel Bradahud Sios, Seven De Adventis, Asembli Ov God na Nasarin Sios.

Planti taim i gat toktok i go raun olsem ol hailens i no gutpela lain, bikos ol i save bagarapim na kilim nating ol arapela pipel. Tasol mi ken tok olsem ol kain toktok i no tru bikos mi bin bung na wok wantaim planti gutpela pipel bilong hailens long laip bilong mi.

Na long Jimi, mi mas tok olsem klostu olgeta pipel long Jimi ol i gutpela lain. Mi bin stat wok wantaim ol pipel long bus ples bilong Apa Jimi stat long Februari 1997 i kam inap nau na mi bilip strong olsem God papa i blesim tru ol pipel long hap na em i stap wantaim ol oltaim.

Bosim gut laip marit bilong yumi

LAIP marit bilong yumi manmeri bilong PNG em i bikpela samting. Yumi mas bosim gut dispela samting na laip bilong yumi i ken i stap gut na bai ol pikinini yumi karim ol i ken kisim blesing na kantri i ken i stap gut na bai i gat blesing long en.

I gat planti hevi i stap long laip marit bilong yumi olsem na yumi i gat kain kain hevi i daunim na bagarapim sindaun bilong yumi na ol pikinini bilong yumi na tu insait long kantri bilong yumi.

Laip marit em i no nupela samting yumi kamapim nau tasol. Nogat. Em i samting i kam yet long ol tumbuna bilong yumi long bipo. Na yumi tu i bihainim dispela pasin i kam inap nau. Sampela pasin na rot bilong laip marit bilong yumi i senis na dispela senis tu i bringim sampela hevi i kamap long famili bilong yumi long PNG.

Mi bai kamapim sampela hevi mi lukim long laip bilong yumi na putim sampela tingting long dispela pepa bilong yumi skelim.

Pasin na rot bilong laip marit bilong tumbuna bipo em i narakain long tude. Long sampela hap bilong PNG, sampela pasin bilong laip marit bilong tumbuna bipo i stap yet, em long ples insait long bus. Na long bik taun na siti, pasin na rot bilong laip marit i senis. Dispela ol senis long laip marit i kamapim sampela hevi long famili bilong yumi na long sampela famili. Dispela senis tu long laip marit i gutpela na i gat blesing.

Pasin bilong laip marit i senis olsem wanem?

Long sampela hap bilong PNG pasin tru bilong pasim laip marit long wanpela man na wanpela meri em i samting bilong famili o hauslain na i no bilong wanwan man o meri long bihainim laik bilong tupela yet na marit. Nogat. Pastaim, mamapapa na kandere bilong man i mas wanbel wantaim famili bilong wanpela meri na olgeta i mas wanbel na bihain laip marit i ken kamap long tupela.

Long dispela rot i gat bikpela rispek long tupela marit na famili bilong tupela na gutpela pasin i save i stap namel long ol dispela ol famili na hauslain.

Taim ol pikinini bilong tupela i kamap ol i save groa bikpela insait long kain gutpela pasin we i gat rispek na wanbel i stap strong namel long tupela marit yet o long famili o hauslain bilong tupela. Dispela gutpela pasin tumbuna i stap yet long PNG na long sampela dispela i wok long senis.

Sampela senis long pasin bilong laip marit i kamapim hevi long ol pikinini na long sampela i no gat hevi. TOK PIKSA: Wanpela taim, wanpela evanselis i singautim mi long mi go na bungim ol 12-pela yangpela man husat i kolim ol yet olsem raskol geng. Ol dispela 12-pela yangpela man i laik lusim pasin nogut ol i bin mekim. Taim mi go kampa long ol, ol i redi long autim olgeta wari na hevi bilong ol long mi. Long ol dispela 12-pela man, 10-pela yangpela ol i sanap long autim bel hevi bilong ol long mi olsem as tru bilong ol long joinim raskol geng em long ausa bilong mamapapa bilong ol husat i brukim na katim laip marit bilong ol na i go marit gen long ol narapela man o meri na lusim ol pikinini i raun nabaut na i nogat man i lukautim ol gut.

Sampela i tok mama i bilong wanpela provins na papa bilong narapela provins na taim tupela i marit, tupela oltaim i gat kros namel

BILUM



Wantaim
Sir
Gekate
S. Gam

long tupela yet na pasin bilong lukautim mipela ol pikinini i no gutpela. Tupela i no save lainim mipela long pasin tumbuna o gutpela pasin mipela i ken bihainim na i ken i stap gut wantaim arapela manmeri long komyuniti we mipela i save stap long en. Long dispela as na mipela i joinim raskol geng bilong wanem dispela rot i klia olsem bai mipela i gat moni na kaikai na klos samting taim mipela i go stilim samting long stua na long haus bilong narapela lain.

Na tupela yangpela man long ol dispela 12-pela i tok ol i belhat long ol tisa long skul i mekim paisin bilong wantok sistem na maski mitupela i pas long tes tasol ol i lusim mitupela na kisim ol wantok bilong ol tasol i go long hai skul. Mitupela i traim long panim rot long i go long skul na i nogat rot. Olsem a mitupela i joinim geng tasol na i stap i kam inap nau.

I gat arapela yangpela boi i bin kam long mi na autim bel hevi bilong ol na sot bilong ol long kaikai na klos na moni na mi helpim ol liklik tasol em i no inap bilong wanem ol bai i stap longpela taim na husat bai i sambai long dispela kain ol pikinini na helpim ol. I gat planti pikinini meri i stap long hevi bikos papamama i brukim na katim laip marit na bringim hevi long ol na sapos dispela hevi i kamap bikpela, PNG bai i bagarap olgeta.

Bilong daunim dispela bikpela hevi wanem plen nau i stap long kantri bilong yumi. Gavman bilong yumi i gat plen aninit long Welfea Diapmen i gat sistem yumi ken yusim na helpim ol turangu au i bungim dispelea hevi. PNG em i liklik kantri na i gat risosis olsem moni na wokmanmeri inap long wok na daunim dispela hevi bilong ol turangu.

Tasol bikpela wok bilong lukautim ol dispela pikinini manmeri i kam bek long yumi papamama. Wok bilong yumi i stat taim yumi i tingting long marit. Dispela man o meri yumi i laik marit long em, em i gutpela o i no gutpela. Skelim gut pastaim orait moabeta kisim pasin wanbel bilong ol hauslain o papamama pastaim, orait pasim tok bilong marit bikos laip marit em i no samting bilong yumi wanwan, nogat, em i samting bilong hauslain na famili bikos taim yumi i gat hevi ol bai i sambai long helpim yumi.

Nau yet sampela manmeri i tingting long moni na kago samting na tingting long maritim husat man o meri i gat ol dispela samting. Tasol dispela samting em i hap bilong laip bilong yumi wanwan. Bikpela samting long helipm yumi gut long famili em long pasin bilong yumi yet long tumbuna (traditional value) long tilim na skelim samting, rispek long wanpela, narapela, pasin bilong pasim laip marit, i stap strong aninit long ol bilong ples na famili.

Mi tok gen, bosim gut laip marit bilong yumi na skulim ol pikinini bilong yumi long bihainim wankain pasin.

Yut grup laikim bia i mas stap yet

GOROKA Eben yut grup i egensim plen bilong Isten Hailans Provinsel Gavman long stapim bia na ol arapela spak dring insait long provins.

Siaman Winchlee Oibotee i tok em i tru ol bia na spak dring i save kamapim ol bikhet na trabel pasin insait long komyuniti. Tasol stapim olgeta strongpela spak dring bai i ken kamapim moa hevi.

Em i tok sapos ol lida bilong provins i stapim bia, ol yangpela man na meri bai i ken i go insait moa long kisim ol spak brus olsem mariwana na tu wokim ol hom bru bia na dispela pasin i ken kamap bikpela insait long provins.

Siaman Oibotee i tok lo i no oraitim dispela tupela samting.

Em i tok ol provinsel lida i ken ting olsem taim ol i pasim lo na stapim bia insait long provins bai hevi bilong lo na oda i go daun, tasol em bai no inap bikos hevi ya bai i go antap na sindaun bilong planti lain insait long ples na taun bai bagarap.

Mista Oibotee i tok tu olsem birua bilong ka eksiden long rot tu bai i go antap bikos ol lain bilong dring bia bai draiv i go kam long Lae na Madang long painim bia.

Em i tok ol provinsel lida bilong Isten Hailans Provins i mas tingting na skelim gut wanem samting bai kamap bihain long kamapim dispela lo long stapim bia na ol spak dring long provins.



Ol i gat namba ya! Pilaim biuget (trumphet) em ino isi na dispela em ol sumatin bilong Trumphet Skul long Raimpika, Kainantu long Isten Hailans i putim aut sampela aitem long ol kongregesen bilong St John Lutheran sios long Goroka bihain long ol i bin skul long hap inap 2-pela krismas na greduet long las mun. Foto: Sape Metta.

Ol Isten Hailans mama sapot long stapim bia

SAPE METTA i raitim

ISTEN Hailans Provinsel Wimens Kaunsel i wanbel long stapim olgeta strongpela spak dring insait long provins. Ol i autim dispela sapot bilong ol bihain long ekting Gavana bilong provins Damson Lafana i tokaut long mekim dispela.

Mista Lafana i kamapim dispela plen bihain long em i kisim wok bilong ekting Gavana taim Suprim Kot i rausim olpela Gavana Peti Lafanama long wok bilong em. Em i laik stapim olgeta strongpela dring olsem bia na spirit long Isten hailans provins.

Planti lain olsem sios grup, yut grup na wanwan man na meri i bin gat bikpela amamas na sapot long Mista Lafana i mas kamapim dispela plen long stapim bia insait long provins. Ol meri tu i sapot tru long Isten Hailans Provinsel Gavman long kamapim dispela.

Presiden bilong Isten Hailans Wimens Kaunsel Julie Soso Akeke i tok sapos ekting Gavana Lafana i putim dispela tingting bilong em i go long eksen na kamapim stret lika ben, i luk

olsem ol kain kain hevi na trabel nabaut i ken go daun. Na gutpela sindaun namel long ol manmeri i ken kamap insait long provins.

Em i tok as tru bilong ol trabel na bikhet pasin i kamap em bikos long pasin bilong spak tasol.

Presiden Akeke i tok planti ol hevi na trabel i kamap pinis na i wok long kamap yet. Na ol dispela pasin bai i ken stop sapos Mista Lafana na ol lida bilong provins i ken toktok strong na kamap wantaim tingting long stapim olgeta strongpela spak dring long provins.

Em i tok planti trabel na hevi olsem marit i bruk, birua bilong kilim narapela man, pait namel long ol wanpinis, raskol na stil pasin na planti arapela hevi moa i save kampa, em i bikos long spak pasin tasol.

Misis Akeke i tok wanpela bikpela hevi we i wok long kamap bikpela insait long ol ples na taun em pasin bilong pamuk na dispela pasin i kamapim ol sik nogut na birua bilong sik AIDS tu i wok long kamap.

Em i tok taim ol manmeri i save dring na spak, ol i no save

yusim gut tingting bilong ol na mekim pasin pamuk nabaut. Dispela pasin i save kamap namel long ol yangpela manmeri na tu ol maritman na maritmeri, Misis Akeke i tok.

Em i tok planti marit i wok long bruk pinis na i wok long bruk yet bikos long dispela spak pasin tasol.

Ol sik nogut bilong pamuk pasin i ken kamap wantaim sik AIDS na bringim sem na brukim famili laip na sindaun, em i tok.

Planti papa i wok long dring spak na famili bilong ol i sot long mani long baim gutpela kaikai na bilas samting na ol i stap wantaim hevi. Olsem na bipo long dispela hevi i go bikpela olgeta, ol lida i mas kamap wantaim gutpela tingting na pait strong long toktok na stapim olgeta kain kain strongpela bia na spak dring we i save kamapim olgeta kain hevi olsem long komyunit na famili, Mista Akeke i tok.

Ol foapela hailans provins olsem Simbu, Westen Hailans, Eriga na Sauten Hailans provins i tambu long karim bia na ol strongpela spak dring i go insait long provins.

1999 Nesenel baset bilong Skate/Lasaro gavman

Gavman lukluk long pulim mani long baset plen

WENCESLAUS MAGUN i raitim

GAVMAN bilong Skate na Lasaro bai go het yet long karim aut ol wok aninit long ajenda bilong rifom insait long midium tem developmen. Dispela em wanpela bilong ol toktok bilong Minista bilong Fainens na Treseri laro Lasaro long Palamen long Mande taim em i tokaut long baset bilong 1999.

Mista Lasaro i tok Gavman bai sanap strong long pablik eria rifom, praivetaisesen program, praivet sekta developmen na fainensel sekta rifom program olsem sanap bilong gavman long midium tem rifom program.

Em i bilip olsem ekonomik kondisen o bisnis long kantri long yia 2000 na 2001 bai kamap gut. Em i tok long yia 1999, planti bisnis lain bilong narapela kantri bai kam mekim bisnis long PNG.

Em i tok tu olsem long yia 2000 samting olsem 3.9 pesen bilong mani bai kamap long ol bisnis eria tasol na i no long ol maining eria. Na dispela bai i go antap long 7.1 pesen long yia 2001. Em i tok dispela bai kamap bikos wok didiman, forestri, fiseris na konstraksen bisnis i wok long kamap bikpela long PNG.

Mista Lasaro i bilip olsem intenel risev o mani bilong PNG we gavman i putim long sait i stap bilong baim mani bilong narapela kantri bai i go antap long yia 2000 insait long 6-

pela mun na bai sanap strong long dispela mak long narapela 5-pela mun.

Em i bilip tu olsem interes ret long benk bai pundaun i go daun na dispela bai helpim planti ol pablik manmeri bilong PNG na tu ol lain long arapela kantri.

Mista Lasaro i tok plen bilong karim aut midium tem developmen i sindaun strong tru antap long pinis wok bilong pablik eria rifom program, praivetaisesen program na gutpela wok bilong karim aut Veliu Eded Takis (VAT nupela takis gavman bai pulim mani long en) na strongim wok bilong ol bisnis haus.

Em i tok bikos long tait baset bilong yia 2000 na 2001, gavman i gat laik long pinisim olgeta rifom insait long pablik eria insait long tripela yia long sevim sampela mani bilong kamapim moa infrastrasa developmen o putim mani i go insait long mekim moa haus sik, skul, bris, ples balus na rot long kantri.

Mista Lasaro i tok long daunim pasin bilong gavman long dinau long ol arapela kantri na tu insait long PNG, na bilong kamapim rum bilong ol praivet bisnis long kisim dinau na putim mani i go insait long invesmen, gavman i gat bikpela wok long kamapim moa mani insait long baset bilong yia 2001.

Em i tok sapos gavman i no bihainim dispela rot bai kantri i bungim planti bikpela hevi long ol yia i kam bihain.

Gavman bai rausim 7,000 pablik sevis woka

Gavman i sanapim tingting long rausim klostu 7,000 wokmanmeri bilong Gavman long neks yia. Bai Gavman i rausim olsem 3,600 long nesenel dipatmen, 2,000 woka long ol provinsel dipatmen na 1,200 woka long ol gavman bisnis. Dispela em bikos olgeta yia, Gavman i save tromoi olsem K750 milien long potnait pe bilong ol wokman tasol na dispela i klostu long hap bilong baset Gavman i save brukim long olgeta yia.

Minista bilong Treseri na Plening na namba tu Praim Minista lairo Lasaro i tokaut long baset ripot bilong em olsem taim Gavman i save sot long mani bilong mekim ol arapela bikpela wok developmen, em i mas dinau long ol beng long kantri na tu long ovasis.

Mista Lasaro i tok bai Gavman i daunim baset bilong ol nesenel dipatmen, ol provinsel dipatmen na ol bisnis han bilong gavman. Dispela bai mekim ol i daunim namba bilong ol wokman bilong ol tu.

Bai Gavman i rausim tu sampela opis bilong em olsem 15 stetutori atoritis opis, ol ejensi opis na komiti opis. Bai Gavman i bungim wok bilong ol dispela opis i go wantaim arapela bikpela opis bilong ol.

Long sait bilong ol provinsel opis, bai i gat bikpela senis tu long ol opis na wok bilong ol na

dispela inap rausim 2,000 wokmanmeri olgeta insait long ol provins.

Mista Lasaro i tok dispela bai bihainim rifom program na bikpela namba bilong ol pablik sevis woka bai lusim opis bilong ol na go wok long nupela hap, sampela bai i stap bek, na arapela bai pinis aninit long ritaiamen na Gavman bai was long i mas gat inap wokman na sapot i stap bek long mekim wok i go het. Bai Gavman i traim long kamapim ol trening program, kredit skim na kes pei aut long mekim ol lain i stap bek i ken mekim wok gut na karamapim spes we i stap nating.

Mista Lasaro i tok pablik sevis wok i no moa fultaim wok we husat i wok long en bai wok i go

inap long sevis bilong em. Olsem na husat i stap yet long pablik sevis i mas lainim long wok insait long nupela sistem na senis bilong Gavman, Mista Lasaro i tok.

Em i tok man i mekim wok na wok i kamap bai wok i go moa yet na kisim promosen. Dispela pablik sevis rifom bai i kos olsem K65 milien long 1999, Mista Lasaro i tok.

Minista i tok taim Gavman i vot na pasim dispela 1999 baset, bai ol i go het long karimaut dispela senis wantaim ol pablik sevans woka insait long kantri. Ol mani i kam long salim bilong ol asets bai i stap redi long lukautim dispela wok bilong pinisim ol wokman long 1999, Mista Lasaro i tok.

VAT takis bai kamap long Julai

INSAIT long 1999 baset bilong Skate Lasaro Gavman, bai olgeta provins i kisim 30 pesen (5%) mani i kam long takis Gavman i kisim long nupela takis ol i kolim Veliu Eded Takis (VAT).

VAT em takis we Nesenel Gavman bai kisim 10 pesen long olgeta takis long ol kago, ol samting na sevis insait long kantri. Dispela takis bai rausim olpela takis sistem 3% Provinsel Gavman takis na Nesenel Gavman tasol bai kisim takis bilong olgeta provins na bungim aninit long wanpela akaun ol i kolim Nesenel VAT Tras Revenu. Dispela Nesenel VAT akaun bai kisim mani na skelim long olgeta provins. Gavman i kamapim wanpela sistem tasol em long 30% we em yet bai bungim takis na skelim gen long ol provins.

Planti toktok i kamap pinis long dispela takis sistem we em bai apim takis long planti samting na ol manmeri bai i wok long baim moa kos na prais bilong ol samting.

**CRINKAI
RICE**

That's right



1999 Nesenel baset bilong Skate/Lasaro gavman

Gavman tromoi K139 milien i go long ol distrik na asples

Nesenel Gavman i brukim K139 milien i go long wok bilong stretim na kirapim ol projek na developmen insait long ol distrik na ples. Dispela mani i go aninit long nupela dipatmen ol i kolim Opis bilong Rurel Developmen. Insait long dispela mani, K91 milien i bilong karimaut ol bikipela wok projek insait long olgeta distrik na ples long neks ya.

Insait long 1999 baset ripot bilong Skate Lasaro Gavman long dispela wik, Minista bilong Treseri na Plening lairo Lasaro i tok planti krismas i lus pinis na ol asples i no save kisim wanpela gutpela sevis. Olsem na dispela Gavman i bilip olsem kaikai bilong developmen em olgeta pipel i mas skelim wantaim. Em i tok ol bikipela bagarap na birra we i save kamap long kantri i soim olsem ol pipel bilong mipela long ples i

nogat gutpela helpim i stap we i ken helpim olgeta manmeri.

Em i tok Provinsel rifom i no kamapim tru wok bilong em yet long bringim sevis i go long ol gras rut long distrik na ol ples. Wantaim ol bikipela opis long provins, ol sevis na wok i no kamap long ol pipel husat i wetim ol dispela helpim. Olsem na ol sevis i wok long go bagarap long distrik level.

Mista Lasaro i tok dispela pasin i mas pinis na Gavman i mas muvim ol risos long ol biktaun i go long distrik long ol i mas mekim wok klostu long ol pipel we ol i ken kirapim na developim ol projek olsem rot, bris, haus sik, skul, gutpela wara saplai na kamapim ol liklik wok bisnis we ol pipel i ken mekim long painim mani.

Mista Lasaro i tok dispela lukluk bilong Gavman em bilong mekim ol dispela samting i

kamap gut aninit long lukaut bilong nupela dipatmen bilong Opis ov Rurel Developmen.

Minista i tok 1999 baset i brukim tu K15 milien i go long ol projek we i kam aninit long Tagetet Komyniti Developmen Program (TCDP) we ol lain bilong Non Gavman Ogenaisesen (NGO) olsem sios grup na arapela komyuniti grup bai karimaut.

Em i tok bai Opis bilong Rurel Developmen i was tu long K33 milien we bai i kam aninit long Distrik Sapot Grents long wok bilong kirapim distrik.

Ol arapela projek olsem rurel wara saplai, kamapim ol liklik rot na bris na arapela moa na i gat mani i kam long ovasis helpim, ol dispela ovasis mani i no stap insait long dispela Nesenel Gavman baset bilong K139 milien.

Baset olsem K1,998,400,000.00 i karamapim ol dispela eria

Debt Services	746,779,900	Local-Level Govt. & Village Services	
National Departments	656,620,100		30,000,000
Grants to Statutory Authorities		Town & Urban Services	4,989,200
	956,000,000	District Support Grant	21,500,000
		Church Health Services	12,255,000
Grants to Provincial Governments (New Organic Law)		Education Subsidies	20,000,000
		Special Support Grant	24,000,000
		Mining Agreement	4,940,000
Administrative Grants	40,000,000	North Solomons Provincial Government	
Public Servants Salaries	77,558,900		480,545,300
Teachers Salaries	179,104,400	(Old Organic Law)	19,454,700
Church Health Workers	17,229,100	TOTAL	1,998,400,000
Local-Level Govt. Secretariat	7,664,200		
Derivation Grant	11,244,500		
Infrastructure Grant	30,000,000		

Baset bilong ol projek i go antap

OL projek olsem rot, bris, ples balus na arapela bikipela projek moa insait long kantri bai kisim K320 milien bilong karimaut ol wok bilong ol insait long 1999 baset.

Treseri na Plening Minista lairo Lasaro i tokaut long baset ripot bilong em olsem Gavman nau i sanap long kirapim ol wok developmen insait long Papua Niugini. Olsem na Gavman bai strongim dispela wok wantaim taim em i skelim inap mani long ol wok bilong projek mentenens,

humen risos developmen, neserel risos menesmen na lo na oda.

Mista Lasaro i tok insait long 1999 invesmen program, Gavman i brukim K70 milien wantaim ol mani em i kamapim bilong karimaut ol rot mentenens. K22 milien em Gavman i brukim long ol wok mentenens we inap kamap bihain na ol dispela mani bai i kam long ovasis helpim.

Mista Lasaro i tok baset bilong mekim ol dispela wok i go antap winim baset bilong 1998 long

wankain wok olsem.

Minista i tok rurel developmen na ekonomik o ol bisnis wok bai kisim gutpela luksave long 1999 PIP wantaim K194 milien we i stap long kirapim rurel na ekonomik developmen.

Gavman long las wik i pasim lo bilong ges bisnis insait long kantri na dispela em wanpela bikipela eria bilong Gavman long kamapim tru ol plen na program bilong em insait long ol rurel developmen na ekonomik developmen bilong kantri.

1999 baset glasim wok bilong Rifom

PROVINSEL na Lokol Level Gavman rifom program i bin stat long Julai 1995. Wok long skruim program i no go hariap bikos long nogat inap wok manmeri long karimaut ol wok long operesens na teknikal sait insait ong Provinsel na Lokol Gavman level, Minista bilong Plening na Implimentesen lairo Lasaro i tok.

Long 1999 ol Provinsel na Lokol Level Gavman atoriti bai karimaut rivyu bilong glasim ol strong-

pela poin na i no strongpela poin bilong rifom. Na tu long ol ejensi we i go hetim ol rifom. Bihainim dispela, ol bai i kamapim plen we bai i gat long en rot long strongim ol gutpela poin na edresim ol samting we i no stret, Mista Lasaro i tok.

Em i tok bihainim hevi we kantri i bungim long mani i sot, i mas gat senis long 1999 mani we gavman na ol dipatmen i yusim long ol wok. Dispela i mas bihainim mani kantri i

kamapim, we long nau i go daun.

Long wankain taim tu, 1999 fiskol program bai i katim daun ol kondisenel gran i go long ol provinsal gavman. Dispela em ol gren mani we gavman i save givim long mekim wok bilong stretim ol rot, bris, ples balus na ol arapela bikipela wok moa, edministretiv grans, lokol na viles level grens na taun na eben sevis grens, Mista Lasaro i tok.

Olsem i stap aninit long Ogenik Lo, Nesenel Ikonmik na Fiskel Komisn i bin karimaut rivyu long kikbek bai i kamap bihainim gavman i katim mani i go long ol dipatmen long 1999 baset. Komisn i lukim olsem gavman na ol dipatmen i no inap long abrusim ol baset kat, moa yet long dispela taim kantri i bungim hevi long mani. Komisn i pilim olsem em i wokim rait disisen long katim ol ekpenditja kat.

NESENEL BASET BILONG 1999

Summary	Kina
Office of Governor-General	1,800,000.00
Department of Prime Minister & National Executive Council	15,500,000.00
National Statistical Office	2,142,000.00
Office of Bougainville Affairs	1,500,000.00
Department of Treasury & Planning	18,200,000.00
Department of Treasury & Planning - Miscellaneous	101,732,000.00
Information Technology Division	4,141,000.00
Consumer Affairs Council	1,480,500.00
Internal Revenue Commission	27,000,000.00
Department of Personnel Management	2,600,000.00
Public Service Commission	400,000.00
Department of Attorney-General	6,000,000.00
Department of Corrective Institutional Services	13,000,000.00
Provincial Treasuries	1,000,000.00
Department of Police	82,000,000.00
Office of Planning and Implementation	2,000,000.00
Electoral Commission	8,500,000.00
National Intelligence Organisation	800,000.00
Department of Defence	80,000,000.00
Department of Education	84,124,600.00
Office of Higher Education	15,700,000.00
Department of Health	54,000,000.00
Hospital Management Services	54,000,000.00
Office of Family and Church Affairs	1,500,000.00
Office Environment and Conservation	3,000,000.00
Department of Agriculture & Livestock	3,000,000.00
Department of Lands and Physical Planning	2,000,000.00
Department of Mineral Resources	6,500,000.00
Department of Petroleum and Gas	4,000,000.00
Department of Public Enterprise	1,000,000.00
Department of Transport, Works & Civil Aviation	30,000,000.00
Department of Commerce and Industry	2,000,000.00
Department of Employment and Youth	2,500,000.00
Office of Rural Development	1,500,000.00
Department of Treasury & Planning - Debt Services Charges	746,779,000.00
Office of the Auditor-General	5,100,000.00
Department of Foreign Affairs and Trade	12,500,000.00
Department of Provincial and Local Government Affair	4,500,000.00
Ombudsman Commission	5,500,000.00
University of Papua New Guinea	20,000,000.00
University of Technology	20,000,000.00
University of Goroka	4,500,000.00
University of Vudal	2,600,000.00
National Narcotics Bureau	1,000,000.00
National Broadcasting Commission	7,000,000.00
Investment Promotion Authority	2,000,000.00
National Museum and Art Gallery	1,000,000.00
National Housing Corporation	500,000.00
National Cultural Corporation	1,000,000.00
PNG National Forest Authority	17,000,000.00
Tourism Promotion Authority	3,300,000.00
Baset bilong ol Provins	
Fly River Provincial Government	27,083,000.00
Gulf Provincial Government	17,033,500.00
Central Provincial Government	20,425,800.00
National Capital District	8,003,400.00
Milne Bay Provincial Government	25,330,000.00
Oro Provincial Government	15,392,900.00
Southern Highlands Provincial Government	40,446,600.00
Enga Provincial Government	30,353,000.00
Western Highlands Provincial Government	34,722,300.00
Simbu Provincial Government	22,521,100.00
Eastern Highlands Provincial Government	34,722,300.00
Morobe Provincial Government	42,682,700.00
Madang Provincial Government	29,200,900.00
East Sepik Provincial Government	29,792,200.00
Sandaun Provincial Government	18,666,500.00
Manus Provincial Government	9,052,700.00
New Ireland Provincial Government	25,703,100.00
East New Britain Provincial Government	27,082,500.00
West New Britain Provincial Government	22,063,600.00
Bougainville Provincial Government	19,454,700.00
Total:	1,998,400,000.00
PNG National Fisheries Authority	4,000,000.00

SBDC laik Helpim yu Wantaim ol Liklik Wok Bisnis

BENG ovadraf em i wanpela rot long kisim dinau mani long beng. Ol pipel na ol bisnis lain husat i gat sek akaun na ol arapela akaun i save kisim beng ovadraf. Dispela rot bilong kisim dinau mani em i narakain long pesenel beng lon. Man i laik kisim dinau mani bai i no kisim kesmani tasol beng i larim kastoma long rausim moa mani mak abrusim dispelaem i gat long akaun bilong em. Tasol beng i save putim mak long hamas em i ken rausim long dispela kain rot long akaun bilong em.



Dispela rot long kisim dinau mani i gat wankain kikbek tasol olsem taim kastoma i kisim dinau long kesmani. Bikos em i ken raitim aut sek long wokim ol peimen, em i ken baim ol samting em i laikim long dispela rot. Beng bai i onaim sek o yumi ken tok peim kemani long ol inap long mak we ol i tok orait long en taim em i laik wokim ovadraf. Intres we kastoma i kisim dinau mani long dispela rot bai i opim em i narakain long dispela we kastoma i kisim pesenel beng lon i peim long en.

Kastoma i save baim ovadraf intres long dispela mani we em i yusim. Yumi ken tok kastoma i no peim intres long mani we em i no yusim.

Wanpela nogut sait long kisim ovadraf dinau em beng bai i askim skastoma long peim bek mani long wanem taim em (beng) i laik. Narapela samting tu em beng i no inap long larim kastoma i kisim dinau mani inap kastoma i soim gutpela sekyuriti o sapos beng i klia olsem kastoma bai i peim dinau mani.

Bikos planti PNG manmeri i no nap givim sekyuriti, planti bilong ol i no save bihainim dispela rot long kisim dinau mani.

Ol Sevings na Lons Sosaiti i save givim dinau mani long husat?

Sevings na Lons Sosaiti em ol i rot we planti PNG pipel i save kisim dinau mani long ol. Ol dairekta i save glasim gut ol askim bilong kisim lon o dinau mani bipo ol i oraitim. Long oraitim husat lain bai i kisim lon, ol dairekta i save lukluk long planti samting. Wanpela samting em sekyuriti we kastoma i ken givim.

Winim fri kar na kisim K1,000 fri long Freeway

JAMES KILA i raitim


WANPELA 100-pesen kampani bilong Papua Niugini stret we i save wok long salim ol moto kar, Freeway Motors i pas wantaim tok bilogn en "Yumi Yet" na i redi tasol long givim wanpela fri utiliti kar insait long taim bilong Krismas na Niu Yia.

Sapos yu baim wanpela *The Independent* niuspepa bai yu gat gutpela sans tru long winim dispela fri kar olsem presen bilong yu long Niu Yia.

Long go insait long dispela kompetisen bilong winim kar, baim tasol wanpela *The Independent* niuspepa ol i save salim long olgeta Fraide. Raitim nem na adres bilong yu tasol long wanpela spes i stap long daunbilo long bak-sait pes bilong niuspepa. Yu ken pulapim planti pepa na salim i go long na bai yu gat gutpela sans long win.

Freeway Motors em i wanpela lokal kampani bilong ol lain Papua Niugini stret na em i bin stat long Oktoba 1996. Bikpela lukluk bilong en em long wok i go insait long dispela maket we planti taim ol ovasis lain tasol i save laik bosim.

Nau yet Freeway Motors i gat 25 wokman meri. Insait long dispela 8-pela i save wok long woksop, sevis na panel, 10-pela long sels na 6-pela long administresin.



• Kar em Freeway Motors i putim long resis bilong winin. Inset: Mista Tasion.

Bikpela lukluk bilong Freeway Motors em i pas long dispela tok "Yumi Yet" na strong long halivim ol lokal manmeri bilong PNG na tu long promotim gutpela sevis i go long ol kastoma bilong ol.

Menesing dairekta bilong Freeway Motors, Sam Tasion i tok olsem dispela tok "Yumi Yet" i gat gutpela mining bilong en. Dispela em long sapatim na halivim ol lokal manmeri.

"Bihain long 23 yia bihain long PNG i kisim indipendens, PNG i lukluk strong long mekim kamap dispela lukluk bilong em long givim sevis i go long ol pipel bilong em stret," Mista Tasion i tok.

Freeway Motors i gat

bikpela plen bilong en tu long opim ol narapela brens bilong en long Momase na Hailans rijon. Na tu bikpela samting em long salim ol sia moni i go long ol pipel bilong PNG stret.

Mista Tasion i tok tu olsem Freeway Motors bai redim wanpela narapela bikpela promosen tu long taim ol i opim nupela "Yumi Yet Woksop. Dispela bai kamap klostu taim.

Distribusen menesa bilong Word Publishing Company Limited, Joe Kanekane i tok long dispela taim nau we i lukim ekonomi bilong kantri i go daun na planti ol lain long PNG i no inap gat sans long baim kar dispela kompetisen bai halivim ol gut tru. Word


Publishing em kampani husat i go pas long *Wantok, The Independent* na *PNG Business* niuspepa.

Mista Kanekane i tok tu olsem nau yet planti papamama i wok hat tru long painim moni long peim skul fi bilong pikinini bilong ol, olsem na winim wanpela fri utiliti bai halivim ol gut tru.

Em i tok tu olsem ol femili bilong ol lain husat i win na i stap ausait long Mosbi i mas redim rot bilong ol yet long go na kisim kar bilong ol.


ELA MOTORS OL TAIA NA BATERI

I gat planti ol kwaliti Hankook, Michehine na Sumo Taia wantaim Ela Power Bateri Bilong ol kain kain model kar.



SUMO LUG ST 388

- Spesel tred inap winim planti mail.
- Moa lagi helpim taia i ron gut long rot.
- I gat planti spes we win i raun na taia i no inap hat tumas.
- Strongpela kasing long helpim sefti na moa ritred.



SUMO TRACTION 888

- Em inap winim graun malmalum na ol nogut.
- Em i brait na inap holim gut kar.
- Spesel nailon rop i strongim taia i stap longpela taim.



Ol hevi dutina strongpela kwaliti taia inap winim kain kain rot long PNG, i stap long gutpela prais.

Kain kain sais Ela Motors pawa Bateri i redi tasol long kar bilong yu. I gat 12 mum ful waranti tu long olgeta Ela Motors Pawa Bateri.

YU INAP PAINIM LONG OLGETA ELA MOTORS PARTS DIPATMEN NA TYRE BAY LONG KANTRI.



Ela Motors
TYRES & BATTERIES

HARIAP NA RINIM MIPELA NAU

HEAD OFFICE 3229494 • PORT MORESBY 3229414 • LAE 4722322 • RABAU 9821988 • KOKOPO 9829100 • MADANG 8522188
GOROKA 7321844 • MT HAGEN 5421888 • WEWAK 8562255 • KAVIENG 9842132 • KIMBE 9835155 • TABUBIL 5489060
VANIMO 8571254 • PORGERA 5479367 • KUTUBU 5496685 • BUKA 9839915 • LIHIR 9864099 • ALOTAU 6410100

Lae Niuis



Plis gat moa strong long nupela gan

PLIS bilong Mumeng, Wau-Bulolo na Aseki-Menyama i ken patrolim haiwe long bilong ol long nait na taim bilong trabel, tenkyu long minista bilong plis na praim minista.

Praim Minista Bill Skate na memba bilong Menyama na plis minista Thomas Pelika i bin givim 5-pela gan i go long ol dispela plis stesin na bai givim arapela 5-pela gen long neks yia.

Tupela memba ya i bin divim dispela gan bihain long ol i go lukluk raun long Menyama Distrik long las mun. Provinsel plis bos' mista Joe Samara i tok tenkyu i go long dispela tupela bikman ya long ol bikpela helpim bilong tupela.

Ol plisman, bihain long kisim dispela ol gan, i bin holim wan wik kibung long Bulolo, ananit long lukaut bilong Momase Rijnol Trening opisa long Lae, Inspekta Augustine Wampe.

Wampe i tok em i lainim ol long we bilong rausim gan ya, wasim, grisim na putim i go bek gen.

Em i tok tu olsem em i amamas long ol dispela plisman na meri bilong dispela hap we ol i lainim planti samting insait long sotpela taim tasol.

• Em Hawaii nait long Planet Rock long Lae ya, Christina Wolsterholm (namel) wantaim tupela poro i redi long mekim stail bilong ol.

Photo: FRANCO NEBAS.

Asembli bilong God amamasim 50 yia jubili

BUSTIN ANZU i raitim

MOA long 10,000 man meri i bin pulumapim tru Se Ignatius Kilage (SIKS) long amamasim 50 yias Jubili bilong Asembli bilong God (AOG) long Papua Niugini.

Olgeta sios insait long sentrol rijon olsem Morobe, Madang na Isten hailens Provins i bin kapsait stret long dispela amamas de bilong ol.

Long wankain taim tu, ol narapela rijons i bin selebretim jubili bilong ol long wanwan hap bilong ol yet.

Ol lain long Sauten loig Pot Mosbi, Hailens long Mt Hagen, Niugini; Ailens long Kimbe na Sentral loig Lae. Selebrasen long Lae i bin stat long Mande las wik na pinis long Sande.

Ol lain long Is na Wes Sepik wantaim Manus i stat long Mande na bai pinis long Sande. Is sepik em asples we dispela sios i bin stat, gro na bihain i go aut long arapela hap long kantri.

Selebrasen long Sepik bai stat long Maprik pastaim na bihainim haiwe go long Winge, Yangoru, Kusambuk na las tru long Wewak taun we bai pinisim olgeta.

Kodineta bilong sentral rijon Jonathan Benguma i tok ol i amamas tru long dispela selebrasen long makim olsem gutnius i bin kam na spred insait long kantri bihain 50-yias i go pinis.

"Wok bilong ol misineri ino popaia nating, Wanem samting ol i bin tingting na kam long em i karim kaikai stret. Nau mipela i luksave long las 50-yias we sios i gro olsem wanem." Beguma i tok.

Em i tok olsem igat wanpela stori olsem, sip i go, Sepik i go, sip i kam, Sepik i kam. Dispela tok pilai i save stap na plnati i save ting ol Sepik les lain, tasol dispela pasin i senis na nau. Long wanem kain strongpela rabis ples olsem Bumbu setolmen i senis pinis long pasin raskol. Dispela em long wok bilong sios i mekim na ol bik het lain i senisim pasin.

Lukluk bilong Angau haus sik bai senis

FRANCO NEBAS i raitim

BOD na menesmen bilong Angau haus sik i redi pinis long muv na stretim gut luk bilong haus sik. Ol bod bilong haus sik i laik putim tender i go aut long husat interes na kwalifai organaisasen long givim haus sik wantaim gutpela pablik relasen na fan raisen sevis.

Bod siaman bilong haus sik Ross Humphries i tok long wanpela statemen olsem ol bod na menesmen i laik long go het na mekim kamapim gutpela wok bung wantaim ol komyuniti na kisim sapot long ol bisnis komyuniti long stretim na mekim moa bikpela ol sevis na luk bilong

long haus sik.

Mista Humphries i tok olsem luk bilong haus sik i mas senis, Sevis i go long ol komyuniti i mas gutpela, long wanem sampela sevis i go long ol komyuniti ino stret olsem we bod na menesmen i sasim bikpela pe bilong fi bikos toktok kam long nesanel gavman na dipatmen bilong helt." em i tok.

Ananit long kondisen agrement long nesanel gavman na ol arapela Intanesanel grups, ol haus sik long kantri mas kisim 15 % long net operatin badget bilong ol long fi na arapela revenue, dispela tu em fi bilong ol sik man we Gavman yet i bin makim long em.

Long helpim ol toktok bilong

em, i gat ol risos i stap long health sekta long infrasture long go moa bikpela na mekim maintenance.

Humphries i tok olsem sevis long Angau em bikpela na ol skills mas kamap bikpela

long wanem em i haus sik long kisim skul na tu em namba tu bikpela hausik long kantri.

Long bikpela kampaign bilong haus sik ol i laik kamap gutpela wok bung wantaim ol komyuniti long ol fi bilong we ol i gen peim na givim toksave long ol samting bilong ol long helpim sikman istap long haus sik

Long sampela yias i go pinis Angau bin pulim planti spon-sasip long sampela projek bilong ol

Glasim plis ripot insait long Lae siti wantaim BUSTIN ANZU

MOROBÉ PLIS RIPOT

Man Kaiapit lus

PLIS long Markam i wok long mekim wok painim aut long wanpela mangi Kaiapit i bin lus bihain long wanpela kros bilong graun.

Dispela mangi i bin wok long gaden long dispela graun we nau planti toktok i kamap long

em. Em i ronowe i go na ino kam bek gen long haus yet. Plis i wok long painim aut long dispela hevi yet.

Man lusim kar bilong em

Wanpela draiva i bin lusim kar bilong en long las wik taim em i pakim kar bilong em long painim sampela kaikai long rot maket.

PPC Joe Samara i tok , draiva i bin lus tingting long putim engin

bilong kar op na go daun long Umi bris maket wantaim bosskru bilong em long painim kaikai.

Wanpela stilman ya i lukim kar i karai istap wantaim nogat draiva insait long em na em i go insait long kar na karim igo long Hailens haiwe

Plis i kisim ripot olsem kar ya em ol i lukim antap long Kundiawa na PPC i tok sapos ol i lukim dispela kar orait ol i mas ripot long plis.

Televisen i bungim ol pipel long PNG wantaim wol

MOA long 200 manmeri i kisim baptais long las Sarere long Se Ignatius Kilage Stadium. Dispela tu i pasim dispela program "Setelait Lotu"

Dispela program we i bin pulim samting olsem 20-30,000 man meri na pikinini wanwan nait insait long 5-pela wik olgeta.

Kodineta Pasta Samuel Sailas i tok olsem maski ren , ol pipel i gat bikpela laik long lukim dispela program we i kamap laip long USA.

Em i tok , " Mipela gat kain program long bipo tasol dispela i pulim planti pipel long ol arapela program bilong mipela."

Samting olsem 286 manmeri i

kisim baptais long pul wara bilong stedium we i bin pulap stret. Dispela em bikpela namba winim long bipo we ol manmeri i kisim baptais . Ol lain husat i kisim baptais em ol i stap long baptais klas na ino ol lain husat i tanim bel long dispela program.

Long dispelaSetelait lotu program em as tingting em long olgeta manmeri i mas wokim frensip wantaim God papa, pasta Sailas i tok.

Dispela tok em Pasta Dwight Nelson i bin autim long 6-pela kontinent long 40-pela tok ples insait long 100 kantri we moa long 2 milien manmeri i bin lukim.

Papua Niugini em wanpela kantri tu i bin lukim dispela program.

Long PNG yet em ol i lukim long Pot Mosbi , Hagen , Simbu, Goroka na Lae. Long Lae yet tu i bin gat tri-pela hap long siti ol i lukim dispela program. Ol ples long Yunitek , Ten siti na Eriku Ovol .

Long dispela taim yet Pasta Sailas i tok olsem bai i gat dispela kain program gen kamap long stat bilong neks ya.

Dispela program em i soim Pasta Dwight Nelson long Amerika i autim tok bilong God we long wankain taim tu ol man meri long Wol i lukluk long bikpela TV long lukim em.

Lae plis holim ronawe kalabus man

PLIS long Lae i bin holim pasim wanpela kalabus man long las wik long Nadzab ples balus taim em i bukim balus sit na laik i go long Pot Mosbi.

Kalabus man ya Tine Kaupa Bomai, krismas bilong em 34 bilong ples Kama insait long Gumine Distrik long Simbu Provins.

Bomai i bin kisim taim pinis olsem laip ya long i dai bilong wanpela meri pailot long 1987 long Lae.

Bomai i bin giaman long kisim wanpela meri i go wantaim em na tok olsem meri bilong em bihain long bukim balus sit na laik kalap na i go. Tasol wanpela Woda i luk save long Bomai olsem i bin ronawr long haus kalabus long Jun 1998 bihain long kalapim banis long kompaun bilong ol.

Olpela arestin opisa husat i sasim long dai bilong em long i dai bilong dispela pailot , i bin sasim em gen long dispela pasin ronowe bilong em na bai kamap long kot.

Spakman kilim meri bilong em

LONG arapela plis nius , wanpela man sepik i kilim meri bilong em i dai long kau banis. Dispela i bin kamap long Bundi kem bihain long man ya i bin spak na tok nogutim meri bilong em na paitim em i go inap long em i dai.

Nem bilong meri ya em Elizaberth Atome husat i tripela mun gat bel na mama bilong tupela pikinini long Bundi insait long Madang Provins.

Trabel man ya Joe Atome husat i kisim sas bilong dai bilong meri bilong em.

Long wankain stori , wanpela man i bin sutim wanpela yangpela meri na kilim em i dai long Wes Taraka long las wik Sande. Meri ya bin lusim planti blut na bihain i dai . Plis i wok yet long painim aut long dispela man.

Yangpela man dai long Sipaia nambis

PLIS i wok long mekim wok painim aut long dai bilong wanpela yangpela man husat i bin dai arere long nambis bilong ples Sipaia.

Man ya i bin go wantaim ol wan lotu bilong em Baptis sios long Sarere apinun long waswas long nambis na taim ol i pinis na kam bek ol i painim olsem dispela ma ino bin kam bek wantaim ol. Ol i go bek na painim olsem em i dai na slip long nambis.

Plis i bilip olsem man nogut i stap na putim was long em na kilim em . Bodi bilong em i stap nau long Angau haus sik.

Meri karim pikinini antap long sip

LONG wankain olsem wanpela meri Sauten Hailens i bin karim wanpela pikinini antap long wanpela sip we i bin ron long Kimbe na kam long Lae.


Dispela meri Pangia i bin karim wanpela smatpela pikinini boi antap long MV KIMBE EXPRESS long namel bilong Solwara. Dispela pikinini em igat 7-mun tasol na stap laip long Angau haus sik.

PMV birua bagarapim 4-pela pasindia

WANPELA 15 sita PMV bas i bin kapsait long rot bung bilong Igam bareks long Sande moning na 4-pela lain pasindia wantaim draiva i kisim bikpela bagarap.

Kar ya i bin ron long hai spit na traim long abrusim wanpela pot hol na bihain em i het paul long kontrolim stai na em i kapsait na tanim 4-pela taim antap long rot.

Ol plis man i kam hariap na kisim ol i go long haus sik. Wanpela meri tu bin kisim bagarap long dispela birua.



• Antap: Tupela kauboi bilong Markham husat i winim hos res long Lae so.

• Ol singsing grup bilong Labu i redi tasol long wokim stail bilong ol long Lae so.



Gavana Wenge laik kisim Gavman long kot

BUSTIN ANZU i raitim

MOROBE Provinsel gavman i laik kisim Nesinol gavman i go long kot long dispela Velu Ede Takis (VAT) we bai kamap long Julai 1, long neks yia.

Gavana Luther Wenge i tok long las wik Sande olsem dispela VAT legislesen we gavman i hariap na ino kaunim gut na pasim nating long palamen.

"Lo bilong yumi i mekim samting kamap hat long ol pipel bilong yumi yet. Ol liklik man meri husat ino gat rot bilong kisim mani bai kisim taim long dispela nupela takis moni bilong gavman." Mista Wenge i tok.

Em i tok olsem dispela takis moni ol i kisim em ino long laik bilong ol. Dispela moni em bai ol bai bengim long wanpela benk long Pot Mosbi na em i poret outsait bai Intenol revenu komisen (IRC) na Tresora Dipatmen bai skelim dispela moni.

Gavana i tok olsem long pastaim Provinsel gavman yet i save yusim takis bilong em yet long stretim sindaun bilong em long provins.

Tasol wantaim VAT em i tok ol moni bai go long Mosbi na ol bai wetim gen se bilong ol gen. Dispela em westim taim gen na em bai traim long stretim ol.

Gavana wantaim bikpela brata bilong em Kenndy Wenge i lusim palamen siting taim ol i vot long VAT. Tupela i les long dispela bil.


"Mi kisim Nesinol gavman i go long kot ino min olsem mi salensim Praim Minista Bill Skate tasol mi salensim gavman. Wanem samting em wokim em ino lukluk long tingting bilong ol liklik man meri long graun. Olsem na mi mekim long makim maus bilong ol pipel bilong mi." Gavana Wenge i tok.

Em i singaut i go long Nesinol Gavman olsem sapos ol i wokim kamap dispela lo., em bai kotim ol nau ol. Em i tokim ol Pato Loiyas long stretim ol pepa bilong em.



• Voco Poin maket long Lae.

• Ol yangpela kaubol bilong Morobe i sindaun luluk long-pilai long Morobe so.



Morobe kisim K42 milien baset

YAKAM KELO i raitim

MOROBE Provinsel Gavman bai kisim K42,682,700 milien insait long nesanel baset bilong 1999 taim Gavman i brukim baset long neks wik. Dispela em wanpela bikpela baset long skelim wantaim baset bilong ol arapela provins insait long kantri.

Morobe i kisim bikpela baset long ol arapela provins bihainim namba bilong ol pipel insait long provins we Morobe em i wanpela bikpela provins wantaim planti manmeri moa long ol arapela provins.

Tasol Morobe provins bai bungim bikpela salens long dispela yia long sait bilong wokim na pulim mani insait long provins yet.

Morobe Gavman bai i no inap karimaut dispela 3 pesen (%) sels takis em i save kisim oltaim long ol bisnis na wok insait long provins. Dispela tu i wanpela bikpela eria bilong provins long pulim mani na lukautim ol wok bilong em yet, maski mani i kam long Nesanel Gavman i no save kam hariap bihainim taim.

Morobe Provinsel Gavman

bihain long em i kisim dispela K42 milien baset bilong em, bai em i sindaun gen long haus Tutumang long brukim baset i go long ol distrik na ol wok bilong em long provins.

Gavana bilong provins Luther Wenge i bin tokaut olsem Morobe Gavman bai sindaun long brukim baset bilong em sampela taim long neks yia.

Gavana Wenge tu i no amamas long dispela nupela lo bilong Nesanel Gavman long kamapim nupela takis sistem ol i kolim VAT. Olsem na em i tokaut long salensim Nesanel Gavman long kot long dispela nupela lo.

Morobe Provins em wanpela bikpela provins we i gat planti bikpela wok bisnis na em i bikpela industriyel senta bilong Papua Niugini. Em i save kamapim bikpela mani long sait bilong ol wok bisnis long fektori na stua, takis i kam long Lae Mein Wof taim ol ovasis sip i karim ol kago i kam long saplaim ol Momase na Hailans provins. Takis bilong VAT bai stapim Morobe Gavman long pulim mani long ol dispela eria nau. Na dispela em i wanpela as Morobe Gavana i laik kotim Nesanel Gavman long en.

Komyuniti plis wok wantaim lokel level gavman

NAMBA tri lokal level gavman nau i bin kamapim sampela rot long wok wantaim ol plis insait long ol setolmen na blok eria long komyuniti plis. Dispela long luk save long trabel na hevi bilong ol na redi long stretim hariap.

Long strongim kona long wok bilong Provinsel Gavman, ol i bin helpim wantaim sampela mani long tupela wik kibung bilong ol komyuniti plis long Lae siti. Dispela em stat long wara Bumbu na i go olsem long Tentsiti, Bumayong, Anta, Is na Wes Taraka, Omili na Kamkumung.

Olpela bos bilong Pablik Rilesens na nau Provinsel Plis Komanda Sip Inspekta Joe

Samara i tok olsem dispela em wanpela gutpela rot we Provinsel Gavman bilong Morobe i luksave na laik kamapim gutpela sindaun wantaim ol pipel na gavman long dispela rot bilong komyuniti plis.

Em i tok olsem long sait bilong plis, dispela em wanpela bikpela samting we ol i save lukluk na tingting long mekim em, komyuniti polising- stretim gut sindaun wantaim ol pipel insait long setolmen na blok eria.

Em i tok insait long dispela wan wik kibung bilong olgeta PPC na Metsupt insait long kantri las mun long Madang, em wanpela bikpela toktok ol i paitim i go i kam em "komyuniti polising"

"Dispela rot em mipela painim olsem i wanpela gutpela we long daunim ol hevi i kamap insait long wan wan eria. Dispela kibung bilong mipela em karim kaikai bihain long planti miting wantaim metsupt bilong Lae na mi yet olsem PPC we mipela i lukim Provinsel gavman wantaim mani. Dispela em wanpela as tingting bilong mipela," Samara i tok.

Em i tok tu olsem ananit long dispela lokal level gavman bai i gat wankain kos olsem bai kamap long neks yia na tu bai Provinsel gavman bai helpim gen wantaim moni na sait bilong trening wantaim ol risos.

Kundi winim spes long Bombers neks yia

LAE RAGBI LIG RIPOT

OLPELA pawa hos fran rowa bilong Kumuls Simon Kundi bai go bek pilai long Lae Bombers gen long neks yia. Kundi em wanpela bilong ol nupela lain husat nau bai joinim Bombers long pilai insait long SP Inta siti kap resis long neks yia.

Kosa bilong Lae Bombers Steve Malum taim i kolim tim long dispela wik i tok olsem olgeta olpela pilaias i stap yet long tim .

Em i tok, "Mipela laik givim sans long Kundi olsem na mipela i kisim em bek gen long pilai." Kundi i bin stap long nesenel tim taim em i saspem. Ol nupela lain husat ol selektas i makim long joinim Bomber's tim em, Bernard Noibano, David Ako, John Lawrence, Peter Wagu, Tino Hombi na Pius Vaki husat i pilai long Ramu Crushers.

Noibano em save pilai ragbi yunien tasol na em i go pilai ragbi lig. Bombers tim bilong neks yia em, Andrew Pora, Andrew Norman, Brown Wilby, Billy Kissam, Darby Joseph, Daniel Lucas, Eddie Mark, Gilbert Joseph, Iron Ate, Michael Moses, Robert Sio, Theo Keheno na Tony Dai.

Malum husat i bin kamap kosa bilong Bombers long las yia i toktok liklik tasol long tim bilong bipo. Em i tok em i skelim pinis olgeta pilaias na makim ol long laik bilong em long pilai long kompitisen.

Ol opisals bilong Bombers em, Aisi Tau olsem trena na tim menesa em Jim Kari.



• Tupela stail ol pilai bilong Lae Bombers, Robert Sio (lephan) na Andrew Norman husat i winim gen spes long tim neks yia.

Mopi winim Bulolo soka taitel

BULOLO SOKA RIPOT

BIKPELA namba bilong ol man meri i bin kamap long Bulolo Oval long witnessim wanpela namba wan gren fainel bilong Bulolo Soka Asosiesen bihain long planti yias i go pinis.

Dispela gren fainel i bin kamap namel long Mopi na Bulolo Yunited we Mopi i bin soim olsem em i gat moa strong na autim Yunited 3-2 long winim taitel.

Tasol Mopi ino winim taitel ya isi long wanem ol lain Yunited i givim ol hat taim bipo ol i win. Tupela sait wantaim i bin putim aut gutpela stail futbol wantaim ol gutpela difens na atek tasol strong bilong Mopi i moa yet taim ol i save holim bal long lek.

Long dispela as Mopi i bin skoa pas insait long fes 15 minits bilong gem we straike Kelly Koit i ksim gutpela bal na pairapim umben bilong Yunited long brukim kiau.

Ol Yunited i lukim dispela gol na skin bilong ol i kirap na i pait

hat long levolim skoa tasol difens bilong Mopi strong tru olsem simen na ol i nogat sans long kamapim gol.

Pilai i wok long go het klostu long hap taim na Thadelewo Peter i wipim narapela gol bilong Mopi gen taim difens bilong ol Yunited i selek liklik na ksim skoa bilong ol i go antap 2-0.

Yunited kam bek strong long seken hap wantaim sampela gutpela bal wok na lukim tupela stail magi ya Gamu Alung na Robert John i selekim 2- pela gol long levolim skoa 2-2.

Taim skoa i levol em nau tupela sait wantaim i putim olgeta las strong bilong ol skoarim wining gol. Yunited i traim olgeta liklik gem plen long kamapim gol tasol i wok long popaia long mak long wanem ol difendas bilong Mopi tu ya save kam na rausim bal long ol.

Dispela kamap na Keptan bilong Mopi Samson Egaro i lukim olsem na i poret liklik nogut bai sindaun bilong ol i bagarap long ol Yunited. Egaro i kamapim sampela mejik stail bilong pilai we em i lainim taim em i pilai

wantaim LFA Mopi long las yia lukim umben bilong ol birua i seksek taim em i pairapim gol ya.

Dispela gol em ol sapotas na pilaias bilong Mopi i wetim tasol stap na taim umben i mekim nois ol i go long long nabaut lolsem ol i winim pinis taitel long dispela yia. Yunited traim long pait bek long levolim skoa tasol taim tu i sot pinis na Mopi kamap wina 3-2 long ful taim.

Long arapela fainels pilai kamap pinis em, Mt Susu winim Huxley 1-0 long anda 16, Kipes i rausim siket bilong Mopi 1-0 long ol meri na Sangi Ruts autim Kanaks 5-4 long penalti sut aut long primia risef.

Long dispela taim yet man i go pas long Bulolo soka asosiesen Jimmy Gedisa i tok amamas i go long ol sapotas na pilaias long gutpela sapot na pilai long dispela gren fainel.

Long arapela nius, Bulolo asosiesen bai holim wanpela AGM na makim ol nupela eksekutivs long Febuari neks yia.

Wan-but i winim pri-sisen taitel long Kamlaw

FINSAFEN VOLIBAL RIPOT

WAN-BUTT volibal klab em i pri-sison sempions bilong Kamlaw Volibal Asosiesen

kompitisen long dispela yia. Dispela gren fainel we i bin long las wiken i lukim ol lain long Kamlaw autim tiket bilong Shadows 2 set long 1 na winim taitel.

Wan-but i bin stap long namba 4 ples na pair hat i go kamap long gren fainel. Ol i bin pilai wantaim FK na winim ol 2 set na FK 1.

Bihain ol i autim Guadix gen 2-1 na go antap bungim Shadows long gren fainel. Wanpela opisal bilong kamlaw Volibal Asosiesen Lamu Momike i tok olsem dispela gren fainel i bin kamap gut stret we ino bin gat trabel. Ol boi long Wan-but i luk nogut long ol kain stail pilai bilong ol. Ol i putim kamap gutpela pilai olsem setim ol spika's bilong ol long brukim difens blok bilong ol birua.

Yangpela spika ya Gibob lee i bin kamapim gutpela pilai wantaim ol strongpela spik bilong em we ol birua i painim hat long blokim.

Shadows tu i bin kamapim gutpela pilai long setim ol spikas bilong ol tasol ol lain long Wan-but i save sambai tasol taim ol i laik paitim bal i go long sait bilong ol. Long dispela gutpela difens pilai long ol Wan-but em na ol Shadows skoarim planti pions.

Ol Wan-but i bin winim fes set na bihain Shadows i winim namba tu set. Long fainel set em ol lain long Wan-but i lukautim pilai igo inap long pinis we ol i kamap wina bilong pri-sison kap long dispela yia.

Long dispela taim yet Momike i tok bikpela amamas tru i go long Presiden na Vais

Presiden long gutpela wok ol i mekim we dispela pri-sison i pinis gut tru na nogat trabel i kamap.

Em i tok na bai ol tims i redi tasol long neks yia gen long pri-sison kompitisen gen.

Mopi em nupela sempion long LFA

BULOLO SOKA RIPOT

BUSTIN ANZU i raitim

MOPI em nupela sempion long Lae Futbol Soka Asosiesen (LFA) long dispela yia bihain long ol i autim HC West. Ol mangi bilong foma intanesenel gol kipa Max Foster i bagarapim sindaun bilong ol boi long Wes Taraka 3-1 long winim taitel.

Dispela gem bin kamap long LFA pak long las Sande.

Wes i bin pait strong tru long mekim i go insait long dispela gren fainel bihain long bungim sampela namba wan tim long LFA kompitisen.

Long mesa semi fainel long Sarere ol i bin ksim hat taim wantaim Poro bihain long ol autim ol 2-1 long kwalifai long gren fainel long Sande wantaim Mopi.

Mopi i bin autim Poro pastaim long wik na go pas sambai long gren fainel. Kosa bilong Mopi Max Foster i amamas long ol pilaias bilong em long putim kamap gutpela pilai long winim dispela taitel.

Foster tu tok amamas i go long Wes long putim gutpela pilai egens ol boi's bilong em na tu long ol sapotas long givim sapot na taim bilong ol long Mopi i go inap long pinis bilong sison.

Kosa bilong Wes Zemo i tok amamas tu long tupela tim wantaim long kamapim gutpela pilai tasol wanpela tim tasol bai win.

"Dispela fainel em wanpela strongpela pilai tasol Foster i lainim ol mangi bilong em gut tru na ol i winim dispela fainel nating tru long ol mangi bilong mi." Zemo i tok.

Em i tok amamas tu long Foster na ol bois bilong em long gutpela pilai ol i givim egens ol boi's bilong em.

Mopi ino westim taim long stat bilong gem taim straike Jonathan Dote pairapim

umben bilong Wes. Dispela gol i bin kamap long gutpela wok long midfildas Bobby

Tarra, Arth Yema na Moses Beigo husat i brukim difens bilong ol birua na setim Dote long skoa.

Dispela i apim spirit bilong Mopi na taim bal i save stap long lek bilong ol, difendas bilong Wes save wok hat tru long rausim bal long wanem ol save traim gol mak bilong ol ya.

Difendas bilong Wes i wok hat tru na ino larim wanpela gol i go insait tasol taim Mopi i lukim olsem difens i selek liklik nau em i no westim taim na pairapim narapela gol long go long hap taim.

Dispela gol i bin kamap long Moses Beigo husat i setim bal long het bilong em i go painim Bobby Tarra long surikim skoa go antap 2-0 long hap taim.

Bihain long kosa Max Foster i givim liklik toktok long ol boi pinis ol go insait strong

long difendim tupela gol bilong ol tasol kosa bilong Wes Zemo tu i givim strongpela skul toktok long ol boi bilong em na taim ol i kam insait ol i pairapim fes gol bilong ol. Dispela gol i bin kamap long straike Samson husat i ksim wanpela gutpela kik long brukim kiau.

Dispela gol i givim moa strong long Wes tasol Mopi i sambai tasol long ol na ino givim sans long ol long traim mak bilong ol.

Taim tu wok long go pinis na ol pilaias i ksim bikpela bagarap long san tu na ino long taim em Mopi sutim namba tri gol bilong ol long pinisim gem 3-1 na winim taitel bilong LFA long dispela yia.

Long ol arapela fainels, Uni Bulolo winim Poro long anda 19 divisen 2-1, dispela gem i bin pinis wantaim penalti sut aut, Bara autim Goro 2-1 long fes divisen na Blu Kumuls bagarapim sindaun bilong Topick 4-0.

Gren fainel bilong ol meri bai kamap long dispela wiken.

SPOTS WANTOK WILKIN

GORDON TAS RIPOT

Karu helpim Sharks long win

TUKSY KARU wanpela biknem pilaia bilong Papua Niugini Kumuls i go pas long helpim Sharks i autim Sea Eagles 8-6 long Gordon tas las wik. Dispela pilai i bin kamap gut tru we ol pilaia i soim kain stail bilong tromoi bal na trik na pasim long poroman bilong ol.

Senta Tom Nai i brukim skoa bilong Sea Eagles. Em i brukim difens bilong Sharks na ran 65 mita na putim wanpela trai. Em i kikim konvesen na skoa bilong Sea Eagles i sanap long 6 na Sandpiper Sharks 0.

Gima Waringi i brukim difens bilong Sharks olgeta taim tasol em i no save kisim gutpela sapot pilai long ol poroman bilong em.

Samting olsem 5 minit i stap bipo haptaim, faiv-et bilong Sharks Archie Hubert i kikim wanpela fil gol. Na dispela i kirapim paia long ensin rum bilong Sharks.

Orait Sharks i stat long kamapim gutpela gem we huka Jay Gans i tromoi bal i go long Toi Nou na bihain em i salim bal i go long Joe Ove husat i putim trai. Na dispela i surikim skoa bilong Sharks i kam 6-5.

Long namba tu hap, Sharks i tokaut long sapota long Tuksy Karu. Em i no westim taim na stat long go pas long gem plen bilong Sharks.

Em i kikim wanpela penalti gol long hapim sko i go 7-6. Tasim ol Sea Eagles i painim olsem tim bilong ol i lus nau ol i stat long bung gen long stapim Sharks.

Senta bilong Sharks Misina Dai i brukim difens na ran long 60 mita na ol i tasim em. Orait bihain long dispela ol fowat olsem Nixon Mihire, Joe Ove, Brown Gideon, Tony Hoihoi na Jay Gans i wok long go pas logn gem.

Sea Eagles i traim long brokim tasol Tuksy Karu i kikim fil gol na skoa i sanap 8-6 long fainel wisel.

WABAG SOKA RIPOT

Blue Kumuls i winim namba wan spot

BLUE KUMUL i winim namba wan spot bilong gren fainel bihain long ol i winim Teachcom 1-0 las wik long mesa semi fainel bilong Wabag soka.

Na long maina semi fainel, Elcom i wilwilim Kyaku Yuts 3-2 long las minit bilong dispela gem.

Elcom nau bai bungim Teachcom long painim aut husat bai salensim Blue Kumuls long grenfainel long wik antap.

Blue Kumuls i wok long yusim gut save bilong ol long paulim stret Teachcom na win. Maski Teachcom husat i holim taitel long 4-pela yia, ol i nogat inap pawa long daunim ol plisman.

Teachcom i pilai long 7-pela grenfainel bilong Wabag soka na ol i winim 4-pela primiasip.

Vais presiden bilong Hailens Rejinol Soka Asosiesen Ananias Popo i lukim dispela gem namel long Teachcom na Blue Kumuls i tok olsem gem i strong tru na kepten bilong Blue Kumuls Kalowa Fomage i putim dispela trai. Enga soka asosiesen bai i no inap tokaut kwik long maina primia bikos tupela tim wantaim i dro long 35 poin. Tupela tim ya em Blue Kumuls na Teachcom, tasol ol pilaia bilong Teachcom i tok ol i putim planti gol stret ya.

Tasol ol sapota na pilaia bilong Blue Kumuls i pretim ol lain eksekutiv bilong Enga soka long noken givim maina primiasip i go long Teachcom. Sapos ESA i givim taitel i go long Teachcom, ol bai rausim golpos ya.

Ol eksekutiv bilong ESA bai holim wanpela miting stretim toktok long dispela samting.

Ol yut lida i amamas long pikinini spot

SAMTING olsem 107 tisas na ol yut i bin kamap na stap insait long wanpela kos bilong Pikinini Sports long Madang. Dispela kos em trainers woksap.

Dispela ol kos i bin kamap long Malala, Kuseng viles long Not Kos na Karkar haikul long Karkar Ailan.

Insait long namba wan kos, 43 ol tisa na yut lida i bin stap long Malala. Planti ol tisa ya em ol studen long Goroka Tisa Koles tasol ol i malolo long ples. Na long namba tu kos em 39 olgeta.

Las kos long Karkara Ailan i pulim 22 ol tisa olgeta. Na olgeta lain husat i sindaun long dis-

MADANG YUT SPOTS RIPOT

pela kos em ol tisa ya.

Ol lain i sindaun long dispela kos i lainim ol rul bilong liklik ragbi union ol i kolim Pukpuk ragbi, volibal - mini volibal, softball - tibol, netbal, soka - kapul soka na mini basketbal.

Nesanel Kodineta bilong Pikinini Spots program John Hou i amamas tru long namba bilong kosa i kamap long kos. Em i amamas long lukim ol yut lida na tu tisa insait long ol wanwan eria i soim bikpela laik long stap insait long dispela kos.

Ol lain i helpim Hou em Tim


Gawot (PNGSC), Rejinol kodineta CCPS Geo Sam, Madang CCPS kodineta Peter Salaiau, Developmen opisa Paul Pomoso, Sim Walters - basketbal, Madang Distrik CCPS David Malong na Yut lida Dickson Mosong.

Long Karakara, Kila Kila Lema wantaim ol skul inspekta bilong em i amamas long dispela program i go long ples bilong ol. Ol i laik dispela kain kos i mas kamap olgeta taim.

Long soim amamas bilong ol, ol i givim K800 i go long Woksop.

SI WOL KAYAKING RIPOT

Ol boi Manus i kamap namba tu



WANPELA lokel tim bilong Manus i kamap namba tu long Wol Si Kayaking sempionsip long Manus.

Dispela tonamen i bin kamap las mun, tasol ol boi long ples Tulu long Manus i no wari tumas bikos em i namba wan taim bilong ol.

I gat 4-pela memba long dispela tim husat i kamap namba tu. Nem bilong ol em Hillary Poheu, Chris Titim, Andrew Soon na Chris Mohe. Ol i memba bilong Sabuhulan Paddle Spots Asosiesen.

Tim ya i resis aninit long nem Chauka o Manus Team 2. Ol i bin kamap namba tu long Coral Sea Kayaking long Australia.

Manus Tim 2 i winim gol medal long mini marathon na 30km marathon long Wol Si kayaking sempionsip. Ol 4-pela pilaia i kisim 16 medal olgeta.

Tim menesa Tim Saleu i mekim bikpela toktok amamas i go long ol lain husat i sapotim ol ya em Gavana bilong Manus Stephen Pokawin (K6,950), Sunam Enterprise - Miller Loras (K400), Beno Makis long haus slip, Agnes Paliau (K20), Michael Sapau (Shell, PNG) (K200) na tu long olgeta sapota long Manus na viles Tulu.

MOSBI DARTS RIPOT

Moonlight Darts resis i stap long fainel

BIKPELA resis bilong Pot Mosbi Moonlight Dart kompetisen bai kamap long Moonlight Resturen long painim aut husat i sempion tim.

Ol tim bai resis long K3,000 long namba wan prais, wanem tim i kamap namba tu bai kisim K1,000, namba tri K500 na namba foa em K200.

Tonamen darekta bilong kompetisen Mojech Selsel i tok olsem

tupela win long pul A na pul B bai pilai long namba wan spot na tupela tim husat i kamap namba tu long pul A na B bai resis long namba tri na namba foa ples.

Long ol gem i kamap las wik, Gillette i holim yet namba wan ples na Taliu i lus long Cheeky Babes na sindaun long namba tri ples. Cheeky Babes nau i surik i go long namba tu ples long poin lata.

Wina bilong Moonlight las yia Bullets i sindaun long namba 5 ples. Luwanga i sindaun long namba foa ples long lata.


Tingting bilong Cheeky Babes long winim K3,000 bai stap long taim em i bungim Gillett na K Yaka. Mary Holloway na sponsa bilong Cheeky Babes Russel Warvik i mas mekim sampela toktok long strongim tim long win.

Long pul B, Tairox i redi, tasol

long winim dispela K3,000. Tuluan i lus las wik tasol em i holim yet namba tu ples.

Selsel i tok olsem tonamen ya i kamap gutpela tru. Na em i mekim bikpela tok amamas i go long olgeta pilaia na sapota husat i givim helpim long strongim pilai dat insait long Pot Mosbi.


Las gem bilong fainel bai kamap long Moonlight long Fonde.



• Mal Ewald i skelim pitsing bilong Dorcas tasol em i popaia ya.





• Ketsa bilong Gazelle Mathilda Pondriket i wetim bal na Sandra Sawaraba bilong Wantok i sua pinis long hom bes.



• Lephau: Sori susa, yu aut ya. Dispela ating toktok bilong Mal Ewald taim em i laik autim Jenny Pilak bilong Gazelle.

• Aninit: Bernadette Uruna bilong Wantok i paitim bal egens long Gazelle long Pot Mosbi wimen sofbal.

• Aninit: Pitsa bilong Gazelle Dorcas Salaiu i soim kain stail long autim Wantok beta. Tasol hatwok i abrus na Wantok win 17-3.



MADANG SOFBAL RIPOT

Tripela tim joinim kompetisen

HENRY MORABANG i raitim

TRIPLELA nupela tim i joinim Madang softbal asosiesen long dispela yia. Ol tim em Kinhill Krammer, NGI na Lusip Bismark.

Opisel bilong MSA Henry Takaili i tok olsem NGI em i nupela tim we ol pilaia bilong Kabui i bruk lusim na statim dispela tim.

Na ol wokman bilong Kinhill Kramer i statim dispela tim. Lusip Bismark i tim bilong ol sampela lain we Lutheran Shipping kampani long Madang i sponsarim.

Takaili i tok olsem dispela yia i luk gutpela bikos namba bilong tim i go antap na bai kamapim strongpela resis namel long ol tim.

Long men divisen i gat Malangan, Kabi, Newtown Elcom, Tarangau, CMB, Kinhill Krammer na NGI.

Long softbal bilong ol meri, Kalibobo, United Sisters, Karao, Idmons, CMB na Lusip Bismark.

Wanwan klap i mas putim tupela tim - A gret na B gret.

Takaili i tok olsem MSA i makim pinis Bates oval long Madang taun olsem ples bilong pilai. Orait bihain ol bai surik i kam long Divain Wot Yunivesiti oval we ol bai yusim bikpela YC oval.

Madang em i gat nem long klap sempionsip. Olsem na dispela yia, ol opisel na ol wanwan klap bai laik mekim nais liklik long klap sempionsip ya.

RABAU SOFBAL RIPOT

Saint Gilegile i lusim Rabaul softbal

WANPELA nupela tim Sen Gilegile i no soim pes long prisisen bilong Rabaul softbal las wiken.

Meri i go pas long givim nius long Rasa Elizabeth Tami i tok olgeta gem i kamap gut las wik long Pilapila na Nonga oval.

Ol tim i pilai long tupela pul na 4-pela tim tasol bai go insait long fainel. Namba wan na namba tu bilong pul A bai salensim tupela tim bilong pul B.

Presiden bilong Rabaul Amata Sofbal Asoseisen Nelson Paulias i tok em i ama-

mas tru olsem planti moa sapota na pilaia i kamap long namba wan wik bilong prisisen. Dispela i soim olsem softbal long Rabaul i no dai, na i soim tru olsem Rabaul em asples bilong dispela spot.

Em i tok 23 team olgeta i putim nem long resis na Insait long dispela tim, i gat 13 klap i rejista.

Ol tim i kam long tripela lokal level gavman eria olsem Balanatan, Kabi na Sentral Rabaul eria. Planti tim em ol bilong ples we ol famili yet i statim. Na dispela em i gutpela

stret long softbal long Rabaul.

Narapela bikpela samting em, softbal em i namba wan spot long kirap gen bihain long bikpela maunten paia long 1994. Na dispela kompetisen long dispela yia em long traim bringim bek ol sevis i go bek long Rabaul ya.

Nau yet i gat planti ol hotel na bisnis insait long Rabaul taun stret i soim laik long sapotim dispela kompetisen. Wanpela biknem hotel em Hamamas hotel i redi long givim sapot tasol taim RASA i askim.

POT MOSBI WIMENS SOFBAL RIPOT

Biknem Bears i kisim taim

SINDAUN bilong sampela biknem tim i bagarap long Pot Mosbi wimens softbal kompetisen las Sarere.

Biknem tim AB Bears i lus long Mazda 3-1, Royals i wilwilim stret All Stars 8-1, Wantok i nekim Gazelle.

Gem namel long Mazda na Bears i wanpela strongpela gem tru. Bears em i gat biknem olsem kwin bilong softbal long Papua Niugini na tu long Pot Mosbi. Tasol ol yangpela long Mazda i no save kaunim ol dispela kain namba.

Lapun mama bilong Mazda Emma Kalas i go pas long tim. Em i kisim gutpela helpim tru i kam long yangpela olsem Selina Karai, Helen Bunbun na Alice Kalas.

Pitsa Karai na ketsa Bunbun i wok long soim ol biknem pilaia olsem ol i mas lukaut long tupela ya. Dispela em i namba wan win taim softbal kompetisen i stat 5-pela wik i go pinis.

Jonathan Sogae i lukautim Mazda na dispela tim bai kamap wanpela strongpela tim stret ya. Dispela win nau i ken apim tru spirit bilong tim long winim ol arapela gem long bihain taim.

Tupela tim wantaim pilai strong tru i go na nogat wanpela skoa i bin kamap long tripela inning.

Mazda i brukim kiau taim

Bunbun na Shirley ToMangana i ran hom taim sotstap bilong Bears Stephanie Sete i no holim gut bal.

Bears i bekim long Dianne Gideon. Gideon i wok long traim hat tru na planti taim em i save ran hom tasol nogat gutpela helpim i save kam long han bilong ol arapela pilaia ya.

Gideon i paitim wanpela hom ran long em yet i kam hom. Na dispela em wanpela skoa tasol bilong ol AB Bears.


Bears i gat sampela ol rana i stap long bes tasol ol beta bilong ol i no save paitim gut bal long bringim ol pilaia bilong i kam

hom. Ol i mas krosim ol yet long mekim planti ol liklik asua insait long infil.

Mazda i putim wanpela skoa gen taim Alice Kalas i kam hom. Dispela hom i kamap long wanpela asua gen insait long infil eria.

Insait arapela nius, tresera bilong asosiesen Mectil Tonga i askim olgeta klap long baim registresen bilong ol. De bilong baim dispela ol fi bai pas long Novemba 28.

Klap i ken baim man long akaun bilong ol long PNGBC, Waigani. Ol klap tu i ken givim mani i go long tupela meri tasol



• Tu leit wantok mi seif pinis.

POT MOSBI MENS SOFBAL RIPOT

Manalos i dro wantaim Gazelle

GUTPELA pilai bilong Manalos long namba faiv inning i helpim tim long dro wantaim biknem Gazelle long Pot Mosbi Mens softbal kompetisen las Sande.

Dispela gem i strongpela tru we i nogat skoa long tripela inning olgeta. Gazelle i klostu i brukim kiau long namba 4 inning tasol gutpela infil pilai bilong Manalos i stapim ol stret ya.

Tupela pitsa Ismael Marnapal (Manalos) na Patrick Pilak (Gazelle) i kamapim strongpela pilai we long stapim rana long

winim ran ya.

Gazelle i gat sans taim em i gat tripela pilaia long olgeta bes. Tasol Manalos pitsa i no wari, em i givim TKO long beta na olgeta rana i aut.

Peni Pelegia bilong Manalos i traim long bringim ol pilaia i kam hom tasol nogat. Paul Bogan tu i autim bal tasol em tu i no inap olsem Manalos i kam dro wantaim ol.

Manalos inap long putim wanpela skoa tasol Jerry Edward i

guria long lusim namba tri bes na ol i autim ol.

Gazelle i putim skoa long Martin Pius long namba foa inning. Pius i ran i go long namba wan bes taim bekstap bilong Manalos Oscar Karai i no tromoi gut bal i go long pitsa Manalos.

Pius tasol em wanpela Gazelle pilaia i wok long kamapim gutpela gem. Olgeta taim em i save pasim bal na ran long bes. Em i nap long rekotim ol skoa tasol strongpela infil pilai bilong Manalos i save autim em.

Ol pilaia bilong Manalos infil em Robin Lambert (namba wan bes), Dick Bart Jnr (namba tu bes), Pelegia (namba tri bes) na Edwards (sotstap)

Insait long arapela ol gem, AISI Bishman Bears i lus namba tu taim nau long han bilong MSC 4-1. Ol yangpela boi long Elcom i daunim pawa bilong Brown Eagles 7-2, Hawks i rekotim namba wan bilong em egens long Malangan 5-0 na Tigers i autim Dolphins 4-1.

GORDON TAS RIPOT**Strongpela salens long winim taitel ya****LIONEL YOGOMIN i raitim**

BIHAIN long raun siks bilong Gordons Tas kompetisen, ol tim i stat long redim ol yet long traime winim taitel ya.

Long Sarere, Erima Magpies i daunim stret pawa bilong Bulldogs Warrior 14-4. Flat Steelers i autim Bala Raiders 3-2, Lapwing Tigers i dro wantaim Taurama Dragons 6-6.

Long Sande, Blue Heelers i wilwilim stret Teal Rabbitohs. Ol Heelers i amamas kambek bilong faiv-et Gai Lapi husat i wok long go pas long holim stia bilong tim. Ol boi long Gordon Plis Bareks i laki stret olsem Lapi i helpim ol long win.

Tim bilong Tuksy Karu, Sharks i autim tiket bilong Sea Eagles 8-7. Gutpela tingting na kain stail bilong olpela pilaia bilong PNG Kumul faiv et, Karu, i sevim stret tim bilong em.

Panthers i autim Konoba Eels 10-6. Laki stret David Ori i putim traime na dispela i givim stret sans long ol boi Panthers.

Long bikpela gem bilong Gordon Tas, Warriors i waraim stret ol GI Storms 22-0.

Philip Lausewa i putim tupela trai, senta Rex Saun na Joe Roa i putim wanwan trai long helpim tim i go pas long skoa 10-0.

Orait klostu long haptaim, Frank Luvi i putim wanpela trai na Lausewa i kikim na go insait long gol.

Long namba tu hap, ol Warriors i kamapim strongpela gem tru. Lausewa i putim narapela trai gen na fulbek Segewa i kikim konvesin na skoa i surik i go long 22-0. Na dispela i givim hat taim stret long ol boi GI Storm long bekim tasol wara i wasim ya.

Nau yet Gordon Tas i makim tripela man long disiplinari komiti. Na ol komiti ya Augerea Kila, Nelson Moide na Galabu Keoke bai lukautim rap pilai na wanem ol pilai i no luk stret long ai bilong ol sapota ya.

HAILENS SOKA RIPOT**HRSA surikim de bilong tonamen**

HAILENS Rijonel soka bai surikim de bilong op-sisen soka klap sempionsip i go long Disemba 12.

Ol eksekutiv bilong HRSA i tokim Wantok olsem ol i sensim de bikos hetmasta bilong Mt Hagen Haiskul i no inap larim ol i yusim ples pilai taim ol studen i sindaun long bikpela tes.

Namba wan de em Novemba 28, tasol nau ol studen bai sindaun long bikpela tes olsem na ol surikim de i go long Disemba 12.

Nominesen fi i sanap yet long K300. Na wanem ol ting i gat tingting long stap insait long dispela tonamen mas salim mani i go long PNGBC akaun long Mt Hagen. Namba bilong akaun em 400953.

Nau yet 15 klap i soim pinis laik long stap taim ol i baim nominesen fi. Ol klap em 4-pela bilong Mendi, tripela bilong Wabag, 4-pela bilong Mt Hagen na tupela bilong Momase.

Ripot i kam long Lae i soim olsem Tolec Buresong na Mopi bai stap insait long dispela resis ya. Ol eksekutiv bilong HRSA i tok sore tru long dispela senis bilong em taim bilong fainel tes ya.

HRSA em i stat las yia aninit long lukaut bilong David Chung na Ananias Popo. Bikpela astingting bilong statim dispela asosiesen em long strongim wok bilong soka insait long hailens rijen.

HRSA i singaut yet long ol kampani insait long hailens long sapotim dispela tonamen. Ol esekyutiv i laikim K20,000 long holim dispela tonamen.

Warriors i autim Giburi Raiders

WARRIORS autim Giburi Raiders 14-8 insait long Morata ragbi lig resis long Sande.

Dispela win bilong Warriors long Sande em namba faiv win bilong em ol i stap namba wan wantaim 10 poin long lata bilong Morata lig resis.

Long ol arapela gem bilong Sande, Tigers na Jets i bin dro 8-8, KC Hawks winim Megusa 10-8, Mumut i mekim save long Newtown Knights 14-12 na East rausim tiket bilong Talapia 8-2.

East i sindaun namba tu long poin lata wantaim 9 poin na Hawks i sindaun long namba tri ples wantaim 7 poin. Knights i gat siks poin, Raiders, Megusa, Mumuts na Talapia i gat namba 4 ples - olgeta tim i sindaun long namba faiv ples.

Jets i sindaun las tru long dispela resis wantaim tri poin bihain long wanpela win na em i dro wanpela taim.

Stail winga bilong Warriors Dennis Pat i putim tripela trai olgeta long dispela

gem long helpim tim bilong em long daunim pawa bilong Raiders.

Pat husat i gat planti spit na masol i bin katim kona stret na putim dispela tri long winim dispela gem. Fulbek bilong Warriors Pius Umba i bin kikim wanpela konvesin bilong ol na dispela traime i apim skoa bilong Warriors.

Yangpela Giburi Raiders i no wari. Seken rowa Salfa Jogave i bin pilai strong tu insait long dispela na em i putim tupela trai bilong Raiders.

Mausman bilong Warriors Ukiss Kipale i tokim Wantok niuspepa bihain long dispela win olsem ol i redi tru long mekim save i go inap long gren fainel.

Kipale i tok "Mipela i winim faivpela gem olgeta na mi ting mipela i ken go olgeta long fainel ya.

Em i tok tasol i gat planti hatwok i stap

MORATA LIG RIPOT

yet we mipela mas mekim bhiahin long mipela i ken kamap insait long gren fainel.

Ol fowat bilong Warriors Peter Naipao, Joe Gene, Kulux Topake na Philip Akai i bin mekim save tru long ol Raiders insait long dispela gem

Tupela senta bilong Warriors Sailas Arax na Michael Embi i bin givim gutpela helpim tru long Pat husat i bin putim ol trai bilong Warriors.

Faiv-et bilong Raiders Jacob Dina, hapbek Manesa Ilari, na fowat Jim Guraibo na huka Steven Apamo i bin pilai strong tru tasol ol Raiders i bin lus insait long dispela resis.

Jogave i bin putim tupela tyrai bilong Raiders long seken hap bilong pilai, tasol ol Warriors i strong kona bilong ol long winim dispela resis ya.

• Ranuguri Tigers i redi tasol long mekim nais long Saut Setelmen Ragbi Lig resis.

**GOROKA LIG RIPOT****Hawks i laik kirap gen long Goroka**

HAWKS ragbi lig klap i redi long joinim bek Goroka ragbi lig kompetisen neks yia.

Tingting bilong joinim bek kompetisen i stat long namel bilong dispela yia, na nau i kamap bikpela tru namel long ol sapota bilong Hawks klap.

Plantil ol bisnis man na ol politisen tu i givim sapot long statim gen dispela klap tong kol ples Goroka.

Presiden bilong Goroka kaunsil Bob Makive i givim K3,000 long mani plen long olgeta yia na bisnisman Akapite Wamiri bai go pas long lakautim sait bilong

wokim bisnis na mani bilong klap.

Gavana Jenerel Sir Silas Atopare husat i wanpela olpela pilaia bilong dispela klap i tingting long sapotim sapos klap i strong tru long stat neks yia. Sir Silas em wanpela resa mangi long gut-taim bilong em, em i save pilai hapbek bilong Hawks klap.

Ol sampela biknem pilaia olsem brata long Kuso famili olsem Daniels, Robert, Samula Lawrence na Gordon, Nepsan Napa, John Barry, Otto Wasime, Elvis Aaron, Korokoro Anukam, Eddie Tom, Jackson Leko, Yer

Bomb, James Gohu, Get Wamiri, Tony Oge, Albert Wamiri, Fama Laulau, Enoch Asineha na Annie Biari i strong long klap i mas kambek gen long Goroka taun.

Bikpela tingting em long larim ol mangi long ples Okiufa, Ifiyufa na Kabiufa i mas pilai insait long taun kompetisen.

Hawks klap i dai bikos ol Okiufa pipel olsem presiden bilong Goroka lig nau Jacob Aeno, Ipai Maniha, Marco Corringa, Nelson Iapakioa, Bio Sari na Lesslie Hoffman i lusim na joinim ol arapela klap.

I tru disisen bilong PNGRFL em long daunim namba bilong tim. Tasol Hawks i gat bikpela bilip olsem ol bai joinim Goroka Ragbi Lig neks sisen.

Olpela presiden bilong Goroka Tigers Annie Biari i kamap presien na Albert Wamiri em i namba tu. Russell Barry em i sekretari na Get Wamiri em i tresera.

John Kotu em i kosa na Robert Kuso em i trena bilong klap.

Goroka bai holim jenerel miting bilong em long dispela wiken long stretim toktok bilong kompetisen long neks

WANSOLWARA NIUS

Pago Pago, Ameriken Samoa

Wari ol bisnis man
bilong Esia
laik tekova long
Ameriken Samoa

Ol bikman i wari long ol bisnis-
man bilong Esia, i laik tekova
long ol wok bisnis long
Ameriken Samoa.

Na Gavana bilong Ameriken
Samoa Tauese Sunia i sutim tok
long ol asples pipel yet long ter-
itori bilong larim ol bisnis lain
bilong Esia i sanapim na go
groom strong ol wok bisnis
bilong ol.

Gavana Sunia i wokim dispela
toktok bihainim singaut bilong
narapela bikman, memba bilong
Kongres Faleomavaega Eni
Hunkin husat i laikim gavman
long mekim samting long ol bis-
nis lain bilong Esia long wanem
ol i tekova pinis long ol asples
pipel long sait bilong sanapim
ol bisnis.

Gavana Sunia i tok ol asples
pipel yet i larim ol bisnis lain
bilong Esia i tekova long ol
bikos ol i wok long kisim ol
olsem ol bisnis patna.

Gavana Tauese i tok em bai
sekim wantaim Asembli long
strongim na sekim gut ol lo
bilong givim aut ol laisens long
wanem i luk olsem sampela
asua i mas kamap na dispela i
larim planti bisniskampani
bilong esia long go insait long
Ameriken Samoa.

Tarawa, Kiribati

Kiribati kru
i stap orait

Ileven Kiribati kru memba bilong
DG Harmony, wanpela kago sip
bilong Gemeni i bin ronawe lusim
sip na ol i stap orait bihain long sip
i paia.

Birua i bin kamap long nambis
bilong Brazil, Saut Amerika we sip
i bin stap long en na paia i kamap
bihainim wanpela pairap long hap
bilong sip we ol kago i stap long
en.

Saut Pasifik Marin Sevis, kama-
pani we i bin kisim ol kru bilong
Kiribati long go wok long sip ya i
tok olgeta kru memba i stap orait
na nogat man i bin kisim bagarap
taim birua i bin kamap sip long las
wik.

Ripot i tok narapela sip we i bin
stap sambai i bin kwiktai helpim
ol kru na ol arapela taim sip i
bungim trabel. Ol bin kisim ol kru i
go long wanpela militeri sip we i
usim ol long wanpela bris long
Brazil na long hap ol i wetim ol lain
bilong ol i stretim wokbaut bilong
ol.

Honolulu, Hawaii

Palmyra Atol bai kamap
olsem wail laip risev

Ol toktok i go het nau namel
ong Fullard-Leo famili na
invaironmen grup bilong Hwaii,
Netja Konvensi long tanim
Palmyra Atol long i kamap
olsem wanpela Nesenel wail
laip Risev.

Fullard-Leo famili bilong



Famili ya i winim awod olsem Family ov the Yia • L-R: Mama Narelle, Greta i gat foapela kris-
mas, Ricky, 6 yias, Daniel wantaim 10-pela krismas na papa Michael. Neele famili bilong Kwinslen i kisim i winim resis long Famili
bilong yia. Angliken Rilesens na Kaunseling Sevis Kineksens i bin holim dispela resis na moa long 50 famili i bin stap insait long en.
Tasol laki wina em dispela Nelles famili bilong Kwinslen.

Amerika i papa long dispela
ailan. Em i stap not long ol Lain
Ailan grup bilong Kiribati na
samting olsem 1,000 mail saut
long biktaun bilong Hawaii,
Honolulu.

Ailan i nogat lain long en tasol
tupela keateka o man husat i
lukautim ailan i save stap long
en. Long Wol Wo 2, ol bin yusim
ailan olsem militeri beis na nau
planti ol man long Pasifik husat
i gat ol liklik sip i save yusim
olsem stop ova poin.

Long 1996, wanpela kampani
bilong Amerika, KVR i bin laik
baim ailan na yusim long putim
ol nuklia pipia tasol planti ailan
kantri long Pasifik i bin egen-
sim.

Nupela askim em long Netja
Konvensi long baim dispela
liklik ailan teritori bilong
Amerika long ol papa bilong en
em long Fullard-Leo na givim i
go long US Fis na Wai Laip
Sevis bilong mekim em i kamap
olsem Nesenel Wai Laip Refuj.

Suva, Fiji

Meri Fiji kisim
rekot kompensesen
manimak

Wanpela meri Fiji i kisim rekot mak
long kompensesen bilong Stet
long Fiji bihain em i putim komplek
long asua we han bilong Stet i
wokim long en.

Hai Kot long Fiji i odaim
Gavman long peim US\$252,447
long wanpela meri husat i bin
kisim bagarap taim wanpela ami

trak i bamim em na em i no inap
long wokabaut nau. Birua i bin
kamap long yia 1994 long Taveuni,
Vanua Levu.

Nem bilong meri ya em Lusiana
Rokodovu na em i gat 30 krismas.

Bihainim birua long 1994, meri i
save sindaun tasol long wilsia.
Birua i bin kamap long Julai 1994
taim Mis Rokodovu i bin stap long
wanpela ami trak wantaim ol ara-
pela ples lain taim trak ya i kapsait
na faipela pipel i dai long en.
Sampela i bin kisim bagarap na
Mis Rokodovu i wanpela long ol.

Suva, Fiji

PINA Presiden
stap long Fri Tred
na Midia bung

Presiden bilong Pasifik Ailans
Nius Asosiesen (PINA) William
Parkinson bai i stap insait long
Intenesenel Monitering Grup
long Fri Tred na Fri Midia long
Kuala Lumpur.

Mista parkinson i bin lusim
Suva, Fiji long dispela wik
bilong stap insait long bung
bipo long narapela bikpela
bung, Esia-Pasifik Ikonmik
Koporesen forum i kamap.

Monitering grup i hap long
wanpela progrem ol i kolim long
Open Maket na Open Midia we
ol bin lonsim las yia long
Vankova, Kanada las yia bipo
long APEC bung.

Bung long Kuala Lumpur bai i
sut long Fri Nius Midia na rot em
i ken bihainim long
kamapim gutpela tred na

ikonmik developmen.

Solomon Ailans

Solomon Ailan
bai rejitaim
kastomeri graun

Wok long rekotim ol kastomeri o
graun bilong ol asples pipel long
Solomon Ailans bai i kamap long
neks yia.

Tasol nau ol i mekim ol wok redi
long dispela samting na ol i statim
dispela wok pinis long Malaita
Provins.

Seketeri bilong kastomeri Len
Rekoting opis George Scott i stap
nau long Malaita bilong tok klia
long ol bikman long dispela sam-
ting.

Mista Scott i tok opis i laik bai ol
pipel i klia long dispela samting, as
long opis i laik rejiteim kastomeri
graun bipo wok tru i stat long neks
yia.

Nuku'Alofa, Tonga

Baron Vaea
bilong Tonga
lukluk raun
long Japan

Praim Minista bilong Tonga,
Baron Vaea i stap long wanpela
lukluk raun wokabaut long
Japan bilong luklukim ol sam-
ting we ol i wokim wantaim nuk-
lia pawa.

Gavman bilong Japan i bin

putim askim i go long ol lida
bilong ol Saut Pasifik kantri
long taim bilong Forum bung
we ol bin holim long Pohnpei,
Federetet Stets bilong
Maikronisia long dispela yia.

Baron Vaea bai i lukluk long ol
hap we ol i save lukautim ol
pipia bilong nuklia pawa long en
na tu ol kain projek we i save
yusim nuklia pawa long en.
Japan i save kism nuklia pawa
long karimaut ol wok bilong
em.

Gavman bilong Japan i lukau-
tim wokabaut bilong Baron
Vaea.

Nuku'Alofa, Tonga

Prins Andrew
lukluk raun
long Pasifik

Duke ov York, Prins Andrew em
namba tri pikinini bilong Kwin bai i
mekim wanpela wokabaut lukluk
raun i go long Tonga long dispela
wik.


Ol ripot long British Hai Komisn
i tok Prins Andrew i bin krugutim
Fua'amotu long Oklen Nu Silan
long aste.

Wokabaut bilong Prins Andrew
em i hap long opisel visit i go long
Nu Silan, Tonga, Samoa na Fiji.

Long progrem bilong em, Prins
Andrew bai i dring ti wantaim King
Taufa'ahau Tupou 1V na Kwin
Halaevalu Mata'aho long Royel
Pales. Em bai i lukluk raun i go
long Tonga hai skol, Royel Skul ov
Saiens wokim wanpela ailan raun
long swim na fising bipo em i go
long Samoa.

Indonesia stap long hevi

Ol pait balus na sip bilong Amerika redi long straik long Iraq



Lukaut hia em paita balus bilong Amerika, Stelth paita i stap long Kuwait na i redi tasol long strai egsim ol Iraki taget.

Moa paita sip na balus bilong Amerika i stap nau long Pesien Galp long stap redi tasol long pait sapos Presiden Saddam Hussein bilong Iraq i kik-bek na i no harim askim bilong intenesenel komyniti long larim ol Yunaitet Nesens wepons inspekta i karimaut wok bilong ol.

Ol kain kwesten i kamap olsem inap ol i kilim dai Saddam Hussein o olsem wanem?

Klostu Amerika i karimaut wo wantaim Iraq, sampela bikman na saveman long gavman bilong Amerika na Iraq i tok rot we Amerika i bihainim i no gutpela. Sampela i ting olsem i moabeta sapat Yunaitet Stets i makim Saddam. Tasol aninit long lo bilong Amerika, dispela i egsim lo bilong ol we i tok noken kilim dai ol lida bilong arapela kantri. Gavman bilong Bill Clinton i tok tu olsem wok bilong ol i no bilong rausim gavman bilong Saddam.

Saddam husat i gat 60 krismas nau i abrusim tupela wo na planti arapela ol belhevi we kantri aninit long lidasip bilong em i bungim.

Biknem paitman laikim birua long Amerika na Israel mas dai

Carlos narapela nem bilong em Jackal husat i mastamain bilong ol teroris i stap long hanga straik long tenpela de nau i laikim bai ol Islamik paitman i kilim dai ol Ameriken na Jews pipel.

Em i tokaut long laik bilong em long long wanpela ripot ol i kolim long wil. Carlos wantaim 49 krismas i bilong Venezuela, saut Amerika na trupela nem bilong em em R a m i r e z Sanchez.

Carlos i stap long kalabus long Frans inap long em i dai bilong ol rong em bin mekim long kilim dai narapela man long Frans na long ol arapela bom birua long 1970 na 1980.

Em i laikim olsem long wan wan de em i sliip long kalabus, wanpela birua bilong Amerika na Israel i mas dai.



Ol piksa na stori i kam long THE COURIER MAIL

Long las Fonde, plis long Indonesia i bin pait wantaim ol lain i wokim protes long no soim amamas long gavman bilong Presiden Habibie. Ol yunivesiti sumatin i go pas long ol dispela protes. Pipel i no laikim gavman bikos ol i tok dispela gavman bilong Presiden Habibie em i han bilong olpela Presiden Suharto we i no serim pawa wantaim ol pipel, paulim mani, wokim ol krangi pasin na i no givim fridom na bihainim pasin demokrasi. Dispela em ol samting we pipel i laikim na i luk olsem nupela gavman bilong Presiden Habibie i no mekim kamap.

Laik na strong bilong ol pipel bilong Indonesia yet long gat demokratik gavman we i luksave long ol rait na fridom i bilong ol i bin rausim olpela gavman bilong Presiden Suharto long mun Me long dispela yia i no lukim yet gutpela kaikai wantaim nupela gavman bilong Presiden Habibie. Ikonomi na sindaun bilong

Indonesia na pipel i bin bagarap na i no orait yet.

Ol pipel i sutim tok long gavman bilong Suharto long paulim mani na wokim krangi pasin na tu famili na ol hauslain na poroman bilong em i pulim mani bilong kantri, strongim ol wok bisnis bilong ol long kamap ris.

Insait long wanpela bung ol i holim bihainim ol protes we ol sumatin na pablik i kamapim yet, ol atoriti i tok ol bai karimaut demokratik ilewksensd long mun Me o Jun neks yia.

Tasol planti pipel i no amamas long ol memba bilong Pipels Konsaltativ Asembli (MPR) we ol i bilip olsme ol poroman bilong olpela Presiden Suharto i stap insait long en na olsem bai kantri i no inap long kisim trupela demokratik gavman. I gat ripot olsem ol loman i tagetim olpela lida, Presiden Suharto na famili bilong em long

ol wok painimaut long daunim pasin bilong wokim krangi pasin na paulim mani.

Planti pipel i no bilip olsem MPR bai i karimaut wok em i tok long em long daunim ol paul na krangi pasin na tu wok long bringim trupela demokresi na fridom long kantri.

Olsem na ol i singaut long Presiden Habibie long lusim sia olsem lida bilong kantri, long rausim militeri long gavman we ol i holim 75 non ilektet sia na kisim Mista Suharto i fesim kot long pasin na rot i no stret em bin wokim long em na famili bilong em i kamap ol ris man wantaim ol samting we i bilong ol pipel.

Tupela pipel i dai pinis na planti moa i kisim bagarap long ol protes na pait we ol sumatin i go pas long en long Jakarta na Sulawesi. Wankain samting i kamap long ol strit long Medan, Sumatra, Ujupandang na Surabaya we planti hundred sumatin na pablik igo hetim ol protes.

Prins Charles bai wet hamas krismas moa long kamap king?



• Long hansut antap, Prins Charles wantaim tupela pikinini man bilong em, Prins William na Harry.

Prins Charles i wet long kamap king tasol long hamas krismas moa?

Las wik long Novemba 13, Prins Charles i bin amamasim 50 krismas tasol taim mama bilong em husat i gat 72 krismas i stap laip yet olsem Kwin, Prins Charles bai no inap kamap King yet. Na sapos Kwin i bihainim mama bilong em Kwin Mada husat i stap laip nau wantaim 98 krismas, Prins Charles bai i wet longpela taim long kamap olsem King. Narapela samting tu em pikinini bilong em Prins William husat i gat 16 krismas nau i wok long kamap strong na papa bilong em bai i lainim em long rot bilong kamap olsem King tu.

Ol ripot i tok bihainim dai bilong Prins Diana Prins ov Wales las yia long birua bilong ka long Paris, Frans

taim pablik i bin egsim em (Prins), em i wok long kisim gutpela nem bek gen.

Ol ripot i tok Kwin i no bungim yet pren meri bilong Prins Charles long 25 krismas Camilla Bowles Parker husat i bin wanpela as long tupela Prinses Diana i brukim marit.

Long ol ripot, Kwin i no amamas tumas long bungim em tasol tupela pikinini bilong Prins Charles i bungim meri ya pinis.

• Prins Charles husat bai i kisim ples bilong mama bilong em na kamap King bilong Ingran taim em i bebi wantaim mama, Kwin Elizabeth. Long las wik, Prins Charles i bin amamasim 50 krismas bilong em.



Ol mangi Sepik bagarapim Mamose soka tonamen

MI WANPELA mangi Madang nau i stap long Wewak husat i no amamas long dispela namba 4 de bilong dispela Momase Soka tonamen i kamap long Wewak long wik i go pinis. Tripela de i bin kamap gut (KDSA na Wewak) i bin pilai gut stret tasol ol wanwan sapota bilong Wewak wan i no soim gutpela pasin long ol KDSA tim pilaias. Mipela i bin amamas tru na expektim olsem bai fainols i kamap gut tasol nogat.

Wanwan pipia mangi tasol i save bagarapim nem bilong olgeta gutpela Sepik na taun bilong mipela Wewak.

Klostu wankain samting i bin kamap long ol meri husat ol kam long Momase Basketbal tonamen long Wewak las yia.

Mi laik askim ol man husat i save mekim ol kain pasin olsem long traim na senis plis. Yupela i save mekim olsem na hau bai taun na ol samting i develop o senis. Kain ol pasin olsem i save kamap mi no ting ol lain save baim geit na go insait save mekim. Ol

lain i brukim banis na go insait em ol ausait i save mekim ol kain bikhet nabaut.

Narapela wari bilong mi em i go long referi husat i bin refim dispela gren fainol. Long lukluk bilong mi na tu planti i lukim olsem dispela namba tu gol bilong ol KDSA i bin klia gol stret. Dispela gol i winim gol bilong KDSA olsem na ol i no laik pilai gen long ekstra taim.

I luk olsem tupela yelo kad i go long ol pilai bilong Wewak wan tasol referi i no bin givim waning long ol. Dispela kain bilong yupela ol referi na yupela i save kisim pen long sampela hap. Na dispela i no fea. Yupela traim wokim wok hones.

Bilong pinisim, plis ol mangi Sepik husat i save kamapim kain pasin olsem, senisim pasin bilong yupela.

Em tasol liklik wari bilong mi.

**John Lau
WEWAK**

Wewak no save long pilai soka

MI LAIK tok stret na tru olsem. Mi i no amamas long ripot bilong Momase Kap. Mi ting ripota i mas pretim ol lain Wewak. Sori long mi tok olsem tasol mi tu mi lukim wanem samting i kamap long Tunde 27/11/98 long Prins Charles ovel. Long second hap bilong pilai ol sapotas bilong asples i stat long nem bilong shot na sut long ol pilaias bilong KDSA o Kaiapit.

Ol tu i man hia olsem na ol i lusim pilai graun. Pasin Wewak i mekim i soim stret olsem ol i nogat bun bilong pilai soka.

Maski long teknikal graun nabaut hia. Gavana bilong Is Sepik tu i stap tasol Wewak i nogat tru rispek long lapun Somare.

Mipela i westim mani long dispela pipia geit na i no amamas long lukim pinis bilong pilai nogat tru. Kain ol senta olsem LFA, Madang taun, Lahi, Vanimo na Wewak i mas pilai gut na lainim mipela ol liklik senta olsem Angoram, Wosara Gawi, Bogia,

Aitape, Kairiru, Wau, Bulolo, Karkar, Saidor, Lumi, Nuku na planti moa i no long kros na pait nabaut na i no lainim ol liklik senta.

Sapos Kaiapit inap wokim long fainols olsem wanem long Angoram o Kairiru Ailan o Aitape?

Ol traipela man long dipatmen bilong Is Sepik olsem Tom Fantim na sampela moa i long-long man tasol i no gutpela bos liklik.

I no tingting olsem spot em i samting bilong amamas na bung wantaim.

Mi bilip Wewak em i olpela taun na olgeta man tu i lapun long pilai soka.

Pilai stantet bilong Wewak i daunbilo tru, ol Tek long ailan o nupela long Angoram i winim ol Wewak tru. Wewak i wankain olsem traipela bel. Yupela ol lain long Wewak tu i bagarapim gutpela nem bilong yumi Is Sepik.

Mi ting tu olsem Wewak noken

hostim Momase Kap Tonamen bihain taim bikos ol i no save long wok spot na wanem samting em pilai. Wanpela i mas win.

Sapos long gutpela spirit bilong pilai ating yu tasol mi tok pinis Wewak i laik traim kilim soka long provins na Momase rigen olgeta.

Long 1999 em KDSA Kaiapit bai i go long fainol yet wantaim husat? Wewak? Nogat tru em bai Lahi o Madang.

Plis Wewak yusim gut ol pumkin het bilong yupela. Yupela i bringim sem stret long provins na mipela Sepik i no olsem.

Kam long Angoram bai Maningulai i tisim yupela long soka. Dispela soka Wewak i save long en em bilong ol wokman bilong ol plantesen kokonas ol lapun i wok bipo long Rabaul o Niguria Is o long Wau na Bulolo long 1947 i kam gen long Wewak.

**Ango Rum
WARA SEPIK**

Bill Skate yu mas risain hariap long palamen haus

TINGTING bilong olgeta manmeri bilong PNG Bill Skate yu mas risain hariap long palamen haus. Bill skate yu laik bagarapim dispela kantri.

Yu kamap olsem pik o dok na kirapim skin gras bilong yu na yu rausim tupela lida Mista Chris Haiveta na Michael Nali. Na ol narapela memba bilong pati bilong tupela.

Yu rausim disela tupela lida insait long bel na tingting bilong ol pipel i no stret. Dispela tupela lida em tupela papa tru bilong dispela kantri PNG.

Yu mas pilim sem pipia na yu lusim praim minista sit.

Bipo taim bilong Sir Michael Somare na Paia Wingti na Sir Julius Chan, dispela kain birua pasin i no save kamap. Ol i save wokbung wantaim na kirapim wok long dispela kantri. Taim yu Bill Skate kamap praim minista, yu laik kamap olsem God bilong dispela graun. Ol disisen yu yet yu wanpela i wokim.

Planti taim yu brukim lo bilong dispela kantri. Yu laik kapsaitim dispela kantri na yu mas lusim praim minista sit hariap. Oposisen i ken ronim dispela kantri bilong em.

Bill Skate yu kempen long 1997 yu tokaut olsem "Mi laik pait long korapsen."

**Wendia Tokur
Tekanda Viles, SHP.**

Papamama pasim ol pikinini long skul

MI WANPELA siaman bilong Bod ov Menesemen bilong Kriel Komyuniti Skul na tu ex-viles kaunsel bilong Aitape Sentrel Inlan Konstituensi long Aitape Distrik long Sandaun provins.

As tingting bilong mi long raitim pas ya i go long Edita bilong Wantok em long kirapim bel na tingting bilong ol papamama na komyuniti bilong ol dispela ples:

Kopom - Paiawa Kara na Ousi, long wei ol i save abrusim ol gutpela sitisens long kisim gutpela save na lainim nupela sindaun. Bipo ol tumbuna i gat stail bilong sindaun bilong ol. Tasol nau i narakain olgeta. Olgeta manmeri, yangpela i mas save long tok Inglis, rit na rait em i bun tru bilong mipela olgeta.

Tasol bikpela samting i stap long dispela komyuniti em les na bikhet pasin i daunim ol pikinini long i go skul long Kriel Komyuniti Skul. I nogat tru tim wok na spirit bilong wokbung wantaim lidas bilong skul, viles kot na Komyuniti lida. Ol manmeri i stap long laik. Nogat wok komyuniti inap planti yia. As em i olsem, planti manmeri long komyuniti i no bin go long skul.

**Mista Simon Sapar
AITAPE**

Developmen i sting long Madang



• SAPOS YU NO LUKAUTIM BUS GRAUN BILONG YU, BAI YU NOGAT KAIN ROP BILONG DRING KLINPELA NA GUTPELA WARA.

MI LAIK bekim pas bilong brata Kevin Kasek Po'o bilong Siar Ples. Pas bilong em i bin kamap long Post Courier long Fonde Novemba 12 1998. Long dispela pas, em i tok olsem em i makim maus bilong ol lain pipol long ples Nagada, Sagalau, Siar, Nobonob na ol ples klostu long nupela tinpis faktori. Mi laik sapotim Kevin na tok amamas olsem wanpela man bilong dispela hap i gat strong long tokaut long bel hevi bilong em.

Gavman bilong yumi: Lokol, tuminsal na nesinel, i laikim tumas ikonmik developmen. Long dispela wankain pasin, mipela ol papa graun tu i laikim tumas ol gutpela samting bai mipela i kisim long ol dispela projek, mipela i no tingim ol nogut sait bilong ol.

Long sait bilong mipela ol pipol bilong Madang, dispela em i stat tasol, bikos Madang Provinsel Gavman i gat planti moa plen bilong kirapim provins Gavman i save olsem dispela ol developmen projek bai bagarapim planti samting, tasol em i no bisi long dispela bikos em i laikim mani.

Taim RD Kening i bin stat stret, ol i tok long wokim wan-

pela "zero-dicharge plant" (wanpela hap we ol rabis long faktori i ken go bung na bai ino inap long bagarapim ples). Mi laik save long wanem hap stret RD Kening i sanapim dispela faktori.

Long pas bilong Kevin, em i laik save long wanem as faktori i wok long rausim olgeta rabis bilong em i go insait long Kapundik wara. Na tu dispela ol hap arere long RD Kening i sting nogut tru. Yumi gat ol helt inspekta long Madang we i ken sekim ol dispela samting tu o nogat? Mi laik save tu long wanem samting Nesinel Dipatmen bilong Envaironmen na Konvesesen bai tok long dispela pasin i kamap. Na Gavman bilong Madang na mipela ol papa graun inap long wokim wanem samting long stapim dispela pasin?

Namba wan samting yumi ol pipol bilong Madang i mas kilia long em, em RD Kening i no kamap long helpim yumi, ol i kam hia long mekim mani. Long wankain as tasol, Jems Bans, tobako faktori, Jant, Madang Timba, Ramu Suga na ol narapela kampani i kam statim bisnis insait long Madang.

Tasol dispela ino pinis bilong ol dispela sting smel RD Kening i wok long kamapim long Madang. Nau Madang Gavman i putim ikonmik developmen olsem namba wan samting long lis bilong em. Yumi bai kisim bik taim moa. Sapos yu wanpela man i wok long ting olsem smel RD Kening i wokim em sting nogut tru, wet inap gavman i statim wok long ol narapela projek bilong em. Kurumbukari (Ramu) Nikel na Koba! main, CDC Wel Pam Projek, Frut Processing Faktori na planti moa i wok long kamap.

Mi laik singaut long olgeta risos ona long noken larim ol developa na gavman bilong yumi i paulim yupela. Ol i tingting long wokim mani tasol. Noken bihainim mani olsem ol i wok long mekim. Ol risos bilong yumi i bikpela moa long mani. Tingim, yumi gat moa pawa bikos graun na olgeta samting long en em bilong yumi. Yumi gat pawa long tok orait long husat stret yumi laikim long kam wokim bisnis long graun bilong yumi. Long dispela as, yumi mas yusim gut dispela pawa bilong yumi.

Sapos yu laik salim ol pas bilong yu i kam long dispela nuispepa, Salim i kam long dispela adres:
**THE EDITOR
WANTOK NEWSPAPER
PO BOX 1982, BOROKO,
NCD.**

OPM noken givap

TENKYU tru long printim dispela pas mi bin ridim long Wantok Nuispepa, olsem Mista Mathias Wenda lida bilong OPM, pait man i go salim pis tok long lote Katolik misin Vanimo, olsem OPM pait man noken pait moa ol bai wetim toktok kam long Rom. Mi strong sapota bilong OPM, mi askim brata Wenda noken harim gris bilong ol man, nogut ol giamanim yu.

Brata Wenda, tingting gut pastaim bihain mekim disisen, Pope - John Paul II, i no inap givim independens long Wes Papua, Rom, i no United Nations. Olsem na Mista Wenda yu noken stapim ol pait man na yu yet mas lidim ol pait strong moa i go inap yu rausim Indonesia aut long Wes Papua, Mista Wenda noken givim sans long ol moa. Mi askim gavman bilong PNG, mas kirap na sapotim pait bilong pipel bilong Wes Papua, inap 23 yia nau. Gavman i pasim maus, tumas, praim minista Bill Skate, yu poret long sapotim ol Wes Papua stragel, yu noken harim giaman bilong Australia. Tingim gut nau taim bilong rifom long olgeta hap graun olsem na PNG kirap nau sapotim ol brata bilong yumi bikos taim bilong Indoensia klostu bai pinis.

Em tasol liklik wari bilong mi na lukim yupela sampela taim bihain.

**ToMalana Ulateva
RABAU**



PNG HIT PARADE

1998

Sponsors - TRADEWINDS

W/B	LW	T/W	SONGS	ARTISTS
1	1	1	Rumaruma Te Mou'a	New Generation
2	2	2	Fenua No Te Penu	New Generation
8	3	3	Amari Ute	Patti Doi
3	4	4	Hau Bai Yu Save	Lista
1	7	5	Boen Sarere	Feedback
4	5	6	ToDes	Quakes
17	12	7	Madang	Demas Saul
12	11	8	Yu Kirap	Dirty Beggars
7	8	9	Halfie	Lista
6	6	10	Aitape Mi Wari	Kabu Rita
10	10	11	Takere Medley	Original Sirois
20	19	12	Sore Daddy	Patti Doi
11	9	13	Kalo Beach	Azzimbah
0	20	14	Mama Bilong Mi	Lista
18	13	15	Wari	Azzimbah
5	14	16	Aitape	Patti Doi
15	17	17	Rabaul	Patti Doi
16	18	18	Kerere Garina	Guystars
9	15	19	Sissano	John Wong
0	0	20	Samarana	Vatdoro

IN: Samarana Vatdoro

OUT: Fugu Fugu Azzimbah

PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

LAI PSTAIL

Lapun mama stori long birua bilong solwara

BIKPELA solwara nogut i bagarapim plant laip na samting bilong pipel long Aitape Distrik long Julai 17, 1998. Na wanem kain pipel i dai o stap laip long en bai i kamap olsem wanpela tumbuna stori long laip bilong planti pipel insait long Aitape, PNG na long ol ples. Hia em wanpela trupela stori we i kamap long laip bilong wanpela mama na liklik tumbuna meri bilong em. Tupela i bilong Tumleo ailan, tasol ol i save sindaun long bikples ol i kolim Yakoi.

FELIX RAMRAM i raitim



• Birua bilong Tsunami solwara i brukim ol haus na mekim pipia long ples. Ol foto: PETER MAIME.

Long san, mipela ogleta i go wok gaden i go inap apinun tru, samting olsem hap pas 5 (5.30pm) taim mipela i kam bek long ples. Papa bilong mipela i go turis raun long Vanimo long dispela taim na mi wantaim ol pikinini bilong mi na ol tumbuna tasol i stap long ples.

Lapun mama ya i toktok na tingting bilong em i sut i go long dispela bilakpela de o dispela taim nogut. Dispela tu i putim aiwara long ai bilong mi yet bikos mi ken pilim tu dispela pen lapun mama ya i gat. Moa long en ol pipia na ol bagarap bilong haus bilong lapun mama na famili bilong em istap nabaut yet arere long ples. Lapun mama ya em famili bilong mi tu.

Mama ya em Misis Regina Waillel wantaim liklik tumbuna meri bilong em inap dai pinis long dispela birua. Tasol bikos long strongpela bilip bilong mama ya long God, em wantaim liklik tumbuna meri bilong em Glorina nau i stap laip yet. Krismas bilong Misis Waillel i olsem 48 na Glorina em tripela.

Lapun mama ya i tok bihain long em na ol famili i sindaun malolo liklik, em wantaim Glorina i kirap na go mekim paia long haus kuk na redim ol kaikai bilong dispela Fraide apinun. Olgeta arapela famili memba i sindaun i stap long wesana ausait long haus.

"Mi kukim kaukau, banana, kumu, pis na mi redi long tanim liklik saksak tu. Olgeta kaikai bilong mipela klostu tan na mi wetim tasol wara long boil na bai mi tanim liklik saksak. Han bilong mi i go long pis na mi tanim, sem taim mi pilim haus i guria nogut tru. Wantu mi karim Glorina na ron i go long dua na sanap long lata. Mi askim bikpela pikinini man bilong mi, John sapos dispela em guria tru tru i mekim nais long haus na em i tok yes. Guria ya i kam wantu tasol na i pinis, olsem na mi tanim na go bek insait long haus kuk wantaim liklik bubu meri.

Insait long haus kuk, bubu meri i stat long singsing sore long mama bilong em husat i go pinis long Malol. Bikos Glorina i wok long singsing, em i pasim ia bilong mi na mi no harim ol pikinini tumbuna i stap ausait i singaut long mitupela olsem bikpela solwara i wok long sut i kam



• Wanpela bikpela haus long ples Malol i pundaun sliip long graun taim solwara i bruk i kam na bagarapim.


antap long ples. Dispela solwara i no manki manki, em i kam karamapim olgeta het bilong ol kokonas i sanap long nambis na i kam insait olgeta long ples.

Glorina i laik kaikai wanpela banana na mi sekim banana. Pes bilong mi lukluk i go olsem long nambis na mi lukim nau solwara nogut ya i ron strong i kam stret long haus bilong mipela insait long ples. Ples haus i sanap ya i longwe tru long nambis, ples we solwara i bruk long en, tasol dispela traipela solwara ya i no bruk yet na wok long solap i kam karamapim het bilong ol kokonas na bruk stret long namba wan lain pos bilong haus bilong mipela. Taim solwara ya i bruk, olsem laitning, solwara i pulapim olgeta ausait bilong haus. Solwara i raunim haus na tanim nabaut olsem solwara i bruk na wilwilim olsem wanpela bikpela masin, Regina Waillel i tok. Misis Waillel i tok hariap tasol em i karim bubu meri bilong em na tupela i ron i go ausait na sanap long lata na lukluk. Tasol tupela i no lukim ol arapela i bin stap long ausait. Na em i no inap opim ai bilong em tasol em i lukim wan-

pela diwai palpal. Em i holim strong palpal ya na sanap taim tait i strong long pulim rausim em. Regina i strongim em yet na sanap rausim ol pipia na graun wantaim wesana bilong nambis i pulap long maus, pes, nus, ia na gras bilong em. Long taim em i mekim dispela wok em i tingim gen liklik bubu meri bilong em na em i kra. "Na mi singaut, o God lukautim gut dispela liklik presen yu givim mi. Lukautim na bringim em i kam bek long mi olsem bai mi holim em gen. Bihain mi harim tupela tambu meri bilong mi singaut na brukim solwara na painim mi. Ol i kamap na kisim mi i go long ples klia. Bikpela wari i kisim mi taim mi lukim ol haus i no sanap moa. Piksa i olsem wanpela nupela ples nau tasol ol i kliaim long sindaun. Olgeta samting bilong mi na famili i bagarap na mi kra moa moa yet."

Misis Regina Waillel i tokaut tu olsem taim em i stap pikinini yet, em i harim papa bilong em i stori long kain bagarap olsem i bin kamap bipo.

Hawaii nait kukim "Planet Rock"



• **Mi ting em ol Hawaii lain ya stap long Morobe.** Tasol em ol lain long Lae ya, danis *hulahula*, stail danis bilong Hawaii.

FRANCO NEBAS i raitim

NUPELA nait klab long Lae "Planet Rock" i bin paia long tupela wiken i go pinis taim ol i holim Hawaii nait danis pati. Dispela Hawaii nait pati em i namba wan taim long kamap insait long wanpela nait klab o hotel long Lae. Man husat i bin go pas long dispela tingting em menesa bilong *Planet Rock*, Mark Kleemam.

Dispela nait pati i lukim ol kain stail bilong Pasifik ailan we olgeta manmeri i bilas long stail bilong Hawaii na kamap long pati.

Mi bin gat sans long go long dispela pati taim menesa bilong klab ya, Mark Kleemam na wanpela poroman bilong em husat i wok wantaim Trade Wind kampani long Lae yet i askim mi long go long dispela pati na kisim sampela poto na stori. Nem bilong poroman bilong em, Stanley Sands.

Sands i bin bungim mi long Eriku na tokim mi long dispela pati. Em i askim sapos mi nogat wok long mekim long nait orait bai em i kisim mi na go long dispela pati.

Dispela tu em i namba wan taim bilong mi long go long *Planet Rock* long wanem mi bin stap long Mosbi na dispela klab i bin kamap. Dispela nupela nait klab ya, em i stap long we i bin gat olupela

Mambu taven i bin stap long en, klostu tasol long olupela ples balus. Em sapos yu save gut long Lae o yu save harim dispela hap nem, em bai yu klia long wanem hap mi toktok long en.

Sands i kisim mi long 7 kilok nait long haus bilong mi long Salamanda strit na mi tupela go long klab. Webai i namba wan taim bilong mi long go long dispela nupela klab long Lae na tingting bilong mi i go pas long wanem kain dispela ples ya.

Ating em bai bikipela long ol arapela klab long Lae na wankain olsem long Mosbi o bai narakain olgeta. Ol dispela tingting wok long kamap long het bilong mi taim mipela draiv i go long klab.

Em kisim mipela olsem 5 minits long ples mi stap long en na i go long klab.

Mipela kamap long get we ol sekuriti i sekim kar sapos mipela karim ol bia o sampela samting bilong pait olsem naip, tamiok, ain o gan.

Bihain long ol i sekim kar, mipela draiv go insait na putim gut kar long ples bilong en. Mi redim kemera na mi tupela i go insait. Man, mi ting olsem ol i sekim kar pinis na ol i no inap sekim mipela gen, tasol nogat, ol i kisim wanpela masin na sekim mi pela gen long namba tu taim. Ol sekim mipela pinis na mipela go insait.

Man get fi tu ya, i sanap olsem

K15 long wanwan man meri, tasol mi go insait fri long wanem ol i askim mi long go na kisim poto olsem na ol i larim mi go insait nating.

Taim mi lukim dispela hap ya,

klostu tru ai bilong mi kamaut ya. Ol i bilasim gut tru insait long ples bilong dring na danis we luk stail moa yet.

"ALOHA" em menesa bilong klab, Mark Kleemam, i tokim mi na

lain i bilas olsem ol pipel bilong Hawaii na stail bilong ol.

Ples tu ya, ol i bilasim long lip bilong kokonas na flawas wantaim ol kala lait tu na musik i paraip long baksait i olsem yu stap long nambis bilong Hawaii ya.

Ol manmeri i bilas long Hawaii stail wantaim ol sotpela laplap na purpur wantaim bra. Olsem tru ol i stap long nambis bilong Hawaii ya.

Poroman bilong mi Stanley na ol lain promosen meri bilong em tu i wok long givim ol fri Tradewinds dring long ol kastoma taim ol i wok long kam insait long geit.

Yupela ol lain Hawaii tu ya, taim ol i kam insait em ples i bagarap olgeta. Man bilong pilai musik ya em i sambai tasol wantaim ol musik bilong Pasifik ailan na danis flo i paia stret wantaim danis "hulahula" bilong Pasifik.

Samting olsem long 10 kilok em ples i stat long pulap wantaim ol manmeri kamap long pati. Taim ol i kam insait long geit em ol promosen meri bilong Tradewinds i sambai pinis na givim ol sampela strongpela dring bilong ol long stretim nek na kisim sampela kain filins orait bihain ol yet wokim samting stret long ba.

Ples i pulap tasol ol manmeri i wok long kam yet na Mark i tok-save long ol sekuriti long noken larim moa i kam insait. Long wanem ples i pas stret na nogat ples long yu danis o go na baim drinks bilong yu ya. Ples yu sanap ya em tasol yu danis na drink inap long pinis bilong paiti ya.

Man dispela tu ya em fes taim long kain pati olsem na ol manmeri ino isi long pulap ya. Ol i mekim save i go inap long 2 kilok long moning stret pati i bin pinis na mipela i go nabaut long haus.

Poroman bilong mi i tok olsem bihain long mipela lusim ol promosen meri bilong em bai mipela dring go tulait tasol mi tingim wok long mekim long Sande na mi tokim em long lusim mi long haus.

Bihain long lusim olgeta wokmeri bilong em, em i go lusim mi long haus long 4 kilok long moning. Man, olgeta bun bilong mi slek na taim mi pundaun long bed mi no save olsem em 3 kilok long Sande apinun.

Dispela pati i bin namba wan stret na tu em fes taim long kain pati olsem kamap long wanpela klab o hotel long Lae. Olgeta taim yumi save harim long redio olsem kain pati olsem save kamap long ol klab long Mosbi na Lae nogat. Tasol nau em "Planet Rock" i mekim samting stret long Lae.

Nogat yu ting mi giamanim yu, sapos yu gat sans long go long Lae traim na putim lek long *Planet Rock* na yu yet skelim nogut bai yu laik stap olgeta long pot hul siti ya.



• **Tupela meri ya, i danis long wanpela musik bilong Pasifik ailan. Klia long ol, ol i mekim save stret long dispela nait.**

mi tupela sekhan. Dispela hap tok-tok bilong бага ya, i wokim mi paul liklik ya, mi tingim tasol, man ya mas longlong o?

Tasol bihain mi tingim gen olsem em hap toktok bilong Hawaii long tok halo long yu.

Bihain long dispela ol tok "Aloha" Mark i kisim mi go raun na kisim poto insait long klab.

Insait long klab em i gat foa pela bikipela snuka tebol, ples bilong kaikai, ples bilong pilai pokies, ples bilong dring na hap ples bilong tromoi lek.

"Dispela em namba wan taim nau klab i holim dispela kain pati bihain long ol i bin op long dispela yia," Mark i tokim mi.

Em i tok tu olsem dispela Hawaii nait pati em ol i laik traim tasol na sapos em i kamap gutpela bai ol i mekim gen sampela moa long bihain taim.

Bihain long mipela wokabaut raun lukim ples na tok "ALOHA" nabaut long ol wok manmeri na sampela kastomas, mi go het long wok bilong mi na kisim poto long ol



• **Ol wok manmeri long "Planet Rock" long Lae husat i bin bilas olsem ol pipel bilong Hawaii.**

Lapun mama stori long birua bilong solwara long Aitape

i kam long pes 22

Tasol inap long dispela taim tasol, em i namba wan taim bilong em long lukim na pilim pen bilong dispela bagarap.

Em i tok tu olsem ples i go tudak hariap tru na ol i no inap painim na kisim sampela samting bilong ol. Long nait yet, em wantaim tupela tambu meri bilong em i brukim solwara long lain kokonas i go insait longwe long nambis na stap long haus bilong narapela pikinini man bilong em. Tasol bikos long bikpela pret olgetai no kisim gutpela slip inap tulait Sarere Julai 18, 1998.

Liklik Glorina taim i lus long han bilong bubu meri bilong em, tait bilong solwara i tromoi em narapela 300 o 400 mita bihainim tais wara i go antap long bus. Em i go na pas antap long lip bilong wel arang na i stap. I bin longpela taim pinis na bihain em i stat long singaut bubu bubu na bikpela kandre bilong em i harim na swim i go na kism em insait long tais. Wanpela taim gen amamas olsem Glorina i stap laip i mekim mi gat strongpela bilip olsem God i harim krai na lukim pen bilong mi na i no lusim laip bilong mitupela, na mi tenkim God long harim prea bilong mi.

Mama Regina i tok olsem long Sarere na Sande bihain long bagarap i kamap, em wantaim famili bilong em i ronawe lusim ples Yakoi na go antap long ples Marok. Taim sampela i go antap na sanapim ol haus sel na slip long maunten Tepir, liklik lain i ronawe i go slip wantaim ol pren long Pultalun. Lapun Regina i tok bihain em na ol pikinini bilong em i tingim ol samting long ples na ol i lusim Marok na go bek long Yakoi tasol ol i pret yet. Sampela taim bihain wanwan lain i wok long lusim bus na i kam bek long ples na lukim ol bagarap we i kamap.

Mi yet i stap insait long dispela hevi we solwara i brukim ol haus i go daun karamapim mi. Dispela taim nogut na tingting bilong wokim haus gen arere long nambis i no stap long tingting bilong mi. Olsem na bai mi pusim papa long wokim haus longwe long nambis bai mipela i ken slip gut na lusim tingting long dispela birua na pret samting, lapun mama i tokaut long tingting bilong em.

Lapun meri na bubu bilong em Glorina i go long haus sik na kisim marasin na orait i stap long ples nau.

Husat wari long mani bilong yu?

LEO YAT i raitim

KALO em i wanpela mangi long ples. Em i save stap amamas bikos ples i pulap tru long ol kainkain gutpela samting we ol lain i stap long taun i nogat.

Wanpela taim long bik moning tru, Kalo i go sekim trep bilong em long bus na i kam bek hariap tru wantaim wanpela pisin Guria. Em i amamas tru na i mekim save singsing i kam bikos famili bilong em bai kaikai gutpela abus long dispela de, na tu bikos nau em i gat gutpela gras pisin bilong wokim bilas bilong singsing.

Kalo i wokabaut i go bek long ples na taim em i kamap long bik rot, (rot ka), wanpela waitman (em bik bos bilong wanpela timba kampani husat i wok yet long katim diwai long eria bilong Kalo) i givim siksti stret long ka bilong em na i kam.

Kalo i sanap longwe liklik arere long rot. Taim ka ya i abrusim Kalo pinis na i go liklik, em i givim ful brek na i rives i go bek. Dispela bik bos waitman ya i stapim ka long arere bilong rot klostu long Kalo na i opim dua. Em i kam ausait na i rausim paus bilong em long poket. Man paus tu i pat nogut tru long wanem ol "het bilong Somare" (K50) i pulap tru insait. Waitman i rausim wanpela pepa mani (K50) long paus long ai bilong Kalo stret na i traim long givim em. Kalo i paul tru na i askim: "Bilong wanem?"

Na waitman i bekim: "Guria ya i kam na yu kisim dispela mani." Kalo i no nois liklik; em i sanap tasol na lukluk strong long waitman na i askim gen: "Bilong



• Tude planti pipel long ples i save salim ol abus, pisin na ol samting bilong bus, graun, wara na solwara long kisim kwik mani. Ol i no moa tingting lng lukautim ol dispela samting. Poto hia i soim wanpela man i salim muruk long kisim mani.

wanem?" Waitman i tok: "Wanpela i no inap?" na em i rausim wanpela moa pepa mani (K50) long paus na i traim givim dispela tu long Kalo. Kalo i sanap lukluk long waitman na i askim gen: "Bilong wanem?" Pes bilong waitman i kamap ret liklik nau na em i askim gen: "Em i no inap yet?" na i rausim etpela moa pepa mani (8pela K50.00 not) na i traim gen long givim olgeta yet long Kalo.

Kalo em i ston het yet na em i askim: "Bilong wanem?" Waitman i tuhat nogut tru nau na pes wantaim ai bilong em i ret nogut. Em i subim paus wantaim olgeta mani long narapela han olgeta i go long Kalo na i bikmaus stret: "Em hia, kisim olgeta yet na givim mi dispela guria!" Kalo i lap tasol na i bekim: "Bilong wanem?" Waitman i subim olgeta mani wantaim paus insait long poket bilong em

yet, em i go insait long ka, i pasim dua strong tru na i tek ov i givim siksti stret i kirapim das na i go.

Kalo i lap bikpela stret na i toktok long em yet i bihainim maus bilong waitman ya: "Em hia, kisim olgeta yet na givim mi dispela guria!" Kalo i lap moa yet i makim toktok bilong em yet: "Bilong wanem?" Kalo i bikmaus: "Olabo! Ol pikinini bilong mi i wetim mi long kaikai abus, i no long kaikai mani. Na mi tu i nidim naispela gras bilong pisin Guria long wokim bilas bilong singsing. Waitman! Yu ken kaikai mani bilong yu na bai yu pulap; na yu ken bilas long dispela pepa mani bilong yu long taim bilong singsing. Mi wantaim famili bilong mi bai kaikai guria bilong mipela. Na mipela bai i gat gutpela bilas nau! Husat i wari long mani bilong yu?"

Lukaut long ol saveman i kisim samting long bodi bilong yu

KIWURAM KANAKO i raitim

Madang Festival i bin pulap wantaim planti kain kain samting. Ol stringben grup, ol man i resis long kanu, ol skul pikinini i singsing tumbuna, ol man i kalap long parasut na tu ol manmeri bilong hailans i kam karim lek long traipela san.

Mi bin go long dispela bikpela taim bilong amamas long lukim ol tumbuna singsing bilong yumi stret. Ol singsing tumbuna i kam long Hagen, Simbu, Morobe, Rabaul na long Madang yet. Wanpela bilong ol lain husat i bin kamap long Madang Festival em ol lain bilong yumi stret long Hagahai, husat i stap insait long Skrada maunten klostu long Westen Hailans provins.

Dispela em namba wan taim bilong mi long lukim ol lain Hagahai. Tasol, ol Hagahai i bin kamap namba wan taim pinis long Madang Festival long 1995.

Tru mi bin ritim planti stori, lukim piksa na harim ol manmeri i toktok long Hagahai, mi yet i no bin lukim ol. Taim mi bin lukim ol na harim singsing bii ng ol, mi no bin guria. Nogat. Mi bin tingting planti tasol olsem em ol dispela pipel tasol we ol lain olsem Yanagihara, Nenurkar, Jenkins, Miller na Garruto i bin bagarapim.

Ol dispela foapea man na wanpela meri, husat mi kolim antap i bin tok olsem ol yet i wokim na kamapim wanpela kain binatang nau i stap insait long ol Hagahai pipel. Dispela binatang em ol i kolim olsem PNG T Lymphotropic Virus (HTLV).

Sori tumas, mi mas tokat olsem dispela binatang (yumi i no inap long tok olsem dis-

pela binatang virus em wanpela samting we i gat laip na i save stap insait long bodi bilong yumi ol man, abus, ol diwai na arapela samting tu), we ol faivpela lain ya i painim insait long ol Hagahai, nau i stap olsem samting bilong Gavman bilong Amerika. Dispela binatang we i save stap insait long ol Hagahai i no samting bilong ol nau. Nogat.

Long 1984, sapos yu bin ritim wanpela *Post Courier* niuspepa, (mi no klia niuspepa bilong wanem de na mun) yu bai save long wanpela piksa we i soim sampela bilong ol Hagahai i sindaun beksait long wanpela PMV ka na raun insait long Hagen siti. Yes, em namba wan taim tru bilong ol dispela Hagahai pipel long kamaut ausait long ples bilong ol.

Orait bihain long faivpela yia, em long 1989, dispela meri Dokta Carol Jenkins wantaim ol foapea man ya i bin mekim ol wok painimaut wantaim ol lain Hagahai na luk-save olsem ol lain Hagahai i gat wanpela binatang we i save banisim ol long dispela sik we blut bilong yumi i save gat kain kain samting nogut long en. Long tok Inglis ol i kolim, blood poisoning o leukemia.

Taim ol faivpela savemanmeri ya i painim dispela binatang pinis, ol hariap tumas tok olsem ol i bin mekim na kamapim dispela binatang insait long Hagahai, olsem na ol i tok olsem nogat wanpela man o grup ol lain Hagahai o Papua Niugini Gavman bai mekim wanpela samting long dispela binatang.

Bai mi traim long tok klia liklik. Ol i mekim wok wantaim ol Hagahai na traim long painim dispela binatang insait long bodi bilong ol lain Hagahai, ol i bin rausim i kam ausait na putim long narapela sait na tok olsem ol i painim dispela binatang olsem na

ol tu i papa bilong dispela binatang. Orait taim ol i mekim olsem, ol i kisim dispela binatang na ol i go na yusim wanpela lo ol i kolim petent we i banisim ol na dispela binatang. Ol tasol nau i gat pawa long mekim wanem samting ol i laik long dispela binatang bikos lo i was long ol.

Yu ting wanem long dispela kain pasin na lo? Yes, dispela samting i kamap pinis long Papua Niugini. Na em i wok long kamap yet taim yu wok long ritim dispela stori bilong ol Hagahai.

Ol Hagahai i bin stap planti krismas i go pinis long grauna na ol bus bilong ol wantaim olgeta save, kastom na olgeta kaikai na marasin bilong ol.

Orait yumi go bek long ol dispela stilmanmeri bilong Amerika. Mi tok ol stilmanmeri bikos i nogat wanpela man o meri aninit long lek bilong God inap staim ol hanmak bilong God yet na paitim bros na kisim strong long lo bilong graun na tok, mi bin kamapim dispela binatang nau i stap insait long bodi bilong ol Hagahai na mi bai baptisim dispela binatang na givi nem long em olsem, PNG T Lymphotropic Virus.

Ating ol dispela faivpela lain i kamap olsem God pinis. Ating God em wanpela waitman o waitmeri bilong Amerika na em i kam long Papua Niugini na kamapim ol Hagahai na putim dispela binatang i go insait long ol Hagahai pipel.

Nau, yumi lukluk long wanem samting i wok long kamap long dispela binatang na em i stap long wanem hap tru. Dispela binatang i stap long Amerika long lukaut bilong Yunaitet Stets Patent and Trademarks Opis (USPTO). Na Gavman bilong PNG i mas baim Amerika Gavman

mani i sanap namel long K10,000 na K15,000 namel long 1998 Septemba na 2006 Septemba long lukautim dispela binatang we ol faivpela lain manmeri i bin stilim long ol Hagahai pipel.

Olsem na namel long 1998 Septemba na 2006 Septemba, yumi ol pipel bilong PNG wantaim ol Hagahai bai i no inap long save wanem samting em ol bai mekim long dispela PNG T Lymphotropic Virus we ol i rausim i kam ausait long bodi bilong ol Hagahai pipel.

Yumi olgeta manmeri na pikinini bilong PNG i mas lukaut gut long ol dispela kain waitmanmeri husat i kam long traim long giamanum yumi. Yumi no ken stap longlong. Yumi mas save tu olsem yumi gat kainkain lo i stap long banisim na lukautim yumi.

Yumi gat rait long save pastaim long wanem samting ol arapela i laik mekim long yumi orait yumi ken tok yesa o nogat. Long tok Inglis ol i save tok, prior informed consent. Narapela hap lo we i banisim yumi tu em olsem yumi ken tok olsem yumi nogat laik o tingting long tok orait o tok yes. Log tok Inglis ol i save tok, no intension of consenting.

Sapos yu laik save moa long dispela samting, askim wanpela loya o yu inap long rait i go long ICRAF, PO Box 155, University. NCD. Yu tu inap long rait i go long RAFI Australia, 4 Ocean Parade, COOEE bay, Queensland 4703. Sapos yu stap long Madang, yu inap long kam na stori wantaim mipela ol Northern Lights long ol dispela pasin we ol bikpela marasin, kaikai na ol arapela kampani i wok long mekim long graun tete.

B ipo tru, Kanage save ting olsem ol Wes Irian i luk olsem Indonesia o lait skin Esia tasol, olsem na pestaim em i kisim holide. Em i go raun amamas long Jayapura. "Nogut mi no prenim wanpela meri Wes Irian yet na mi dai." Olsem tingting bilong em. Balus pundaun long Sentani Kanage opim ai na lukim ol Indonesia. "Em tasol, ol lain nogut Wes Irian!" Bel bilong em kirap. Taim em i kurungkitim eastrip ya nogat, em i lukim ol wanskin asples ol i sanapim smail. Man, bel bilong Kanage bol nogut tru. Em i bik-maus na singaut "yupela blari Papua Niugini yupela painim ples stret ya. Mi no westim moni long kam lukim yupela. Harim, a!" Taim em kamap long teminol sampela meri Wes ron i kam long sikhanim em na mekim pren, tasol Kanage sakim han bilong ol na hatim ol "husat i no save long trik bilong yupela ol meri Sandaun. Kliia go! Mi kisim balus long Vanimo. Na yupela kisim motokanu long waromo na katim rot bilong mi." Trangu ol susa Wes ol i no save long pisin ol i sanap longlong tasol. Wanpela bilong ol givap na singautim arapela "kas tingal dia!" (lusim em!) Kanage harim kranksi na lus tempa olgeta. "Husat i dia, mi olsem dia o yupela olsem wail dia. Ron i go i kam painim man na abrusim boda!" Mista Kanage tanim bek, lus tingting long holide bilong em na kalap long sem balus. Ol man long eapot ol lukim pasin bilong Kanage ol i sori nogut tru. Ol i ting wanpela long-long Papua Niugini abrus i go long hap.

Honai Mam GOROKA

■ Mista na Misis Kanage wantaim 24 pikinini bilong tupela ol i go long Lae long wanpela dingi tasol solwara i raf nogut tru olsem na Kanage i prea olsem o papa yu no save olsem mi lasbon pikinini ah, na yu mekim olsem. I no long taim pikinini bilong Kanax i askim kanax, papa tru mi lasbon pikini ah. Na Kanage tokim em, sarap mi giaman tasol. Na em statim prea gen o bikipela tenkyu long givim mi ol pikinini ya na noken kisim ol bek gen tasol nau kisim bek Misis bai mi lukim bikhet bilong mi.

Eli Habilo FINSHHAFEN

■ Kanage yet em wanpela man i save kisim sotwin sik. Tasol sik bilong em i save kamap long olgeta Satade moning long 6 kilok i go inap 6 kilok apinun i save pinis. Wanpela Satade em i kirap long bet na tokim meri bilong em. anti, yu kisim mi i go long haus sik long 3 mail. Tupela i go kamap long haus sik long tri mail na nes i askim Kanage long kisim ripot. Na Kanage i tokim nes olsem. Olsem wanem na yu askim mi long kisim ripot. Mi no nupela man long dispela tri mail haus sik. Mi wanpela populesen man long hia na yu save mi wanem kain man. Kanage i tok mi les long askim askim. Sapos mi dai, em asua bilong nes tasol na mi bai dai. Na tupela i go bek long haus.

Yaskar Waitand BOROKO

■ Kanage em bilong Sinibex long Goroka. Wanpela taim em wantaim junia boi tupela i laik go long taun. Kanage i draiv na tupela i kamaut long han rot na laik kam long bikrot. Em nau Kanage stopim ka na tokim junia boi long lukluk long sait bilong em sapos ka i kam. "Hei san lukim long sait bilong yu, i gat ka i kam o nogat?" Tru olsem wanpela motobaik i spit i kam tasol papa i tok long ka na i no motobaik

KANAGE



olsem na junia i bekim olsem "paps, mi lukim pinis na nogat ka i kam." Em nau Kanage surukim ka i kamaut long rot tasol tu leit. Motobaik i kam tasol na givim ka hatwan tru. Kanage na junia i kapsait wantaim ka i go daun long baret na draiva bilong motobaik i flai stret i go long bus. Hairap tru junia i kam aut na pulim Kanage i kamaut. Tasol i no longtaim na Kanage taitim han hatwan tru na putim long iau bilong junia. Junia pundaun nogut na paul olgeta. em kirap gen na askim Kanage. "Paps, yu draiv na mi boskru ya na olsem wanem tru na yu givim stret pans long mi, yu no laik givim mi apa kat? Kanage bekim na tok. "Pasin liklik maus bilong yu. Yu tok ka i no kam na mi ting tru olsem na movim ka na yumi bam. Yu no laik tok stret na mi weit." "Tasol yu tokim mi long lukluk long ka na i no motobaik. Tru mi lukim motobaik i kam tasol em i no ka olsem na mi tok nogat ka. Yu tu yu no laik askim stret." Em nau planti manmeri i harim na Kanage sem nogut tru tasol hariap tru em tok "OK bai yu tok olsem long ol polis, kam i go pas. Nogut bai yu kisim narapela stret pans wantaim dabol hit na bai yu lus tingting long nem bilong yu." Wan tu tasol tupela lus pinis.

Mista Gray Tuno KUNDIAWA

■ Kanage em wanpela enjinia na em i go wok long Ok Tedi Maining. Kanage nek drai stret na go rausim wanpela boks na go dring arere long wara Ok Tedi. Tupela dring i go na spak olgeta, na stat long mekim kainkain stori. Taim Kanage mekim wanpela stori, poro bilong em wok long tok, turu ye-e, turu ye-e, mekim na Kanage toktok bilong em pinis, olgeta na em tingting long bai mekim wanem kain toktok, em nau em kisim wanpela tingting pinis nau em kirap stori long poro bilong em olsem, gutpela apinun tru na mitupela dring arere long wara Ok Tedi na gutpela kolwin tru i kam tasol, sapos mi sanap baksait long yu, ating bai yu kisim gutpela filins. Man poro bilong em i no harim gut toktok na em tok

turu ye-e, em nau lapun Kanage trautilm bia long hapsait.

Gombs Kienah LAE

■ Yes, Kanage bilong ples Sialum Lae, Morobe provins. Wanpela taim Kanage wantaim meri bilong em tupela save wok hat long ol gaden. Na yu save tupela manmeri bilong ples tupela save long kaikai bilong gaden tasol, long stua em Kanage wantaim meri bilong em tupela i no save. Wanpela taim Kanage kisim liklik wan siling na tokim meri olsem yu i stap, mi go long taun long Lae painim liklik kaikai bilong mitupela na kam bek. Kanage kisim sip na tek op long, Lae em i go long Renbo stua na baim 10kg rais, raun suga, tinpis sop na, liklik laif bilong meri bilong em. Go bek pinis long ples na meri bilong Kanage em amamas na to you kam pinis, Kanage tok yes my daling. Kanage tokim meri yu kisim rais, na kukim, na Tarangu meri bilong em i no save long kuk. Na Kanage to i no save long kukim rais, pes taim bilong tupela, Kanage tok liklik samting bai mi yet kuk. Kanage kukim rais i go wara drai, na em kapsaitim nupela wara i go na rais i paia olgeta, na tokim meri bilong em mi kukim pinis olsem na you sevim, tarangu em i no save long sutim rais. Kanage i go silip i stap na meri bilong em sapim brum stik na sutim wanwan kiu bilong rais na, Kanage angere pinis na em kam lukim ya meri wok long sutim wanwan kiu bilong rais, Kanage kirap belhat tok yu kisim bikipela spun na sutim rais. Kanage i tuhat nogut tru.

Kaupe Mutate FINSHHAFEN

■ Kanage i bilong ples But long Wes Kos insait long Wewak. Wanpela fotnait Fraide em i go raun long Wewak taun i stap na em bungim tambu bilong em. Tupela sanap toktok i stap na Kanage tokim tambu bilong em olsem tambu sapos mi painim ka nogat na mi no go long ples, bai mi kam long haus. Tambu kirap

na tokim em olsem, em i orait yu ken kam. Kanage painim ka nogat na i no go hariap long haus bilong tambu. Na long haus tambu na famili wet nogat na ting Kanage go pinis. I no longtaim, taim ol i kaikai i stap Kanage i go kamap. Tambu kirap nogut long lukim Kanage na kirap tokim Kanage. Ma-a-an tambu yu no laik kam hariap! Mi sutim susa bilong yu, mi sutim ol kandre bilong yu na mi sutim mi yet. Sapos yu kam hariap olsem, bai mi sutim yu tu. Kanage paul olgeta long ol dispela hap toktok. Bihain em tingim. O em tok long sevim rais ya, man wanpela longlong toktok bilong tambu stret ya. Yu save kain ol stail toktok bilong ol Yakumul ya.

Quinten Awapo WEWAK

■ Kanage em i mekenik long Ela Motors Lae. Wanpela apinun ol i pinis wok leit, olsem na em i rash i go long haus. Dispela taim raskol i wok long bagarapim Lae siti, olsem na planti manmeri pret long raun autsait. Las PMV klostu tekop, Kanage kamap long bas stop na stopim em na kalap. Ol i laik tekop, nogat, ol i harim wanpela meri singaut, draiva holim brek. Olgeta lukluk sori long em. Em i wanpis long bas stop, tasol bas i pek tait na nogat spes. Em nau, Kanage kisim dispela sans long kamap hiro "susa, laif bilong yu em i bikipela samting. Nau em i taim nogut. Noken tingting planti, yumi yet ya. Kam na sindaun long lek bilong mi." Meri ya tingim laif na bihainim tasol aidia bilong Kanage. Samting tru Kanage i strep i stap. Bas tekop na kalap. Kalap long pothol. Elektrik sok i bihainim blut na ron i go long olgeta join bilong Kanage. Em i kisim traipela mama bilong filings, na giaman, giaman tromoi askim "susa, yu mas wok long haus sik ya, yu tok?" Susa ya kirap nogut na bekim." Em tru ya, hau yu save?" Na Kanage tok "em ya, skin bilong yu smel marasin." Bas i ron spit. Tupela i go hot. I no long taim nes ya tanim bek na askim Kanage. "brats, yu mas mekenik long wanpela woksap, yu tok?" Kanage pulim win bilong hai

filings na ansarim "yees yaa susa, hau na yu save?" Isi/isi tasol susa ya tanim na bekim "em ya, liklik jek bilong yu, i wok long isi isi go antap!" Olgeta pasindia brukim lap. Kanage em i sem pipia olgeta. Em i stopim bas, kalap na kukim i go long bus.

Honai Mam GOROKA

■ Papa Kanage i bilong Bopex ples insait long Leitire eria long Sandaun provins. Wanpela moning papa Kanage i go stilim wanpela rop banana long gaden bilong wanpela lapun man na karim i kam long haus na putim insait long wanpela empti beg rais na pasim maus bilong beg rais na haitim i stap insait long wanpela sait kona bilong haus na long narapela sait kona bilong haus i gat statue bilong mama o santu Maria i stap. Orait bihain long wanpela wik banan ya i maus pinis na wanpela kasen brata bilong em yet i lukim pinis dispela banana Kanage i haitim olsem na em i stat long stilim wanwan bilong dispela banana na kaikai tasol. Papa Kanage yet i no save? wanpela Sande moning, Kanage i laik go sekim banana bilong em i maus o nogat? Tasol em painim olsem banan ya i wok long lus wanwan olsem na em i lukluk raun insait long maus na lukim lukim statue bilong santu Maria i stap long narapela sait kona bilong haus na i kirap tokim statue olsem; So you are the main one, yesterday I give one and this morning I gave you one again and now you stole one again satusatu laki laki na kirap ron i go kisim tamiok na i laik katim statue bilong santu Maria tasol na kasen brata i kamap na holim pasim em!

Ben. B. Nawoto VANIMO

n Kanage stap long Mosbi nogat wok. Olsem na em save kisim ol turist raun, long painim liklik toea. Wanpela taim em i kisim wanpela turist long Amerika tupela raun long Mosbi siti. Masta ya lukim Somare bilding na askim Kanage. Kanage tok: That's Somare bilding. They have been bilding it for ten years! "Masta ya kirap na bekim" my goodness, sure a long period. In USA we just need around two years to get it done." Kanage tanim het. Tupela go long spring garden na Kanage stori: This is spring gaden. They took seven years bilding it up. Very complicated construction, isn't it?" Masta ya tok: "Not really. Its just like simple family flats in USA it might take us two months to set it up." Kanage tanim het gen. I no long taim tupela i go kamap long palamen haus. Na Kanage wokim wok: "This our palamen haus. They completed it in five years." Masta i bekim: "Ten times different. Americans build such a house in five months only." Olgeta samting tupela lukim, tupela turis ya wok long apim, apim USA. Na daunim Papua Niugini mekim i go na Kanage i no pilim amamas long showoff pasin bilong masta ya. Kanage plenim trik bilong em na kisim waitman ya i go long taun. Em i lukim Era Rumana na askim Kanage. Kanage giaman giaman kirap nogut, klinim ai bilong em na singaut: "O my God! Cannot believe my eyes, I hope I'm not dreaming!" Baga ya lukluk strong long Kanage na askim "what's wrong?" Kanage tanim het na ansarim: "It wasn't there when I came here two days ago!" Nau, taim bilong waitman ya klinim swet na isi isi tasol lusim Kanage. Yu pilim nau!

Phil Joku GOROKA

Side Doors ben wokim nem bilong em long CHM

JAMES KILA i raitim

WANPELA nupela musik grup bilong Raikos eria long Madang province i redi pinis long soim strong bilong en insait long PNG musik.

Ol i putim ol sampela tumbuna singsing bilong ol i go long pawabben stail stret wantaim ol kain kain pairap bilong musik bilong ol waitman na mekim em i kamap "raid olgeta". Yu yet harim na skelim taim kaset bilong ol i kamaut.

Grup ya em Side Doors na ol i katim namba wan kaset bilong ol pinis wantaim Chin H Meen studio long Mosbi. Taitol bilong dispela kaset em "Fax Machine"

Man i go pas long Side Doors, Gerard Turig i bin tokim *Wantok Niuspepa* olsem ol i gat bilip olsem dispela nupela kaset bilong ol i gat kik na strong long winim lewa bilong planti manmeri taim em i kamaut.

Dispela grup Side Doors i bin stat long 1995 taim Gerard Turig bilong Warai viles long hap bilong Raikos i bin gat dispela strongpela tingting long statim wanpela musik grup. Em i bringim dispela aidia bilong em i go long tupela brata bilong em, Julius Moab na Angus Banas na olgeta wantaim i pasim tok na gohet long mekim ben bilong ol i kamap.

Gerard i tok planti taim ol i save lukim ol narapela grup bilong Madang olsem Kales, Old Dog & Offbeats na ol narapela grup i go

pilai long eria bilong ol, na dispela i kirapim tingting bilong ol long traim statim wanpela ben grup bilong ol yet.

Em i go painim narapela tupela brata bilong em na tupela i kirapim dispela ben. Ol i gat wanpela liklik ben set we ol i save yusim long pilai.

Bihain long ben grup bilong ol i kirap ol i stat long pilai raun long eria bilong ol long Raikos na winim lewa bilong planti manmeri tru. Dispela tu i kirapim tingting bilong ol long rekot.

Long klostu pinis bilong 1996 ol i bin mekim wanpela demo-kaset na salim i go long Tumbuna Trak Studio. Tasol ol i no bin kisim gutpela ansa olsem na ol memba bilong grup i mekim rot bilong ol na go long Mosbi. Taim ol i kamap long Mosbi ol i bin givim demo-kaset bilong ol i go long Chin H Meen Studio na i kisim gutpela ansa. Dispela i bin mekim rot bilong ol long go insait long studio long rekotim nupela kaset bilong ol.

Side Doors ben i bin go insait long studio long mun Jun long dispela yia tasol na pinisim rekotim bilong ol long Oktoba.

Gerard i bin stori tu long sampela ol song bilong grup em i bilip bai kukim lewa bilong planti em ol song olsem Nen Kanai, we i stori long pisin kanai we i save flai antap long solwara long ol nambis ples. Ol narapela song em "Noken Grisim Mama" na "Malio wel wel."

Song ya Malio welwel i stori

long kain stail bilong painim abus long wara. Yu save pinis taim yu laik holim malio, planti taim em i save wel.


Wankain stori tu long kindam. Taim yu makim gut tru long supsup long sutim em, em bai kalap na bai yu popaia nating. Pis tu em wankain stori.

Mining bilong album taitol bilong ol "Fax Machine" i stori liklik long kain pasin bilong yangpela man na meri husat i save salim pas na toktok i go kam long leta, telefon na tu long feks-masin. Dispela song i stori long wanpela yangpela susa husat i bin gat bikpela filings stret long wanpela yangpela bagaros, olsem na olgeta taim em i save salim toktok bilong em long feks-masin long tokaut long wari na filings bilong em.

Side Doors i bin pilai long PNG Med Tred Fea long stat bilong dispela mun tasol na i soim stret olsem ol i gat ol sapota bilong ol i stap.

Man husat i rekotim ol lain Side Doors em sif enjinia bilong CHM Studio yet, Eddie Elias.

• **Tupela member bilong Side-Doors em Gerard Turig (Iephan) na Angus Banas.**
Poto: Bae Kimali



Kanage i bilong Maprik long Is Sepik provins wanpela taim long Sarere nait

Kanage kisim ol sampela faul meri, na ol i go raun long tais wara, taim ol i raun, man nil bilong saksak i no isi isi long sutim lek bilong Kanage. Tasol Kanage i no pilim pen liklik. Neks de Kanage kirap waswas pinis na go long lotu, long haus lotu Kanage i stat long pilim pen. Em i pilim pen na em wok long singautim wanpela meri long pen bilong bebi bilong em. Meri ya i ting olsem Kanage i wok long askim laik long em. Manmeri ya kirap na bikmaus long Kanage. Na Kanage i pilim pen wantaim na em i sem pipia nogut. Tru meri ya kirap na tokim Kanage yu kam long lotu o yu kam bilong painim meri. Kanage kirap na giaman ol meri ya em mama bilong em. Em kirap na tok mama, mama, givim mi pen ya. Meri ya kirap na tokim em. Man lukim em mi mama bilong yu o. Kanage karai na sem pipia nogut tru na em kirap isi tasol i go long pasto. Na tokim plis pasto meri ya giaman sutim tok ya.

Albert Papii
RABAU

■ Kanage i bilong ples Ismun long Talasea distrik long Wes Niu Briten provins. Em i stap long ples i go na em tingting long go lukim tambu bilong em long ples Kulex. Long Fraide moning em stopim wanpela timba trak bilong SBLC na em go lukim tambu bilong em. Em go kamap long Kulex na em go stret long haus bilong tambu bilong em na sindaun wetim tambu bilong em. Taim tambu bilong em i kambek long wok. Kanage kirap na askim tambu bilong em long K50. Orait taim em kisim moni ya em tekop i go painim long LK Klab, em dring i go na em tingting long go silip long hausboi bilong tambu bilong em, na taim em kamap long haus tambu man bilong em sindaun na singautim em long kaikai, na taim em kaikai i stap tambu man bilong em tekop go silip long hausboi na Kanage silip long bed wei em i wok long kaikai long em. Orait taim ol dok i singaut, tambu man bilong em i

kirap na em laik go sekim Kanage na semtaim tu Kanage tu kirap na i go long haus boi na bungim tambu bilong em. Orait Kanage tokim tambu em bai go pispis. Orait taim Kanage i kam bek, em ting olsem tambu bilong i go silip pinis. Tasol nogat tambu bilong em go pispis gen long sampela wei Kanage i pispis long em. Kanage i go insait long

KANAGE



hausboi na lokim dua bilong haus na em laik pasim ai na harim wanpela man i wok long dua. Orait Kanage kirap na askim yu husat ya" tambu man kirap na tok." Tambu mi ya na Kanage kirap gen na tok, o tambu mi ting yu kam silip pinis na mi lokim dua, na em opim

dua na tambu bilong mi kam insait na lukim pes bilong Kanage em lap long tambu na tambu tu i lap long em.

I. Tawgari
KIMBE

■ Kanage i bilong das ova taun - Rabaul. Em i wanpela lapun man Tolai husat i no save long pasim laplap. Olgeta taim em i save putim trausis tasol. Sikspela mun i go pinis, bikpela hevi i bin kamap long PNG, na mipela long Rabau i bin kisim taim tru. I no bin gat ren wara long ol tenk i pinis so mipela i mas go long ol wara o krik arere long ol maunten long painim wara bilong dring na waswas. Wanpela gutpela apinun lapun Kanage i putim tawel bilong em long nek bilong em na go painim wara long arere long maunten. Em rausim trausis na hangamapim antap long diwai. Taim em waswas gut i stap, wanpela sinek i kam na ronawe wantaim trausis bilong em. Bihain long waswas em i painim

olsem trausis bilong em i lus pinis so, em i mas putim tauvel long pasim em. Em nau lapun Kanage i pasim tawel bilong na wokabaut i go bek long haus. Taim em i go bek long haus, em wokabaut long rot we ol ka i save bihainim na tupela han bilong em i no lus liklik long holim pas tauvel bilong em i poret nogut i lus. I no long taim, wanpela ka i kam. Em i karim Rose (gelfren bilong Kanage) wantaim sampela poromeri bilong Rose. Taim ol i pas bai long Kanage, Rose i tromoi han na givim Fly Kiss i go long Kanage. Man . . . taim Kanage i lukim, em i kisim filings stret na i no moa tingim tawel bilong em. Em rausim han long tauvel, tromoi han na kalap kalap wantaim. Tauvel i pundaun, em i no wari . . . yu save lewa . . . ya, bai yu sem long wanem. I no samting bilong haitim. Rose i bin sem liklik long ol poromeri bilong em taim em i lukim tauvel bilong boifren em Kanage i pundaun. Tasol lapun Kanage i no sem, em mekim yet long tromoi han na kalap kalap i go inap ka i hait long kona.

Juliet Kay, RABAU



Nem: **Kalan Jelly**
 Krismas: 18 (man)
 Adres: Monarch Investment, Aumo Bace Camp, PO. Box 4145, Lae, Morobe Province.
 Save laikim: Pilai soka, pilaim gita, rait long ol pen pren, tokpilai na raun wantaim ol pren.

Nem: **Barksy Soga**
 Krismas: 17 (man)
 Adres: Erap Boys Town, PO. Box 1653, Lae, Morobe Province.

Save laikim: Pilai ragbi tas, wok gaden, harim lokol musik na raitim pas long ol pren prens.

Nem: **Mainau Yabi**
 Krismas: 17 (man)
 Adres: Erap Boys Town, PO. Box 1653, Lae, Morobe Province.

Save laikim: Pilai ragbi tas, wok mekenik, tokpilai wantaim ol poroman na raitim pas long ol pen prens.

Nem: **Willy Nawai**
 Krismas: 17 (man)
 Adres: Erap Boys Town, PO. Box 1653, Lae, Morobe Province.

Save laikim: Pilai soka, pilaim gita, wok gaden na raitim leta long ol pen prens.

Nem: **Michael Nabu**
 Krismas: 17 (man)
 Adres: PO. Box 3539, Boroko, National Capital District.
 Save laikim: Lukim EMTV, harim musik long Nau FM na ritim stori bilong Kanage long Wantok Niuspepa.

Nem: **Penyears J. Bullue**
 Krismas: 25 (man)
 Adres: Jengiku & Associates (P/L), PO. Box 348, Boroko, NCD (PNG).
 Save laikim: Bungim ol narapela manmeri, tokpilai na raun wantaim, ritim nius o harim nius long redio, mekim wok long haus o gaden, go lotu na bihainim stretpela pasin bilong lav na save laik painim wanpela yangpela meri bilong narapela kantri o PNG we krismas bilong em namei long 20 na 25. Mitupela bai marit na stap hia long PNG painim lapun na idai.

Nem: **Johnny Gee**
 Krismas: 26 (man)
 Adres: PO. Box 2151, Lae, Morobe Province.
 Save laikim: Pilai gita, go lotu, go painim abus na wok gaden, lukim narapela ples, tokpilai, senisim poto na presen na mi laikim wanpela meri i gat wankain krismas long martim em long bihain.

Nem: **Paso Yakapo**
 Krismas: 20 (man)
 Adres: Waso Trading, PO. Box 977, Lae, Morobe Province, PNG.
 Save laikim: Ritim buk, harim musik, raun wantaim poroman, pilai basketbal na raitim letas. Mi laik ol pen pren long ovasis na Australia meri.

Nem: **Danny Kanayoma**
 Krismas: 15 (man)
 Adres: Hoggi Trading, PO. Box 1631, Boroko, NCD.
 Save laikim: Pilai ragbi, volibal, raitim letas long pen pren na senisim ol presen.

Nem: **David Nielson**
 Krismas: 17 (man)
 Adres: Garu Plantation, POBox 26, Kimbe, West New Britain province
 Save Laikim: Go lotu, Ritim Buk Baibel, Harim ol Gospel musik, Pilai ol spots olsem soka, netbal na basketbal

Nem: **Mockon Jax**
 Krismas: 17 (man)
 Adres: C/-Jackson Zedix, Department of Works, POBox 636, Lae, Morobe province.
 Save Laikim: Pilai soka, volibal, basketbal na laik rait i go long ol penpren.

Masalai meri senisim pikinini bilong man



BIPO BIPO tru wanpela man nem bilong en em Goromba na meri bilong em Melelgam tupela i stap.

Ol i stap long wanpela ples ol i kolim long Bumbi insait long Jimi Distrik bilong Westen Hailans.

Wanpela de dispela man i tokim meri wantaim pikinini na em i go long bus wantaim spia na bunara bilong em.

Na meri i go wantaim pikinini long gaden. Melelgam i kisim pikinini i go na hangamapim em long bilum i slip i stap na em dikim kaukau long gaden.

Taim em i go, kwiktaim masalai meri i kisim pikinini (masalai) bilong em na senisim wantaim dispela bilong pikinini tru tru. Em i putim pikinini bilong masalai long bilum na pikinini bilong man em karim i go pinis long bus.

Mama i wok i go i go na bihain em i harim pikinini i krai. Em i go kisim na lukim ya nogat, baga nogut ya i slip long bilum i stap. Na taim em i lukim em i gat wanpela ai na tupela tit.

Em i pret nogut tru na em i kisim pikinini i go long ples. Long apinun man bilong em Goromba i kam lukim baga ya, em nogat toktok. Tupela i singautim ol manmeri long ples i kam lukim. Na ol i tok bebi bilong tupela marit i olsem em i pikinini bilong masalai stret.

Dispela pikinini i stap na em kamap bikpela na bihain em i dai.

- Mista Alphones Yangule Anda
 JIMI DISTRICT



Mi wari bikos papamama i stapim mi long maritim man mi laikim



Dia Laiplain,

Papamama bilong mi i no laikim mi long maritim man mi yet laikim. Mi bilong wanpela ples klostu long Mosbi taun tasol boipren bilong mi i bilong Niugini sait.

Papamama bilong mi i bungim pinis pren bilong mi tasol ol wari olsem em bai i no inap long baim mi. Ol i tokim mi long lusim man ya na painim narapela. Tasol mi laikim tru man ya na mi no save bai mi wokim wanem samting nau.

UNDECIDED

Dia Pren,

Olgeta yangpela manmeri i laik painim amamas wantaim ol pren husat i laikim ol na dispela ol yet i laikim. Na dispela i mas spesel o rait man o meri. Planti taim dispela i no isi na long sampela taim, bai manmeri i bungim taim nogut long dispela rot.

Yu luksave na wokim gutpela pasin long papamama bilong yu taim yu kisim boipren i go bungim ol.

Mipela i luksave long yu i no amamas long pasin we papamama bilong yu i wokim long yu.

Ol papamama i mas holim strong yet kastam pasin na ol i bilipim olsem em (kastam pasin) i bikpela samting. Baim na kisim pe bilong ol meri em i bihainim pasin kastam bilong tumbuna na long tingting bilong papamama bilong yu, marit long dispela rot i no bungim wantaim tupela marit tasol tupela famili na wanpisin.

Yutupela boipren bilong yu i

save toktok liklik long baim meri? Sapos em i luksave long famili bilong yu na wari ol i gat long pasin kastam bilong baim meri na sapos em i laik tru long maritim yu em bai i baim yu.

Mipela i ting olsem bai gat gutpela sans wantaim ol papamama bilong yu sapos em i toktok long dispela samting wantaim ol, tokim ol olsem em bai i baim yu na wanem taim em bai i wokim.

Ating papamama bilong yu i painim hat long luksave long kastam bilong em tasol sapos ol i gat inap taim long lainim save moa long em na em tu i tok promis long laikim na lukautim yu gut, ol inap senisim tingting bilong ol.

Sindaun na toktok wantaim boipren long ol dispela samting na bihain, wantaim papamama bilong yu gen. Soim gutpela pasin na rispek olsem yu ken wet na tupela papamama bilong yu bai i lukim strongpela laik we yu na boipren i gat long wanpela arapela.

Laiplain



Bik Bro REBO



IGO MOA NEKS WIK!



SIPAK MAIKY



IGO MOA NEKS WIK!

MELANESIAN SOLIDARITY

LONG JASTIS NA DIGNITI

P O BOX 71, UNIVERSITY, NESENOL KAPITAL DISTRIK
PAPUA NIUGINIM, TELEPON: (675) 3261227 FAX: (675) 3261227

HUSAT I KAMAPIM SANDLAIN HEVI NA PORETIM DEMOKRESI!

I no longtaim i go pinis, i bin gat sampela traim long i bin kamap long lain birua bilong sivil-militari long mun Mas 1997 we i sutim tok long dispela Sandlain hevi i kam long mipela ol dispela lain husat i bilip olsem ol lida long pastaim i brukim lo tu poretim Mama Lo bilong kantri.

I bin gat traim tu long bagarapim nem bilong mipela ol dispela lain husat i sanap strong long strong stopim na paul pasin we ino go wantaim Mama Lo em ol lida bilong mipela long dispela taim olsem birua bilong demokrasi na Mama Lo,

I bin gat traim tu i bin kamap long soim olsem i bin gat wok-hait namel long ami, ol man nating na sampela ol politisen long bringim daun Gavman bilong dispela taim.

Nogat samting i stap longwe long tok tru. Long makim maus bilong ol memba bilong mipela na tausen ol narapela memba bilong pablik husat i sanap strong long daunim ol lida long dispela taim. Mipela i tok tru olsem samting mipela i mekim i bihainim tingting bilong mipela long stopim ol samting i brukim lo lo na tu ino bihainim Mama Lo we ol lida pastaim i mekim. I no gat narapela samting moa.

Trupela tok i kamaut long maus bilong mipela em olsem:-

1. Sandline kontrak em wanpela kontrak we ol kamapim long bringim woa i kam long ol pipel bilong mipela long Bogenvil na dispela i bringim woa long ol pipel bilong kantri em ol autsait lain husat i brukim lo insait long militari.
2. Mama Lo bilong kantri i no tok orait long Difens Fos o husat man long kantri i kirapim woa long ol lain bilong em yet. Difens Fos i ken halivim Plis long karim aut lo na oda long taim bilong Stet ov Imejensi.
3. Disisen na samting ol lida long dispela taim i mekim ino bihainim Mama Lo bilong kantri na tu brukim lo. Disisen na samting ol i mekim i wankain olsem trabel o mekim rong.
4. Long planti yia, ol lida i save larim trabel na hevi we abrusim Mama Lo i kamap long Bogenvil. Taim ol i kisim ol autsait paitman na traim yusim ol long Bogenvil i brukim tru lo na tu ino bihainim Mama Lo na i soim tru kriminol ofens long sait bilong ol lida long dispela taim, Difens Fos na Sandlain paitman.
5. Moa long poretim Mama Lo na demokrasi bilong gutpela nesen bilong mipela, sivil militari pait i go long was long Mama Lo na demokrasi ol i save sutim tok olsem mipela i poretim.
6. Em i no wanpela hait samting. Em wanpela samting we i bin kirap bihain long sosel-ekonomik kondisen long dispela taim na bikpela hevi ol planti lain na ol wan wan i bin bung wantaim ami long dispela taim i sanap egens ol lida bilong mipela na lukluk long wanem rot bilong gutpela kantri bilong mipela.
7. Sapos ol lida long dispela taim na ol lain bilong ol long tok sori ino inap na ino luksave long dispela, ol i no lainim wanpela samting long Mas 1997.
8. Sapos i bin gat tingting long rausim gavman bilong dispela taim, Mama Lo na demokrasi long Mas 1997, dispela ol lain bilong tok-sore, nau yet em ol dispela ol lain husat i laik bringim bek histori bai ino inap amamas long fridom ol i gat nau long ronim kranki na bagarapim nesen wantaim o' wok hait, giaman toktok na ol narapela samting.
9. Ol samting we ino bihainim lo lida bilong yumi i bin mekim long dispela taim i bin kamapim bel-kros long mekim woa i go longpela tasol dispela samting mipela i mekim long Mas 1997 i bin stopim dispela 10-yia woa. Dispela em gutpela Melanesian rot bilong bihainim. Wanem kain ol gutpela tingting, na olsem wanem dispela i stap long lo. Ol plis i ken tromoi yumi long kalabus tasol dispela em liklik

prais long baim long sevim laip bilong planti Papua Niugini long Bogenvil na olgeta long kantri.

10. Sapos Woa i wok long go het, Gavman inap long yusim ol Sandlain ami long winim ami woa tasol bai lus long politik woa na Bogenvil bai kisim independent maski em bai lusim woa bilong ami. Mipela i kam namel na long ol dispela tausen pipel bilong Pot Mosbi, Lae na Goroka i soim ol pipel bilong Bogenvil olsem em i isi long kisim jastis insait long PNG na yu inap long lusim long kisim jastis. Dispela ol lain husat i tok ol i sempion bilong demokrasi na mama lo, mipela i askim yu,

1. Yu bin stap we taim ol lida bilong dispela de bin abusim na ino bihainim dispela mama lo? Bilong wanem yu no inap long usim ol dispela lo, demokrasi, mama lo na pawa bilong yu long stapim ol dispela nogut toktok na ol samting we ino stret.

2. Yu bin stap we taim ol lidas i bin go het na plenim long brukim mama lo na raskol pasin egens ol sitisen bilong yumi yet long Bogenvil.

3. Yu bin stap we taim samting bin kamap we ol laikim ol rait man na hiro long sanap na kam fowet.


4. Wanem taim bai yu stap long yusim ol lo, .mama lo na demokrasi olsem karamap bilong stretim lo na mama lo eksen long nau gavman bilong de.

Mipela apil long ol politisen, plis, difens fos na olgeta lain, lusim dispela hevi kamap long March, 1997 ol shul long yumi olgeta. Yumi olgeta mas luksave olsem yumi olgeta i save mekim rong na yumi mas muv i go long stretim nesen na muv long edresim olgeta liklik samting yumi bungim long tude. Nokem lusim histori i kamap gen o dispela taim em bai yumi kisim bikpela bagarap stret.

Yumi olgeta tok - Maski gen Bogenvil


Yumi olgeta tok - Maski gen Mas, 1997

Yumi olgeta mas tingim na lainim tasol noken mekim gen dispela ol rong, yumi olgeta.



POWES PARKOP

Jeneral Sekriteri



MARK ROY WOIWABAL

Ekjeketiv Opisa


BIHAIN LONG OL TOKTOK

-Mipela sanap redi long autim rong we mipela i bin mekim na bagarap we mipela i bin kamapim na kam wantaim ol lain husat lukim mipela olsem ol birua.

-Mipela sanap redi long halivim long stretim nesen na ol pipel bilong mipela long lusim pen bilong Bogenvil na Sandlain hevi.

-Mipela sanap redi long givim gutpela helpim igo long edresim ol hevi nau kantri i wok long bungim.

-Sapos ol lain bilong mipela, birua na husat ol lain na grup husat lukim mipela olsem ol birua i redi, mipela i redi long joinim ol long wanpela gutpela rot tasol.




• Antap: Bara, i luk olsem net bai bruk ya. Straika bilong Cape Vogel i painim gol pos ya.

• Raithan: Lukaut bai yutupela i bam. Ol bilong EPC i skelim strong bilong ol ya.

• Aninit: Naomi Polum i kisim awot bilong em long presiden bilong PNG Atletik Yunion Tony Green.

Ol poto: Bae Kimali





• Pala Manet bilong All Stars i abrusim wanpela wail pits i kam long Gazelle.



• Aninit: Susa em i tapioka danis o stall tasol. Dispela ol kain stail ya i save kamap long EPC soka tonamen.



WANTOK SPOT



FIFA redi long helpim Bogenvil soka

HENRY MORABANG i raitim

WOL soka bodi, FIFA, i redi tasol long sapotim PNG Futbol Asosiesen long strongim wok bilong soka long Bogenvil ailan.

Presiden bilong PNGFA Peter Mommers husat i stap nau long Zurich, hetkwata bilong FIFA i tokim Wantok olsem FIFA i orait pinis long givim 250 soka bal, ol referi buk na rul buk bilong soka.

Mommers i tok em i amamas tru long helpim i kam long FIFA. Planti bikman bilong soka long wol i no save long Papua Niugini. Tasol taim bilong hevi long Bogenvil na bikpela tait Tsunami tasol i putim nem bilong kantri long wol map.

FIFA i givim helpim taim em i harim ol hevi i kamap long Bogenvil. Na Mommers tu i wetim yet wankain helpim bai kam long Yunaited Yurop Futbol Asosiesen (UEFA) long helpim ol pipel long Aitape Disasta.

Mommers i stap long Zurich long stap insait long wanpela konpres bilong FIFA Wimens Soka komiti. Presiden Mommers em i siaman bilong Osenia Wimens Komiti olsem na em i kisim dispela wokabaut.

Dispela miting bilong Fifa wimens komiti em long paitim toktok long stretim soka bilong meri long wol. Em i namba wan taim Mommers i stap long dispela kain miting na dispela i ken strongim gutpela wok namel long PNG na olgeta arapela kantri.

• Na long arapela soka nius, wanpela opisel bilong PMSA i singaut long presiden Dr Kuam Malai long noken sutim toktok long PNGFA sapos em i no stretim ol hevi bilong PMSA.

Hevi bilong PMSA i bikpela moa, we Dr Malai i mas givim taim long stretim hevi namel long referi na ol klap.

Las wik Dr Malai i laik PNGFA i mas holim kwik anuel jenerel miting long paitim toktok bilong nesanel soka. Tasol opisel ya i no amamas bikos Dr Malai i mas stretim PMSA pastaim bipo long sutim toktok

long PNGFA.

PMSA em i bikpela asosiesen long kantri na em i mas soim gutpela pasin long soka na tu wok edministresen bilong em.

Nau yet PMSA i makim wanpela interim

komiti long lukim olsem olgeta tim i mas pilai long fainel. Man i go pas long dispela komiti em Enoch Pokarup na Steven Nion.

Wantok i painimaut olsem Steven Nion i risain olsem vais presiden bikos em i no amamas long sampela disisen bilong Dr

Kuam Malai. Tasol em i stap yet long sapotim ol arapela eksekutiv long larim PMSA i mas pinisim fainel bilong em.

Nion i tokaut long Wantok olsem em i risain na em i helpim tasol inap Pot Mosbi soka sisen i pinis



• Mopi soka tim husat winim LFA taitel. Lukim stori insait long Lae Nius spesel.

Gavman i beks long spots

JWOK bilong ranim spot insait long kantri bai bagarap bikos gavman i skelim wanpela mani long sapotim PNG Spots Komisnin.

Sapos olgeta toktok i no stret, PNG Spots Komisnin bai pasim opis bilong em long pinis bilong dispela yia.

PNG Spots Komisnin em wanpela ol bodi we gavman i no givim mani long katim daun long sevim sampela mani long ranim kantri.

Toktok bilong pinisim PNG Spots Komisnin i kamap taim minista bilong Treseri na namba tu praim minista lairo Lasaro i tokaut long 1999 baset long Mande.

PNGSC em i stap namel long 15-pela arapela ol gavman bodi na ajensi we gavman bai i no inap sapotim neks yia.

I nogat sampela moa toktok i kamap klostu long nem bilong PNG Spots Komisnin. Tasol wanpela hap tok Inglis "abolish" we i tok olsem long pinisim o rausim wok bilong komisnin.

Nau yet i gat K130,000 i stap yet we PNG Komisnin i ken yusim long neks yia. Tasol

aninit long baset bilong dispela yia, i nogat wanpela mani stret i bin stap long en ya.

Sapos PNG Spots Komisnin i aut, bikpela toktok nau bai kamap sapos Nesanel Spots Institut bai ran yet o nogat. NSI em i trening senta bilong PNG Spots Komisnin we i save kamapim planti ol spot tisa insait long kantri.

Siaman bilong PNG Spots Komisnin Bernard Fong na eksekutiv dairekta John Kambuou i tok olsem sapos olgeta toktok i no stret, em i min olsem PNG Spots Komisnin bai pas long Disemba.

Nau yet PNGSC Bot bai toktok wantaim lairo Lasaro long ken nesanim tingting long givim mani long komisnin.

John Kambuou i tok em i givim K1.2milien baset plen i go long gavman long 1999, tasol em i no kisim wanpela mani. Nau em i no kisim mani, planti ol arapela samting olsem PNG Spots Federesen tu bai i no inap kisim mani bilong ol. PNG Spots Federesen i laikim K800,000 long redim tim i go long Saut Pasifik Gems-neks yia.

Momase, Hailens soka asosiesen laik rausim PNGFA eksekutiv

FRANCO NEBAS i raitim

MOMASE na Hailens rijonol soka asosiesen i pasim tok pinis long bung wantaim na rausim Presiden bilong Papua Niugini Futbol Asosiesen (PNGFA) Peter Mommers na ol eksekutiv bilong em.

Dispela bai kamap long taim PNGFA i holim AGM bilong ol long Goroka. Dispela AGM we bai kamap long Novemba 27, long dispela yia tasol bos bilong PNGFA Peter Mommers nau i stap long Ovasis long FIFA wimen soka miting.

Long dispela as miting ya nau em i bai kamap long Febuari neks yia. Dispela tu i mekim ol Presiden bilong ol lokal asosiesen ino amamas long miting i surik i go long neks yia.

Ol eksekutiv bilong tupela rijon ya long tupela wik i go pinis i bin bung long Wewak taim Momase rijonol soka tonamen i bin bai kamap na pasim tok pinis. Ol i gat bilip olsem ol i gat namba na sapot long rausim Mommers na ol eksekutiv bilong em.

Long as bilong dispela mov ol i laik mekim em long wanem ol i lukim olsem dispela ol eksekutiv i mekim liklik samting tasol long improvim stendad bilong soka long kantri.

Lae futbol Asosiesen (LFA) vais presiden (teknikol) John Peka i tok em i gat namba pinis long Momase na Hailens. Em i tok, "Pablik Sevan Soka Asosiesen

(PSSA) na Boganvile tu i soim laik long sapotim mipela."

Hailens soka asosiesen presiden David Chung husat tu bin stap long Momase kap resis i tok olsem ol tu i bung na sapotim Momase long dispela mov. "Olgeta asosiesen long Hailens i laik lukim senis long Mommers edministrasen na i givim bikpela sapot long Momase long rausim ol long opis." Chung i tok.

Chung i tok tu olsem PNGFA i bin wokim liklik samting tasol long helpim promotim soka long Hailens long las 10 yia na nau ol i laik lukim senis long menesmen.

"Mipela i bin traim hat long hostim ol sempionsip bilong mipela long mani bilong mipela yet we mama asosiesen ino givim halivim long mipela" em i tok.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.